

# بداية مؤجلة

هبة درويش

رواية

اسم الكتاب: بداية مؤجلة.

اسم الكاتب: هبة درويش.

إخراج فني: محمود ربيع.

تصميم الغلاف: يوسف السيد.

رقم الإيداع: ٢٠١٩/١٩٩٦

جميع الحقوق محفوظة للناشر

وأى اقتباس أو إعادة طبع أو نشر في أي صورة كانت ورقية أو إلكترونية، أو  
بأية وسيلة سمعية أو بصرية دون إذن كتابي من الناشر؛ يعرض فاعله للمساءلة  
القانونية.

## شهر زاد للنشر والتوزيع

shahrazadpub@gmail.com



## إهداء

أهدي هذه القصة لفنان جيل كامل علّمنا كيف يكون الحب الصادق وكيف  
تكون المشاعر راقية

إهداء إلى الفنان الكبير... أمير الطرب العربي

الأستاذ هاني شاكر

فقد استوحيت هذه القصة من كلمات بعض أغانيه الجميلة، مع تجسيد  
حياة واقعية عانى منها جيل كامل، وهو جيل ٨٠

فأنا من هذا الجيل وأفتخر

وتحيّة طيبة لهذا الجيل العظيم



في يوم من أيام صيف ١٩٨٠ تستيقظ أم علاء التي تسكن في بيت صغير به ٣ أدوار تمتلكها، وهي في آخر دور قبل الروف، وكان الوقت قُرب الفجر، على صوت صراخ جاريتها التي تسكن تحتها في نفس البيت.

تنادي أم علاء: يا علاء يا علاء اصحى يا حبيبي، جارتنا اللي تحت شكلها بتولد، قوووم يا حبيبي بسرعة انزل معايا نشوفها، انت عارف مفيش حد معاها. يستيقظ علاء، وهو شاب في العقد الثاني من العمر، مسرعًا يرتدي حذاء في رجليه ويفتح باب الشقة متجهًا إلى أسفل، ويقول: يا ماما، أنا حنزل بسرعة أهو، بس انزلي انتي اطميني عليها على ماجيب أم رمزي الداية وأجي. وتنزل معه أمه إلى جاريتها وهو يتوجه إلى بيت الداية.

تطرق أم علاء على الباب وتقول: افتحي يا بسمه، افتحي يا حبيبي، حاولي تسندي نفسك وتفتحي.

تقول بسمه: الشراعة مفتوحة يا أم علاء، افتحي وادخلي. تمد أم علاء يدها تفتح الشراعة ومنها تفتح الباب، وتتنجح لجرة نوم بسمه، وتقول لها: ألف سلامة عليك، إن شاء الله تقومي بالسلامة، أنا حرّوح أحضّر فوطه ومقص وأسخن مائة على ما حلّيمة تيجي.

وتبدأ أم علاء في تحضير ما هو مطلوب، وبعد ربع ساعة تسمع علاء ينادي: افتحي يا ماما الداية جات.

تفتح أم علاء وتُدخلها، وتقول لعلاء: ماتطلعش فوق يا حبيبي واستنى في الصالون أحسن خالتك تتعب ولأ نعوز حاجة.

علاء: حاضر يا ماما.

ويدخل علاء الصالون وينتظر، وبعد ثواني يسمع صوت بكاء المولود فيبتسم.

وبعد نصف ساعة تخرج أم علاء ومعها الداية والمولود على يدها، وتقول:  
تعالى يا علاء حاسبِ الحاجة حليمة.

ينظر علاء على المولود في يد أمه ويقول: بنت ولا ولد؟

تقول حليمة: بنت زي القمر، عقبال ما نشيل لك يا حبيبي.

يكشّر علاء؛ فتضحك أمه وحليمة وتقول: شوف الواد، مش عجبك بنت؟

ترد أم علاء: آه ياختي مش بيحبهم ونقره من نقرهم، دة مغلبني مع إخوانه  
البنات وقاعدلهم على الواحدة.

وتنزل حليمة ومعها علاء، وتقفل أم علاء الباب وتدخل إلى بسمه تجدها  
مستغرقة في النوم من التعب.

تضع جنبها مولودها وتخرج، تفتح باب الشقة وتجلس بجواره في انتظار علاء،  
ويأتي علاء يجري على السلم محدثًا صوت.

تقف أمه مسرعة وتشاور له وتقول: هششش، بالراحة الست نائمة من  
التعب، يلاً اطلع انت بقى نام وخلي بالك من اخواتك، وانا هبات معاها هنا  
وأطلعلكوا لما تصحى، وماتنساش الصبح كلم أم إبراهيم أختها من عندنا وعرفها  
إن أختها ولدت.

علاء: حاااضر.

ويصعد إلى شقتهم، وفي الصباح يفعل كما قالت له أمه.

ووقت أذان الظهر يطرق باب شقة بسمه، تفتح أم علاء فتجد أم إبراهيم  
أختها وتسلم عليها وترحب بها.

وتدخل معها إلى حجرة بسمه، وتستيقظ بسمه على صوتهم، تحاول تسند  
نفسها وترفع رأسها، تجد أختها وجارتها.

تقول: أهلاً يا أختي تعالي، تسلمي يا أم علاء، تعبتك يا حبيبتي، عقبال ما  
أتعبك في فرع علاء يااارب.

ترد أم علاء: حبيبتي مفيش تعب، احنا اخوات وجيران، والجيران لبعضها، بس  
كويس إنك كنتي سايبة الشراعة مفتوحة، وإلا ماكنتش عرفت أدخل.

ترد بسمة: آه يا اختي، ما أنا الساعة ١٢ كده حسيت بالتعب، خُوفت يجريالي  
حاجة، فتحتها عشان لو نديت عليكي ولا على علاء حد يسمعني ويعرف يدخل.

وتستأذن منهم أم علاء: حطلع أنا بقى يا أم... ألا حتسميها إيه؟

بسمة: حسميها هبة.

أم علاء: ماشي يا أم هبة، حطلع لعيالي أفطّرهم وأنزلك آخر النهار.

ترد أم إبراهيم: تسلمي يا غالية، ويسلم كرمك، ماتتعييش نفسك، كفاية  
عليكي ليلة امبارح كتر خيرك، أنا بايتة معاها أهو.

أم علاء: ماتقوليش كدة يا اختي، يلاً ألف مبروك وتتربي في عزكوا.

وتصعد إلى شقتها تجد أولادها لسة نايين، وتدخل إلى غرفتها هي الأخرى؛

لكي تنام.

وقر الأيام إلى أن جاء يوم السبوع.

وتبدو مظاهر السبوع من أغاني وحلويات واجتماع الجيران والأقارب عند

بسمة أم هبة.

وفي وسط الاحتفال كل فترة يذهب علاء إلى الغربال التي توضع فيه هبة،

وينظر لها بابتسامة حنيّة، ويضع أصبع يده في وسط يدها الصغيرة وتغلق هبة

يدها على أصبعه؛ مما يثير فرحة علاء، ويسرّ من جمالها كطفلة وتفاصيلها

الصغيرة.

وينتبه على صوت أمها تقول له: لو كنت صغير شويّة كنت حجزتهالك.

يظهر على علاء علامات الكسوف ويقول: لا يا طنط، دي زي اخواتي، وبعدين

أنا حسنتي كل ده هههههههه.

وينتهي السبوع.

وقمر الأيام ويأتي عيد ميلاد هبة الخامس، وتظهر هبة في أبهي حالتها كأنها ملاك، وتخطف الأنظار بجاملها، وتحترف بها أمها في عيد ميلادها، وتعزم جيرانها وأقاربها، وتظهر أم علاء ومعها لعبة جميلة لها وتقبلها وتحضنها هبة بشدة، وتقول لها: هو أبيه علاء فين؟

تقول أم علاء: بتسألني عليه ليه؟

ترد هبة: عايزاه يشوفني وأنا عروسة كده بالفيستان المنفوش والجزمة والروح.

تضحك أم علاء، وتقول لها: هو فوق.

تقول هبة: ممكن أطلع أسلم عليه؟

تقول لها أم علاء: ممكن، بس ماما دلوقتي حتجيب التورتة، مين حيطفي

الشمع بقى؟

هبة: مانا حروح وأجي بسرعة.

تجري مسرعة لأعلى، تطرق الباب ويفتح لها علاء، وتقول له: على فكرة أنا

مخصمك.

يرد علاء: أهلاً أهلاً بالقمر، زعلانة مني ليه؟! وإيه الشياكة دي كلها.

هبة: يا سلام، يعني ماتعرفش إن عيد ميلادي النهاردة؟

علاء: يا خبر! تصدقي نسيت.

هبة: سُوفت بقى، زحلانة منك عشان نِسْتِي.

يلتقت علاء على الجزمة جنب الباب، وينظر لها ويقول: طيب غمضي عينك كده.

تبتسم هبة ابتسامة سعيدة وتضع يدها على عينها وتقول: أهو.

يأخذ علاء علبة ملفوفة بورق هدية، ويقول علاء: فُتّحي.

تنظر هبة بدهشة تجد لفة هدية كبيرة، تأخذها منه وتقبله من خدّه،

وتبتسم وتقول وهي بتضحك: ههههه عَصت خدك رووووج.

وتأخذ منه اللفة وتجري.

بيتسم علاء وينظر في مرآة الجزامة يرى الـروج على خده، ويخرج منديلاً من جيبه ويمسح، ويقول في سرّه: إمال أنا مابحش البنات ليه! ما عشان كدة. ويسمع صوت هبة تنادي: يا أبيه علااااا شكرًا، أنا بحبك قَدّ الدنيا، ومش زعلانه منك خلااa

وبيتسم علاء ويغلق الباب.

وقرّ الأعوام إلى أن يأتي يوم في صيف عام ٩٠، تستيقظ هبة من نومها تجد أمها تحضّر علبة بها بعض المعجنات الصغيرة، تنظر إلى أمها وتقول: هو احنا مسافرين ولا إيه يا ماما؟! انتي عاملة القُرص والحاجات دي لمين؟ ترد أم هبة: لا مش مسافرين، بس أبيهك علاء مسافر النهاردة بالليل بلاد برة، عقبالك يا حبيبتي.

هبة تنتبه بحزن: مسافر ليه وفيين؟

أم هبة: رايح ألمانيا يا حبيبتي، عقبال ما أشوفك زيّه ناجحة في دراستك كده، هو نجح وجايب تقدير، لا وإيه كمان بيعرف يلعب جودو لدرجة إن مدرسة كبيرة أوي بتعلّم اللعبة دي هناك بعتوله يدرّب عندهم.

هبة: أه يعني مسافر كام يوم كدة زي ماكان بيسافر لو عنده بطولة.

أم هبة: لا، المرة دي مسافر يكمل تعليمه ويدرّب هناك، يعني سفرية طويلة شوية. هبة: طيب أنا حسبك أسلم عليه.

وتجري مسرعة.

أم هبة: استني يا بنتي لا يكون نايم ولا حاجة.

هبة: لا لا هو مش بينام دلوقتي، أنا عارفة.

وتجري وتصعد إلى الدور العلوي وتخبّط علي الباب: فتجد أخت علاء تفتح الباب.

هبة: إزيك يا أبله أميرة.

أميرة: أهلاً يا هوبا إزيك؟

تُقبّلها وتقول: إيه يا بتّ الطعامة دي، انتي بقيتي حلوة كده ليه؟  
هبة تنظر بخجل، وعينها تلتفت يمينا وشمال: ربنا يخليكي يا أبله.  
أميرة: انتي بتدوّري بعينك على مين؟ طنطك أم علاء، ولا علاء نفسه؟  
هبة: الاتين.

أميرة: لو على طنط أم علاء هي في السوق بتشتري حاجات عشان أبيه مسافر  
بالليل، لو عايزة تسلمي على أبيه هو في الأوضة بيتمرّن.  
هبة: طيب أنا حقعد أستناهم، ممكن؟  
أميرة: طبعاً يا حبيبتي اتفضلي.

وتتظر هبة جزءاً من الساعة وتجد علاء خارج من حجرته لابس ملابس  
التمرين والعرق يتصبب منه، ويقول: أهلاً، انتي هنا يا بوب؟ استني حاخد دش  
وأجيلك.

تنظر له هبة وهي مبتسمة، ويأتي لها علاء ويقول لها: بتعرفي تعملي شاي؟  
تقف هبة وتقول: آه والله بعرف.

يقول علاء: طيب اعملي يلاً كوباية شاي وحستناكي في البلكونة، تعالي اقعدي  
معايا شوية بقى، أنا مسافر بالليل.

تسرع هبة إلى المطبخ وتعمل الشاي، وتأتي به لعلاء وتجلس معه في البلكونة،  
ويتحدث لها علاء عن سفره وسبب السفر.

ويوصيها بأنها تأخذ بالها من نفسها ومن والدتها، وإنها لازم تذاكر وتتفوق،  
ووعدها أنه سيجلب لها هدية حلوة جداً.

ويقول: أنا حقوم بقى عشان أنام شوية عشان حسافر بالليل.  
تقف هبة وتقول: مع السلامة يا أبيه.

وقملاً عينها الدموع.

وتسلم عليه بيدها ويقبّلها من جبينها، ويطبّط على كتفها.

تنزل هبة مسرعة وهي تبكي لفراق علاء.

تقابل أم علاء: أهلاً يا هبة، ازيك وازي ماما؟

ترد هبة بصوت حزين: الحمد لله.

أم علاء: مالك يا هبهوبة زعلانة ليه؟ حد من العيال اللي فوق دول غلّس عليك؟

هبة: لا، بس أبيه حيسافر وحيقعد كثير، وأنا خدت على إنه معانا.

أم علاء: يا حبيتي وروحي انتي زعلانه عشان كدة؟ ادعيله بس ربنا يوفّقه

وينجّحه ويحيلنا بالسلامة.

وتصعد أم علاء إلى شقّتها وتدخل هبة إلى شقتها، وتجلس أم علاء مع أولادها

وقت تناول الغداء، وتقول: تصدقوا.. قابلت البت هبة بتعيط وهي نازلة من

هنا عشانك يا علاء.

علاء: آه ما أنا عارف، ما كانت قاعدة معايا وعنيها اتملت دموع، بتصعب

عليا البننت دي أوي، مش عارف أبوها اللي معندوش دم من يوم ما طلق أمها

وهي لسّة صغيرة ورماهم كده، وهي عايشة لا أب ولا اخوات، وأمها شقيانة

عليها في المحل اللي مأجراه منّا تحت ده.

أم علاء: آه والله يا بني، أبوك الله يرحمه كان دايمًا بيوصيني عليها ويقول لي

زي اليتيمة بالظبط، الله يرحمه يارب، وإن شاء الله ربنا حيقف معاهم.

ترد أخت علاء أميرة: أنا ماشوفتش أبوها ده مرتين ثلاثة أصلاً على بعض من

يوم ما سكنوا هنا.

ترد أخته الثانية منال: ولا أنا والله يا أميرة، مع إني أنا أوّعى على أم هبة دي

لما دخلت هنا عروسة، فاكرك يا علاء؟

علاء: آه فاكرك، كانت ماما لسّة حامل فيكي يا أميرة.

منال: هو جوزها طلقها ليه يا ماما صحيح؟

أم علاء: أهو يا بنتي، اللي عرفته منها إنها كانت زوجة تانية؛ لأنها كانت

أرملة أصلاً وماخلفتش، جوزها كان ظابط ومات في حرب ٧٣، وكانت لسة عروسة، واتجوزت أبو هبة ده، والمفروض إن له زوجة تانية كانت في إسكندرية، واللي عرفته منها إنه أول الجواز شرط عليها ماتحملش إلا لما تقول له؛ لأنه عنده عيال، عشان كده فضلوا ٥ سنين من غير عيال، ولما جت هبة وربنا أراد بدأت بينهم مشاكل واطلقوا، والبت يا عيني كانت لسة ٣ سنين، ومن يومها ماشوفنا هوش ولا بعتلهم جنينه، وسمعت إنه جاله شغل ومشي من مصر خالص.

علاء: بس هانت عليه بنته، ده البت زي الملايكة.

وقمر الساعات وتنظر هبة في الساعة كل ساعة، حتى أتت الساعة ٢ بعد منتصف الليل، وخرجت هبة من شرفة حجرتها تنظر في الشارع على صوت سيارة تقترب، وهذا موعد سفر علاء.

وتسمع صوت باب شقتها يُفتح، تجري عليه تجد أمها تسلّم على علاء وتقبّله من جبينه وتقول: روح يا بني، ربنا يرجّعك لأهلك مجبور خاطر يا رب ويوفّقك. تجري هبة عليه وتعطيه مصحفاً صغيراً، وتقول له: خد ده يا أبيه، خليه في جيبك؛ لأنّي عرفت إن ألمانيا مش ببيعوا مصحف، وأنا خايفة عليك تنسى القرآن وربنا يزعل منك.

بيتسم علاء ويقبّل جبينها ويأخذه منها، يقبّله ويضعه في جيبه ويقول: أختي الصغنة الشقية، عايزها تكبر بسرعة وتبقّى شاطرة، وماتعذبش ماما، وأنا لما أبعث جواب لمامتي حبقّى أسألها عليكي.

ويودّعهم على موعد قريب باللقاء ويذهب إلى رحلته.

وقمرّ الأعوام والأعوام على هبة وهي كل يوم تنتظر جواب علاء لأهله على أمل أنه يذكّرها في جواباته، وبعد حوالي ٧ سنوات ترجع هبة من المدرسة تجد سيارة ميكروباص تقف أمام المنزل، ومكتوب عليها مطار القاهرة.

تجري مسرعة ترى ماذا يحدث، وقلبها يخفق فرحاً لما تتوقعه، وبالفعل تجد علاء واقفاً على باب المنزل ويسلّم على أهله ويأخذ الشنط من السيارة، تجري

عليه وتحضنه وتبكي فرحًا بعودته.

فينتبه علاء لتلك الفتاة الجميلة التي كانت أمس طفلة صغيرة بضايفر،  
ويقول: إيه ده ماشاء الله، هبة، انتي بقيتي قمر وكبرتي يا بت.  
تخجل هبة من كلامه وتجري على شقتها وهي تقول: حمدالله على السلامة  
يا أبيه، نورت بيتك.

وتخبط باب الشقة فرحًا، وتفتح لها أمها وتقول: إيه مالك مسروعة على إيه؟  
هبة: أبيه علاء جيه يا ماما.

أم هبة: والله، حمد الله على السلامة.

وتأخذ طرحتها من على كرسي بجوار الباب وتنزل مسرعة لكي تسلّم عليه.

تجدهم جميعًا؛ علاء وأمه وأخواته يصعدون أمامها.

أم هبة: حمد الله على سلامتكم يا حبيبي نورت بيتك، حمدالله على سلامته  
يا أم علاء لولولولي.

تقف هبة بجوار الباب تنظر له وهو صاعد، وتبدأ تشعر بضربات قلبها  
تخفق وتخفق، وتغلق أمها الباب ولا تنتبه هبة لما حدث.

أم هبة: هبة، انتي يا بت، انتي اللي واخذ عقلك.

هبة: نعم يا ماما؟

أم هبة: ماما؟ ماما مين بقى انتي سافرتي وجيتي.

هبة: شوفتي أبيه علاء اتغير إزاي يا ماما.

أم هبة: يادي أبيه علاء اللي واكل عقلك، أعملي حسابك من دلوقتي، انتي  
مابقتيش زي زمان.

هبة تنظر بانتباه: يعني إيه؟

أم هبة: يعني مفيش طلوع فوق إلا ورجلي على رجلك، ومفيش قعاد مع  
أبيه لوحدكوا زي زمان، انتي مابقتيش هبة البت العيلة اللي حيقعدها على رجله

ويجبها مصاصة، انتي بقيتي طويلة وشابة، وبقيتي آنسة على وش جواز، يعني تلبسي متداري لما ينزل أو لو طلعتنا فوق، ومفيش طلوع أصلاً فوق إلا رجلي على رجلك، أو لو هو مش موجود.

هبة: إيه يا ماما اللي بتقوليه ده، دا أبيه هو اللي مربيني، يعني زي أخويا الكبير بالظبط.

أم هبة: اسمعي اللي بقول عليه وقولي حاضر.

تدخل هبة غرفتها وهي متذمّرة من كلام أمها، وتقف أمام المرأة تسترجع كلام أمها بأنها لا تستطيع أن تجلس معه أو تحكي معه إلا بقيود.

وتتجه إلى الدولاب وتقف حائرة أمام ملابسها، وتختار منها أجملهم وتحضره على السرير، وترتدي ملابسها وتفرد شعرها وتخرج من حجرتها.

أم هبة: خير؟! على سِنِجَة عشرة ليه كده؟ وراكي معاد؟

هبة: لا، بس احتمال مُنّي تجيلي.

أم هبة: آه مُنى، طيب، هو انتي ماعندكيش دروس النهاردة ولا إيه؟

هبة: عندي بس مش حروح.

أم هبة: ليه إن شاء الله؟

هبة: أصله مش مهم أوي، حقعد أذاكر هنا أحسن.

أم هبة: اااه ماشي، لما نشوف آخرتها يا بتاعة الثانوية العامة، أهو لو مفلّخْتِيش أجوّزك وأرتاح من همك.

هبة: همّي؟! بقى كده يا ست ماما؟ ماشي.

أم هبة: أنا حنزل المحل شوية، اقعدي ذاكري، وزى ما نَبّهت عليكي مفيش طلوع فوق من هنا ورايح، لو أم علاء نادت عليكي قوليلي قبل ما تطلعني.

هبة: حاضر.

وقر الساعات حتى تأتي الساعة ٦ مساءً، ويطرق باب شقة هبة، وتفتح لتجد

صديقتها مُنى على الباب.

أهلاً منى... أهلاً هبة.

هبة: تعالي ادخلي، كويس إنك جيتي النهاردة.

منى: انتي ماجتيش الدرس ليه؟

هبة: أصل أبيه علاء اللي حكيت لك عنه جيه من السفر، وأنا قولت أكيد حينزل يقعد معنا شوية.

منى: أبيه علاء، آه قولتيلي، تصدقي من كتر كلامك عنه بقى نفسي أشوفه.

هبة: يا بنتي أبيه علاء ده حاجة كده كبيرة أوي عندي، مش عارفة، هو أبويا ولا أخويا ولا....

منى: ولا إيه ولا إيه قولي قولي.

هبة: يا بنتي مش اللي في دماغك.

منى: طبعا مش اللي في دماغي هو حيعيل، ده انتي بتقولي أكبر منك ب ١٥ سنة، يعني استحالة أصلاً.

هبة: حيعيل ليه؟! هو أنا باين عليا إني عيلة أوي كدة، ما أنا كبيرة أهو.

وتقف في المرأة تنظر لجسدها بفخر مثل كل بنات جيلها، وتنتبه على طرُق الباب وتجري مسرعة تفتح، تجد أميرة أخت علاء على الباب.

أميرة: إزيك يا هبوب.

هبة: أهلاً يا أبله، اتفضلي.

أميرة: ماما هنا؟

هبة: لا هي تحت في المحل، تحبي أنزل أندھالك؟

أميرة: لا يا حبيبتتي، أنا حقوت عليها وأنا نازلة، أبيهك علاء كان عايز ينزل يسلم عليكوا ويديكوا الهدايا اللي جيبهالكوا، وحينزل بعد صلاة العشا، لو أنا مالقيتش ماما تحت ابقي بلغيها.

هبة وهي تبتسم: حاضِر.

وتغلق الباب وتطنّط هبة في مكانها وتتمايل فرحًا لرؤيه علاء كما كانت تنتظر طيلة النهار، وتجري على مُنى وتقول لها: يلاً قومي، قومي رُوحي يلاً مش فاضِيالك.

منى: بقى كدة؟ طيب أنا مش ماشية بقى إلا لما أشوف أبيه علاء اللي لاجِس مخك ده، وآدي قاعدة.

هبة: انتي حتقعديلي؟ قومي نعمل عصير ولا حاجة.

ويذهبنَ سوياً إلى المطبخ لكي يحضروا العصير والكيك، وتأخذ هبة جهاز تسجيلها الصغير معها المطبخ وتشغل أغاني هاني شاكر التي كانت تعشقها، تسمعها باستمرار وتُرفع من صوت المسجل وتتراقص هي وصدقته على كلمات «قلبي ماله» التي تقول:

(قلبي ماله.. إيه جِراه.. إيه غيرله حاله...

كان صعب عليا أسهر لياليا... ولقِتنِي في ثانية بنسى الدنيا.. ومِلت وقلبي ندأله... ومسهر رمشي ومبيسألشي وعذابي بيحلاله) إلى آخر الأغنية.

في الأعلى يجلس علاء مستلقياً على كنبه الأنتريه، يلفت انتباهه صوت أغنية هاني شاكر، فيقول لأمه التي تجلس أمامه على الكرسي: إيه الصوت ده جاي منين؟

أم علاء: دا أكيد هبة، غاوية هاني شاكر وليل نهار مشغلاه، مع إن أمها غلبت معاها ماتعلّيش الصوت أوي، بس مفيش فايده، جيل دماغه ناشفة، أكيد أمها تحت في المحل عشان كده معلّياه، حقوق أنادي عليها تطفيه لو متضايق.

علاء: لا لا مش مستهله، سببها براحتها، خليها تعيش سنها، ألا هي بقت في سنة كام دلوقتي؟ دانا اتفاجأت بيها وهي جاية تسلّم عليا إنها طُوّلت كده.

أم علاء: بقت في ثانوية عامة السنة دي، ١٧ سنة أهي، أما يا واد ياعلاء البت دي لو كبيرة كام سنة كنت خطبتها لك على طول.

علاء: هه؟! إيه يا ماما الكلام ده؟ دي عيلة، وبعدين مانتي عارفه أنا مابفكرش في الجوااااز.

أم علاء: إيه يا بني الي بتقوله ده، ليه إن شاء الله؟! ناقصك إيد ولأ رجل ولا لسة صغير، يا بني نفسي أطمن عليك قبل ما أموت وأشيل عيالك، ده إخوانك البنات الي أصغر منك اتجوزوا وخلّفوا وانت لسة.

علاء: ياه يا أم علاء، هو أنا أكلّمك في التليفون تقولي نفسي أفرح بيك، بتعتيلي جواب تقولي نفسي أفرح بيك، آجي من السفر نفسي أفرح بيك، هو أنا يعني حعتس ولا أحمض لوماتجوزتش.

أم علاء: هو انت دايماً كده تتريق على كلامي؟ طيب وربنا أجازتك دي ورحمة أبوك لأكون مجوزاك ست البنات.

علاء: طيب طيب ربنا يسهل، أنا حقوم أريح نص ساعة وأصلي العشا ونزل للناس. تغلق أم هبة المحل وتصعد على شقتها، وتسمع صوت المسجّل عاليًا، فتتذمر من أفعال ابنتها، وتفتح الباب بالمفتاح وتدخل تنادي على هبة، ولكن هبة في المطبخ مع صديقتها منى لا تسمعها من صوت المسجّل والخلاط.

تدخل عليهم أم هبة وتأخذ المسجّل من على الرخامة وتطرحه أرضًا؛ مما يلفت انتباه هبة وصديقتها ويفزعا من عملتها.

وتبكي هبة وهي تمسك بتسجيلها الصغير وتقول: ليه كده يا ماما؟!!

أم هبة: عشان عملاي فرح وصوته عالي وصوتكوا عالي، وبنادي بقالي ساعة مش سامعاني، ونبّهت عليكي ١٠٠ مرة ماتعلّهوش مفيش فايده.

تقف منى في جانب المطبخ مُحرجة ممّا يحدث.

وتقول: معلش يا طنط ماتزعليش، احنا آسفين، أنا حمشي أنا بقى يا هبة وأشوفك بكرة في المدرسة.

وتأخذ شنطتها متوجهة لباب الشقة تفتحه لكي تمشي، تجد أم علاء وابنها كادا أن يطرقا الباب، وتقول منى: أهلاً اتفضلوا.

أم علاء: أهلاً يا حبيبتي، ازيك يا منى؟

منى: أهلا يا طنط.

وتنظر لعلاء في دهشة؛ فوجدته كما كانت تصفه لها هبة كنجوم هليود،  
وتقول: إزيك يا أبيه؟ وتخرج مُسرعة.

تسمع أم علاء صوت زعيق أم هبة لابنتها، وتقول: إيه يا أم هبة مالك بتزعي لي؟  
تخرج هبة وهي تبكي وتقول: عاجبك كده يا طنط؟ كل حاجة زعيق وضرب،  
وكسرتلي التسجيل بتاعي أهو كمان.

نظر علاء لها ويقول: طيب بتعيطي ليه؟ البنات الحلوين مايعيطوش.

هبة: انت كمان يا أبيه بتعاملني على إني لسة طفلة؟ عن إذكوا.

وتتركتهم وهي تبكي وتدخل لغرفتها؛ لكي تبدل ملابسها وتصف شعرها.

يجلس كل من أم هبة وأم علاء وعلاء في الصالون، وتنادي أم هبة على ابنتها:  
تعال يا هبة شوفي عمك علاء جايلك إيه، وبعدين فين الكيكة والعصير اللي  
واقفة طول النهار في المطبخ بتعملهم ههههه.

تأتي هبة من غرفتها متجهة إلى المطبخ، ومنه إلى الصالون ومعها العصير  
والكيك، وتقدم لهم وتأخذ شنطة الهدايا من علاء، وتجد بها برفان وساعة  
وبعض من الحلّي، وتسعد بهم هبة جداً.

ويدور بينهم جميعاً حوار....

يسأل علاء هبة...

علاء: ناوية تدخلي كلية إيه؟

هبة: نفسي أبقى مذيعة.

علاء: برافو، يعني كلية إعلام.

هبة: آه، إن شاء الله.

علاء: وعلى كده شاطرة؟

أم هبة: والله يا علاء يا بيني دي مغلباني خالص، كل دماغها في غيبة الحمام اللي على السطوح والأغاني، واللي طالعلي جديد بقى قال إيه بتقول إنها بتحب تألف قصص وشعر.

علاء: الله، بجد؟! طيب برافوو.

هبة: والله يا أبيه أنا مش بقصر في دروسي، والسنة اللي فاتت في تانية جبت مجموع كبير، وكمان في التحسين، يعني لما أخلص تالته بالتحسين حعدّي ٩٥% إن شاء الله.

علاء: إن شاء الله، وابقي وزيني بتكتبي إيه، أنا بحب أقرأ كثير، ومادام بتحبي تكتبي يبقى لازم تقري كثير، حبقي أناولك شوية كتب للعقاد ونجيب محفوظ حيعجبوكي أوي.

وينتهي الحديث وينصرف علاء وأمه إلى بيتهم.

وتأخذ هبة الهدية بين زراعيها وتدخل على غرفتها.

في الصباح الباكر تستيقظ هبة كعادتها وتصعد للسطوح؛ لكي تطعم الحمام.

يشعر علاء، الذي تعود على الاستيقاظ باكراً وهو في سفره، بأنه يوجد صوت أقدام على السلم، يفتح باب الشراعة فيرى هبة صاعدة، يدخل حجرته يحضر علبة كارتونية في يده، ويصعد إلى أعلى يجد هبة وسط الحمام وكأنها واحدة منهم، يقف بعيداً يشاهدها وهي تطعم الحمام وتلعب معه، وبراءة الأطفال في عينها.

تشعر هبة بصوت أقدام قريبة؛ وعندما انتهت وجدته أمامها.

هبة: إيه ده؟ أبيه؟ صباح الخير، انت صاحي بدري ليه؟

علاء: صباح الخير يا بهوب، أعمل إيه، السفر عودني إني أصحى بدري أتمرن وأنزل شغلي، جيت أدور على حاجات التمرين بتاعتي اللي كانت تحت لقيت خالتك أم علاء رمياها لي هنا في الأوضة دي.

هبة: آه مانا عارفة، وأنا كل فترة بفتح وأشيل من عليهم التراب، هما وكل

كتبك الي كنت بتحب تقراها، وعلى فكرة أنا معايا نسخة من المفتاح، وحاطة مكتب جوّه بدخل أكتب ساعات، وعاملاله مفتاح، أستأذّنك مادام حتتمرن أبقى أطلع المكتب هنا في أي حنة.

علاء: لا خالص، ليه؟ خليه؛ أنا كده كده حنزل حاجتي تحت، ولما آجي أسافر تاني حبقى أطلعها، آه نسيت، خُدي يا ستي جبّتك ووكمان.

هبة: إيه؟ ووكمان؟! اللي هو إزاي؟

علاء: بصي يا ستي، ده زي التسجيل بالظبط، بس صغير أوي، بس ماينفّعش حد يسمع معايي؛ لأن له سماعات تتحط في الودن، وعلى راحتك بقى من غير ما تضايقي ماما، أنا كنت جايه ليا عشان أسمع وانا بتمزّن، بس مايغلاش عليكي.

هبة: الله يا أبيه، ده حلو أوي، إيه ده انت بتسمع موسيقى زينا كده؟!

علاء: هههه زيكوا ازاي؟!

هبة: أصل أنا دايماً شيفاك كبير وفدوة، ومالكش في التفاهات وكده يعني.

علاء: تفاهات إيه بس؟ الموسيقى فن جميل مش تفاهات، عامّة أنا بسمع دايماً لبيت هوفن وجيمس لاست.

هبة: أنا بسمع هاني شاكر، بس جرّب تسمعه حيعجبك، وأنا حبقى أجيلك كل ألبوماته الي عندي تسمعها.

وتنتبه هبة على صوت أمها تنادي على السلم، تأخذ هبة من يد علاء الووكمان وتقول له: يا خبر! أنا نسيت ماما والمدرسة، عن إذنك يا أبيه، شكرًا على الهدية، وباي باي.

وتجري مسرعة إلى أسفل، فتقابلها أمها على السلم، وتقول لها: إيه؟! ساعة بتأكلي الحمام؟! اتأخرتي على المدرسة، وإيه اللي في إيدك ده؟!

هبة: ده.... دا ووكمان.

أم هبة: نعم؟! ويطلع إيه يعني؟ وجبتيه مين؟!

هبة: أبيه علاء ادهولي.

أم هبة: أبيه علاء؟ وإيه اللي طلّح أبيه علاء السطوح؟ ولا انتي شوفتية فين؟!  
واوعي تكووني خبّطي عليهم بدري كده.

وقمسك هبة من يدها وتلقها لها، وهي تُعلي صوتها بنبرة حادّة.

تسحب هبة يدها وتقول: لا ياماما ماخبّطش عليه، اتقابلنا بالصدفة على  
السطوح، أنا بأكل الحمام وهو كان طالع يجيب حاجة تمرينه من فوق، فهمتي  
بقي.

وتسحب شنطة مدرستها وتتجه إلى باب الشقة.

أم هبة: يا سلام! صدفة؟! وقال لك إيه وقولتيله إيه؟!!

هبة، وهي تعطي ظهرها لأمها وتجلس على كرسي بجوار الباب وتقول: ما  
قالش يا ماما، ما قالش غير صباح الخير، ولما سألته على اللي في إيده ادهولي  
بدل التسجيل اللي انتي كسرتيه، وأي تفاصيل تاني لما آجي حبقى أقولها لك.

وتفتح باب الشقه وتكاد أن تخرج، تسمع أمها تقول...

أم هبة: على ما ترجعي بقي اعملي حسابك مفيش طلوع السطوح، والحمام  
ده أنا حظيره، والأوضة اللي بتقعدي تكتبي فيها مفيش طلوع تاني.

هبة: ما تخافيش أوي كده، هو مش حيمترن فوق، هو حينزل حاجته في  
شقتهم تاني، سلام.

وتخرج وتغلق الباب وتقف تلتقط أنفاسها وفي يدها الووكمان.

وينتهي اليوم الدراسي، وفي طريق الذهاب إلى البيت تمشي مُنى بجوار هبة  
ويتحدثن عن علاء، وتقول منى: عندك حق والله يا هبة، إيه الراجل ده؟! قمر  
شبه الهنود كده، ولا ريحة برفانه.

هبة: آه، بس ده في عالم تاني غير بتاعنا خالص، بيدرس برّه وعایش حياته،  
وأكيد له صاحبات أجنب، تصدّقي إنه مايسمعش ولا كلمة عربي، وكل الأغاني  
الي بيحبها أجنبية.

مُنَى: ههه، يا بخت اللي حتتجوّزه.

هبة: شوقتي جابلي إيه بدل التسجيل اللي اتكسر!

مُنَى: بس مامتك بقت صعبة أوي يا هبة، هي بتتعامل معاكي على طول كده؟

هبة: أمي في آخر سنتين اتغيرت خالص، كل أما أكبر يكبر خوفها وتوترها وقلقها، وما بقتش فهمها، مرة أحسّ إنها بتخاف عليّا من كل الناس.. أبيه علاء.. عم صابر البقال، حتى هيما بتاع الفول، ومرة تانية أحسّ إنها محسّساني بإني مصيبة... قبله موقوته، ونفسها تجوّزي النهاردة قبل بُكرة بحجة الست، مش فارقة بقى أكملّ تعليمي ما أكملّش، المهم أتجوّز أي حد وترتاح منّي، تخيّلني كنت بحس وأنا في إعدادي إنها مش عايزاني أدخل ثانوية عامة، وكانت عايزاني أدخل دبلوم عشان أخلّص بسرعة وتجوّزني، بلا جامعة بلا بتاع.

مُنَى: هههه، زي أمي ومقولتها المشهورة «مسيرنا للبيت والجواز» ده أنا لولا بابا معايا وبيدافع عني كان زماني قاعدة في البيت من الإعدادية.

هبة: يا بختك، عندك اللي يدافع عنك، أما أنا بقى بحارب في الدنيا دي لوحدي، ومحدّش قادر يفهمني.

ويستمرّ في الحديث وهما في طريقهما للبيت، وعلى أول الشارع يظهر شاب في العقد الثالث من العمر أسمر اللون يرتدي بنطلون جينز وتيشرت، وينظر لهما ويقول: نهازه أبيض.

هبة تقول لمُنَى: يا سالتتر، أما الواد ده دمّه ثقيل بشكل.

مُنَى: آه.. عيل طابش فرحان بالعربيات اللي أبوه موقّفها في المعرض وكل يوم مع بتّ شكل.

هبة: انتي عارفاه ولا إيه؟

مُنَى: أيوه، أبويا شاري عربية وموقّفها عندهم في المعرض للإيجار، وساعات بينزل يقعد مع أبوه في المعرض ويبجي يحكّلنا عليه، وحيد أبوه ومتدلّع أوي، وفيه ناس بتقول بيشر مخرات، وفيه ناس بتقول ساقط في الجامعة في سنة أولى كام سنة.

هبة: ربنا يهديه.

تودّعها منى على أول الشارع متجهة إلى بيتها، وتستكمل هبة مشوارها وتصل إلى المنزل، ولكن تمر على أمها في المحل.

هبة: سلام عليكموا يا ماما.

أم هبة: أهلاً أهلاً بست البنات.

هبة: ست البنات! دا إيه الكرم دا كله؟!

أم هبة: أمّا أنا بقى كنت في العتبة النهاردة وجبت شوية قمصان نوم وبضاعه للمحل تجنّن، طلعتها فوق عشان تختاري منهم.

هبة بتعجب: أختار؟! أختار منهم ليه؟ هو أنا حلبس قمصان نوم ليه؟

أم هبة: ليه؟! انتي نسيتي إنك كبرتي وداخلة على جواز ولازم أجهزك، أنا بقى كل أمّا هنزل أشتري بضاعة انتي اختاريلك كده كام حاجة حتلاقي جهازك خالص.

هبة: يا ماما يا حبيبتي، ممكن ترتاحي وتريحيني، أنا فاضلي شهر واحد على الامتحانات، وعايزة أدخل الجامعة واشتغل مذيعة، يعني الجواز ده بيعبيد خالص عن أفكاري حاليًا، ريحي نفسك بقى وارحميني من السيرة دي.

أم هبة: جامعة ومذيعة! ليه؟ حتتجوّزي عندك ٩٠ سنة؟!

تقوم هبة من على الكرسي وتقول: مفيش فايده، أنا طالعة أنام، عندي درس الساعة ٥، ماتنسيش تصخّيني الساعة ٤.

وتخرج من المحل مندفعة، تدخل للبيت... تقابل أم علاء...

أم علاء: صباح الخير، مالك يا بوبة؟

هبة: مفيش يا طنط، صباح النور، بس ماما حتجنّني.

تصعد هبة لأعلى، وتدخل أم علاء لأم هبة في المحل...

أم علاء: صباح الخير يا حبيبتي.

أم هبة: يسعدلي صباحك، تعالي يلاً نفطر سوا.

أم علاء: لا ألف هنّا سبقتكِ، ما انتي عرفاني أصليّ الفجر وأقعد أقرأ القرآن، وكبيري الساعه ٩ أكون مخلصّة الشقة والفطار وكل حاجة، وعشان علاء كمان اتعود في بلاد برة يصحى بدري، بيصحى من الساعة ٧، قوليلي بقى.. البت هبة كانت بتجري ليه؟

أم هبة: مغلباني يا اختي، كل أمّا أجيلها سيرة الجواز تنتطّط وتقول لي أنا عايضة أدخل جامعة.

أم علاء: ياختي جواز إيه البت لسة صغيرة، إمّال أنا أعمل إيه وأقول إيه في ابني اللي عدّى التلاتين ومُضرب عن الجواز.

أم هبة: هو راجع تاني بلاد برة؟

أم علاء: آه، على شهر ١٠ كده، بس مش ألمانيا المرّة دي، لا، دا خالة الحاج إبراهيم، مانتي عارفاه، بيشتغل في الخليج مقاول كبير، جابله عقد عمل بشهادته، محاسب يعني في شركة كبيرة ومرتب كبير.

أم هبة: طيب ما تسألني يا اختي ليكون متجوّز ولا يعرف خوجاية واكله عقله ومكسوف يقول لك.

أم علاء: هيبح، تفتكري؟! بس لأ، علاء ما بيخيش عني حاجة، لو فيه حاجة كان قال لي، هو بس سافر بعد جامعته على طول، والتمرين والجودو اللي بيلعبه ده واخذ تفكيره، وماشافش بنات هنا، ماتيجي ندورله على عروسة.

أم هبة: وماله يا اختي ندور، ده أنا بيجيلي هنا أشكال وألوان يشتروا مني جهازهم، شوفيلي انتي بس مواصفات إيه اللي بيحبها وعنيّا له. ويستكملا حديثهما.

ويمر الوقت والأيام، وتأتي بداية موسم الامتحانات، ويتبقى ١٠ أيام على امتحانات الثانوية العامة.

ويأتي لهبة كل يوم علاء وأخواته بالتناوب؛ للمراجعة معها، وفي يوم كان علاء موجود لمراجعة المواد الحسابية بحكم دراسته تجارة.

ويجلس علاء على تراييزة السُّفرة وبجواره هبة ويشرح لها مواد حسابية،  
ومنها إلى مادة الإنجليزي، بينما تجلس أم هبة أمامهم في الأنتريه.

تقول هبة: ثواني حدخل أجيب كتاب الإنجليزي من جوّه وآجي.

وتذهب هبة لحجرتها.

تقول أم هبة: معلش يا علاء يا حبيبي تاغيبك معانا انت واخوانك.

علاء: لا يا أم هبة، دي هبة دي أختنا الصغيرة، ومنال وأميرة بيحبوها،  
وماتنيسش إنها مولودة على إيدي، وانا متفق مع منال كل يوم تعدّي عليها  
تراجعلها العربي، ما انتي عارفة هي مُدرّسة، وأميرة كمان تراجعلها باقي المواد.  
أم هبة: ربنا يكرمكوا يابني وأفرح بيك وبعيالك ياارب، أما أقوم أعملكوا  
ساندوتشين وكوبايتين شاي زمانكوا جُعتوا.

وتدخل أم هبة المطبخ، وتأتي هبة إلى علاء ومعها كتب الإنجليزي وبدخلها شريط  
كاست، وتضعه هبة أمام علاء وتقول له: خد ده يا أبيه بسرعة قبل ما ماما تيجي.

علاء: إيه ده؟

هبة وهي تضحك: ههششش، ماتودُّناش في داهية، دا شريط لهاني شاكِر جِبته  
وسمعتة وعجبنني، بس شيله قبل ما ماما تيجي، لو شافته حتخرب بيتي، تخيل دي  
مخبّية منّي كل الشرايط، حتى الووكمان الي انت جايبهولي لحد ما أخلص امتحانات.  
علاء وهو مبتسم يأخذ الشريط ويضعه في جيبيه، ويقول: بطلي يا بنت  
شقاوة، انتي في إيه ولأ في إيه، والله أمك معاها حق، داخله تجيبي الشريط ولأ  
الكتاب، يلاً ركّزي، شكلك لا حتدخلي إعلام ولا حتى معهد.

هبة: عيب عليك يا أبيه، دا انا تربيتك.

علاء: هههههه ماهي دي المصيبة.

ويستكملا ما يفعلانه.

وتنتهي الامتحانات ويأتي يوم ظهور النتيجة، وتقوم هبة مبكراً وتصعد للحمام

وتنزل تحضّر نفسها؛ لكي تذهب إلى المدرسة وتأتي بالنتيجة.

وتخرج هبة تقابل منى ويذهبا سوياً للمدرسة.

وفي طريق عودتهم وهم فرحين لنجاحهم يجلس ذلك الشاب على باب معرضه ويقول: الناجح يرفع إيداه، ها يا كتاكت عملتوا إيه؟

تنظر هبة ومُنَى في الأرض ولا يباليوا بما يقول.

وتتجه كل منهم إلى بيتها، وتدخل هبة إلى المنزل وتصد السلم بسرعة، وتطرق الباب بطرقات سريعة، تفتح أم هبة الباب وكانت أم علاء معها بالداخل، وتقول هبة: نجحت يا ماما، نجحت يا طنط نجججججت.

تزرط أم علاء وأم هبة.

يجلس علاء في شرفة غرفته في أعلى، يسمع صوت زغاريد متكرر في المنزل والشارع، ينتبه أن اليوم إعلان النتيجة، يقف متوجّهاً لباب شقتهم منه إلى شقه هبة، وينزل مسرعاً يجد الباب مفتوحاً، يدخل ويقول: ها عملتي إيه؟ طمنيبي. هبة: أنا نجحت يا أبيه... نجحت.

علاء: مش مهم النجاح، أهم حاجة المجموع.

هبة: ٩٧ في ١٠٠.

علاء: والله برافو عليكي، هي دي هبة بنوّتي، استني بقى، دا أنا مجهزلك هدية نجاحك من بدري.

ويصعد إلى أعلى وينزل مسرعاً معه كرتونة بها جهاز تسجيل كبير وجديد، ويقول: يلاً يا ستي، هدية نجاحك بقى.

هبة تأخذ الكرتونة من يده وتدور بها من شدة فرحها وتضعها على السفارة، وتقول: تعالى ورّيني بيشتغل إزاي.

وفي تلك اللحظة تأتي منال وأميرة أخوات علاء لكي يطمئنوا على نتيجة هبة معهم أطفالهم، ويجلسوا جميعاً في فرح وسعادة لهبة.

هبة وعلاء واقفين بجوار السفرة يجربا التسجيل.

ينظر علاء على الجميع يجدهم مشغولين بالحديث مع بعضهم البعض، يخرج من جيبه شريط كاست ويقول: خدي يا ستي، دا آخر شريط نزل لهاني شاكر.

تأخذه هبة وتقول: الله... دا أنا كنت لسة حشتره.

وينتهي اليوم من مباركات، وتأتي خالة هبة أم إبراهيم ومعها أولادها؛ إبراهيم الذي يكبر هبة بعامين، وأخته رشا التي تصغر هبة بعامين، ويجلسوا جميعًا يتناولون وجبة العشاء.

أم إبراهيم: مبروك يا هبة، عقبال ما نفرح بيكي قريب يا ارب يا عروسة ابني. هبة تنظر لأمها ثم لأختها، وتقول أم هبة: إيه يا حاجة الكلام ده، كده كسفتي البت. ينظر إبراهيم لهبة وهو يبتسم ويقول بلهجة ريفية: إمال احنا جايين ليه يا خالتي، ما عشان كده... نخطبها، هي مش خلصت تعليم خلاص؟

تنظر هبة لهم جميعًا، وتضع من يدها لقمة الخبز وتقول: عن إذنكوا.. أنا كلت، تصبحوا على خير.

أم إبراهيم: هههه شوفوا يا ولاد البت اتكسفت إزاي ههههه.

أم هبة: إيه يا جماعة الكلام ده؟ وهو أنا آخر من يعلم.

وقاموا من على السفرة.

تقول أم إبراهيم: قومي يا رشا لمي الأكل واعملي لنا كوبايتين شاي ليا أنا وخالتي وأخوي وهاتيهم لنا في الأنتريه.

ويذهبوا ليجلسوا ويتحدثوا.

وفي الصباح تستيقظ هبة، تجد رشا بنت خالتها تنام بجوارها، تخرج من حجرتها تجد إبراهيم ممددًا على الأرض في الأنتريه، تدخل الحمام دون حدوث صوت؛ كي لا يستيقظ أحد.

تخرج وتنظر على غرفة أمها، تجدها مستغرقة في النوم هي وخالتها بجوارها،

تدخل على شرفة غرفتها وتجلس فيها، وتضع في أذنيها سماعات الووكمان.  
وبعد دقائق تنتبه على ابن خالتها يدخل عليها الشرفة، تخلع السماعة من  
أذنيها وتقول: صباح الخير يا إبراهيم.

إبراهيم: صباح الخير يا بنت خالتي.

هبة: اقعد.

إبراهيم: تشكري.

ويجلس إبراهيم ويمسك بيده السيارة، وينظر لهبة ويصمت.

تقول هبة: تحب أعمل تفرط أو شاي على ما يصحوا.

وتقف متجهة إلى الداخل، يمسك يدها إبراهيم ويقول: لا يا بنت خالتي  
ماتتعبيش نفسك، اقعدي عايزك في كلمتين.

تسحب هبة يدها من يده وتجلس وتقول: خير؟

إبراهيم: انتي امبارح لما سمعتي سيرة الجواز اتكرهيتي يعني وقومتني، ممكن  
أعرف ده رفض ولا كسوف؟

هبة: بص يا إبراهيم... احنا طول عمرنا زي الاخوات، نتقابل في الأعياد..  
المناسبات... نلعب نهزر، لكن موضوع الجواز ده بعيد عن خيالي خالص، ولو  
فكرت فيه مش حتبقى انت يا إبراهيم.

إبراهيم: يعني انتي رافضة المبدأ ولا رفضاني أنا بالذات؟

هبة: الاتين.

ينظر لها إبراهيم في تعجب.

تقول له: أولاً أنا ما بفرش في الجواز دلوقتي، أنا نفسي أدخل الجامعة وأكمل  
تعليمي وأشتغل مديعة، وانت يا إبراهيم معاك دبلوم، أنا حَددت على عيشة  
المدينة، انت عايش في الأرياف، مش بقلل منك يا ابن خالتي، بس كل واحد  
اتربّي بأسلوبه وطريقته وله حلمه، انت حترض بعد ما نتجوز أكمل، أو حتى

أشتغل، أكيد لأ... يبقى حنختلف كثير، وممكن نتجوز وجوازنا يفشل ونخسر بعض، يبقى ليه بقى؟ خليك في الدنيا أخويا وجنبي وإبعد موضوع الجواز ده خالص من حياتنا، ممكن؟

يقف إبراهيم ويقول: ماشي يا بنت خالتي، براحتك.

وهو غاضب من رد هبة، ولكن في هذه اللحظة يرى هبة تقف وعينها على علاء جارهم في الأسفل وهو يمسح سيارته مستعداً للخروج، وهي شاردة لامعة العين، ينادي عليها ولم تجبه، يخيّب على كتفها: إبييه... روحتي فين؟

هبة: إيه؟! آه، أنا معاك يا إبراهيم أهو، حروح فين!

إبراهيم: لا... انتي معايا فين بقى؟ دا انتي طلعتي بلاد برّة وجيتي.

وينظر إلى الأسفل وإليها ويقول: عامّة أنا فهمت كل حاجة يا بنت خالتي، وربنا يوقفك.

ويتجه إلى الداخل، يمر بالسريّر الذي تنام عليه أخته ينادي: يلاً بينا يا رشا قومي، اصحي خلينا نرجع في أول قطر.

تدخل هبة وراءه وهي متذمرة من أفعاله وكلامه، وتقول له: وطّي صوتك ماتصحيحهمش، سييهم نايمين.

إبراهيم يقف في صالة البيت وينادي: يا أمّا.. يا رشا، يلا يا اخوانا خلّونا نرجع نشوف مصالحنا وأكل عيشنا.

يستيقظ البيت كله على صوته.

وتقول أمه: إيه يا ضاينا مستعجل ليه؟! احنا لسة عملنا حاجة ولا اتكلمنا حتى؟ وكويس هبة صاحية أهى عشان ناخذ رأيها.

إبراهيم: مالوش لازمة الكلام ده يا أمّا، يلاً خلّينا نلحج أول قطر نروّج، أنا سألت بنت خالتي وعرفت رأيها خلاص، وربنا يوفّقها في حياتها ويرزقها بابن الحلال اللي يلفّقها بلاد برّة؛ لأن بلاد جوّه مش قَدّ المقام.



هبة: يارب يا أبله، أنا كتبت إعلام القاهرة رغبة أول، وعين شمس رغبة تانية، وإن شاء الله أقبل في القاهرة، دا حلم حياتي.

أميرة: إن شاء الله يا حبيبتني، أنا حقوم أمشي بقى أنا، والصبح الساعة ٩ حفوت عليكي، أبيه علاء حيكون معنا، حيروح يخلّص ورق سفره، وأنا حطلع من الشغل ساعة بدري ونروح سوا التنسيق.

هبة: ماشي يا أبله، حسنتاكي من بدري.

أميرة: يلاً سلام، سلام يا أم هبة، وإن شاء الله لو هبة قبّلت في الجامعة اللي نفسها فيها ليها عندي طقم خروج يجنن للجامعة هدية.

هبة: ربنا يخليكي ليّا يا أحلى أبله في الدنيا.

ويأتي ثاني يوم، وتستيقظ هبة من نومها وتحضّر نفسها ليومها الذي يبدأ بكل ما تتمناه... من تقديم ورق الجامعة التي تحلم بها، ومن مقابلتها بعلاء بعيداً عن البيت والأسرة.

وتذهب لـحجرة أمها وتصبّح عليها، وتقول لها: ادعيلي يا ست الكل.

وتسمع طرق الباب وصوت علاء يقول: يلاً يا هبة، أنا حطّط العربية من الجراج واستناكي، وأميرة وصلت تحت.

هبة: حاضر يا أبيه، أنا نازلة أهو، يلاً يا ماما سلام.

وتنزل هبة مسرعة وراء علاء، وتركب في السيارة من الخلف، وتركب أميرة بجوار أخيها ويذهبوا جميعاً لمكان عمل أميرة كمهندسة في إحدى القطاعات الحكومية.

وتقول: أنا حنزل يا أبيه أعمل إذن أو أجازة اللي أعرف أعمله، وحجّلوكوا على طول، كده كده الجوازات مش بتفتح قبل ٩، والتنسيق قاعد ل ٤، وأنا مش حتأخر. وتذهب أميرة لمكان عملها.

وينظر علاء يميناً ويساراً يرى مقهى على الجانب الآخر، وعربة فول بجوارها.

فيقول: كلتي على عربية فول قبل كده؟



هبة: تفتكر أنا ماحاولتش، حاولت كثير ومعرفتش أوصل لحاجة، عنوانه ومعايا، وبعثله جوابات كثير وهو مارْدَش.

علاء: ما يمكن ما استلمهمش.

هبة: كانوا رجعوا، لكن هو أكيد استلمهم، أو حد بيستلمهم عنه.

علاء: إن شاء الله عن قريب يجي ويرجع.

هبة دموعها تنزل على خديها وتقول: تفتكر؟

علاء يمد يده يمسح لها دموعها، ويقول: ليه العياط بقى؟! هو البصل أثار ولا إيه؟

تبتسم هبة وتمسك بمنديلها وتمسح دموعها، ويستمر علاء في الحديث معها في أشياء مضحكة وبعض المغامرات التي مرّت عليه في السفر كي يخرجها من حزنها على فراق أبيها.

ينظر على الجانب الآخر يجد أميرة ظهرت بجوار السيارة تلتفت يمينًا وشمالًا باحثة عنهما، فيقول علاء: يلاً يا هبة أميرة جات.

ويقفا ويحاسب علاء القهوجي، ويتجها إلى السيارة، ويكتمل يومهما وينجزوا ما كانوا ذاهبين له.

وأيام وتظهر نتيجة التنسيق، وتُقبَل هبة في جامعة القاهرة كلية إعلام.

وتحصّر حاجتها وتشتري لها أميرة ملابس الجامعة الجديدة، وفي أول يوم تصعد هبة إلى السطوح كعادتها، فتجد علاء في انتظارها ويجلس في حجرة الحمام ويضع لهم الطعام بيده.

تندهش هبة وتبتسم لما تراه، وتطرق على باب غرفة الحمام وتقول: بتعمل إيه هنا؟!

علاء: أهلاً بالآنسة اللي رايحة الجامعة، وإيه الشياكة دي؟ لا لا ما أقدرش على كده، وبعدين خلّي بالك دي جامعة مش مدرسة، يعني حتلاقي خدامين اللطافة كثير وعيال مسبسة شعرها وملزّفاه، نروح نحضر محاضراتنا ونيجي على طول، مش عايز مياصة وتهريج مع حد.

هبة تنظر له نظرة حب، وتقول: دي غيرة بقى.

علاء يقف من مكانه مستغرب الكلمة، ويقول: غيرة! غيرة 'يه يا بنتي، انتي زي أختي وأنا بنصحك.

هبة: يووه.. انت مازهقتش؟ زي أختي... زي أختي، أدبك بتقول زي أختك، يعني مش أختك.

علاء يخرج من باب غرفة الحمام متجهًا إلى سور السطوح، ويسند يده عليه ويعطي لهبة ظهره خائفًا من مواجهتها مستنكرًا ما يشعر به تجاهها.

وتقف هبة بجواره، وتقول له: حتفضل تكابر مشاعرك وتداري لمعة عينك لحد امتى؟ أرجوك اتكلم معايا، كدّ بني طيب، اللي حاسة بيه من ناحيتك من زمان من وأنا لسة في اللفة كثير وكبير، ومتأكدة منه ١٠٠ في ١٠٠، لكن انت مرّة أحسّ إنك بتحبّني بجد وتبغّر عليّ، ومرّة بتحبّني زي أختك فعلاً، ومرّة تانية مش طايقني ولا طايق حتى تسلّم عليّ.

وتنزل دموع هبة مع كلامها المحبوس في صدرها لما تشعر به في هذه اللحظة.

وتستكمل وتقول: قول لي أنا أبقى إيه بالنسبة لك؟ بجد أختك ولا بنتك ولا حبيبتك؟! قول لي سببي الجامعة اللي بتحلمي بيها، وتعالى نتجوز واخدك وأطير وأنا حبقى من إيدك دي لإيدك دي.

وقد يدها تمسك بيده، يسحب علاء يده بسرعة، ويقول بصوت حاد: مش حينفع اللي حاسس بيه ده، مش حينفع اللي بتفكري فيه ده، مش حينفع أنا أبيه... أبيه اللي شيلتك على درعاتي وانتى لسة في اللفة، كنت بخدك على رجلي وألاعبك وأجيبلك مصاص، فوقى واعرني حدودك وفوقى من الوهم ومرحلة المراهقة دي، انتى بتحبيني أو حاسة بده؛ لأن أبوكي مش في حياتك، يعني معتبراني زيّه أو في مقامه. هبة تقطع عليه الحديث: فوق انت، أيوة فوق انت، إوعى تكون مفكرني هبله وصغيرة مابحسش بلمعة عينك لما تشوفني، ولا بسمع دقات قلبك لما نكون في مكان واحد، ولا بحس برعشة إيدك لما تسلّم عليّ أو تططب على

كتفي، إوعى تفتكر إني مصدقة، ولا انت تصدق نفسك بإني في عينك لسة هبة  
الطفلة أم بامبرز ومصاصة، بس على الأقل أنا مواجهة نفسي وعارفة كويس أنا  
عايزة إيه، لكن انت بتغالط نفسك عشان الشكل الاجتماعي ومظهرك قدام الناس  
الي حيقولوا مرتبط بعيلة من دور إخواته الصغيرين، للأسف.. رغم إنك سافرت  
وعشت برة بس لسة دماغك مرهونة بفكر المجتمع العقيم.

علاء: يا هبة افهميني... الي احنا فيه ده وهم، وهم ولازم نفوق منه، أنا ما  
أقدرش أواجه أمي وأمك والمجتمع وأضرب بالناس دي كلها عرض الحائط وأقول  
لهم أنا بحب عيلة صغيرة من دور عيالي وحررتبط بيها، ما أقدرش.

هبة: احكم على نفسك بس بإنه وهم؛ لأن الي جوايا مش وهم، الي جوايا  
حب... حب صادق، وزى ما زرعته جوايا حعرف كويس أشيله من قلبي، ومن  
اللحظة دي انت أبيه علاء جارنا وبس.

وتلتفت هبة ناحية السلم في طريقها وهي تبكي، وعند مدخل السلم تجد  
أمها واقفة تسمع حوارهما، وتخبط فيها دون شعور وتتركها وتنزل إلى الأسفل.  
وتدخل أم هبة إلى علاء الذي يقف أمام سور السطوح شاردًا لما قالت هبة،  
ويتنبه علي يد تلمسه وتربت عليه من ظهره.

ويقول: أم هبة... أهلاً، أنا... أنا...

أم هبة: أنا عارفة، وسمعت الحوار الي بينكم.

علاء: صدقيني مفيش حاجة، انتي عارفة هبة متعلقة بيًا ازاي وهي في سن  
خطر، اتوهمت للحظة إنها ممكن تكون بتحبني، بس أنا فوّقتها؛ لأنه ماينعش.  
أم هبة: صدقني يا بني عارفة وسامعة، بس انت مافوّقتهاش هي، انت  
فوّقت نفسك.. واجهت نفسك بالحقيقة الي بتحاول من يوم مارجعت تداريها،  
فرق السن بينكوا كبير، وانت خايف من مواجهة الناس، صح؟ أنا حسالك سؤال  
واحد، عندك استعداد تخطب هبة؟

علاء: لا... أنا عايز واحدة عاقلة.. كاملة.. ناضجة.. قريبة من سني في التفكير،

صدقيني كل ده وهم، ومفيش له أساس من الصحة.

أم هبة: يبقى تبعد يا بني، تتجوز ما تتجوزش انت حر في حياتك، بس تبعد عن حياة بنتي اللي طلعت بيها من الدنيا، طول ما انت قدامها كده لا تحشوف حد ولا حتقبل بحد، وانت مايرضكش كده، أنا أمنية حياتي أطمئن عليها وأسترها قبل ما أموت، واحنا طول عمرنا جيران وأهل، وأمك حبييتي واخواتك بناتي، وانت ابني اللي ماجتتهوش، وطول عمرك واقف معانا أخ وابن وسند، اتجوز يا بني وشق طريقك وسيبها تشق طريقها.

وتتركه وتتجه إلى الأسفل لكي تطمئن على ابنتها، تجدها تقف أمام المرأة بكل صلابه وتجهز نفسها للجامعة؛ فهو أول يوم.

تقف أمها وتقول: أنا عارفة إنك....

وقبل أن تستكمل حديثها تقاطعها هبة وتقول: اعتبري نفسك ماسمعتيش حاجة، ولا كأن حاجة حصلت، ولو سمحتي مش عايزة أتكلّم في الموضوع ده خالص، انا من اللحظة دي جامعتي ودراستي ومستقبلي وبس.

وتخرج هبة من باب شقتها وتغلق الباب وراءها، وتنزل على السلم، في نفس الوقت ينزل علاء من على السطوح، تسمع هبة خطوات قدمه ويسمع علاء خطوات قدمها، ينظر كل منهما في اتجاه الثاني، ولكن لأول مرة النظرات تصبح نظرات مسروقة خوفاً من أن يرى أحدهما الآخر.

يدخل علاء إلى غرفته منها إلى شرفة الغرفة، وينظر إلى هبة وهي متجهة للجامعة وكأنه يودعها بعينه، وكأنها آخر مرة يراها فيها، ويلفت انتباهه أن هبة تقف وصوتها يعلو من بعيد.

ينزل مسرعاً متجهها إليها، يجدها تقف أمام معرض السيارات الذي يقع في أول الشارع، ويقف على بابه ذلك الشاب ويقول: هو حد كلمك؟!

يقف أمامه علاء ويقول: مالك ومالها؟

وينادي على هبة ويقول: عمل لك إيه؟

تقف هبة أمامه وتقول: بقاله فترة في الراحة والجاية يعاكس، والنهاردة اتجرأ ووقف قدامي بيوقفني.

علاء: طيب يلاً شوفي انتي رايحة فين.. يلاً.

ويضع يده على رأس ذلك الشاب من الخلف ويجذبه إلى الأمام في أكثر من حركة متتالية، وبصوت عالٍ: لو شوفت عينك اترفعت عليها تاني حزعلك.

يرد أشرف ذلك الشاب: وانت مالك بقى، من بقيت عليتها، دا انت حياًلاً جارهم زيك زيي.

يسمع الجيران صوتهم العالي، ويتدخل رجال الشارع ناهرين أشرف متأسفين لعلاء، وينهوا الخلاف، وينصرف كل منهم لمكانه.

ويدخل علاء شقته يجد أمه مستيقظة وفي انتظاره، وتقول له: كنت فين يا علاء؟ وإيه الزعيق اللي برّه ده؟ هو انت اللي كنت بتتخانق؟!

علاء: لا يا ماما مابتخانقش ولا حاجة، الواد اللي اسمه أشرف أبو الخير ده كان بيغلّس على هبة وهي نازلة الجامعة، ووقف قُدمها اعترض طريقها، فنزلت زعقتله.

أم علاء: يا لهوي! طيب الحمد لله إنها عدّت على خير، أمّا أنزل لأم هبة اشرب معاها الشاي وأطمّن عليهم.

علاء: لا بلاش.

أمه: لا ليه؟ حصل حاجة؟!

علاء: آه.. اقعدني أحكيك.

وتجلس وهي قلقه ويقصّ عليها ابنها ما حدث، وتقف منفزعة وتقول: إخص عليك يا علاء، كده يا ابني، دا أنا بقالى ٢٢ سنة جيران مازعلناش من بعض أنا وأم هبة، حتيجي انت على آخر الزمن وتزعلنا؟!

علاء: أزعلكوا ليه بس يا ماما؟ دا سوء تفاهم وخلص خلاص، وماحصلش حاجة.

في هذه اللحظة يطرق الباب، وتقول أم علاء: دول أكيد إخوانك جاينلي زي ما اتفقوا معايا امبارح، كويس إنهم جُم عشان يشاركونا الكلام.

وتذهب لتفتح لهم الباب، وتقول لهم دون ترحيب: تعالوا.. تعالوا اسمعوا من أخوكم اللي حصل.

يقول علاء: خلاص يا ماما مفيش داعي، قولت لك سوء تفاهم وخلص، وبعدين أنا خلاص حروح أستلم باسبوري وورقي النهاردة، يعني في خلال شهر بالكثير حكون مسافر.

ويدخل لحجرتة، وقبل أن يغلق الباب يقول وهو ينظر لأمه: كَلَمِي سلوى زميلة منال العروسة اللي كلمتوني عنها امبارح وخذوا منها ميعاد يلاً عشان أخلص كل الإجراءات قبل ما أسافر.

تنظر أم علاء وأخوته لبعضهم البعض.

وتقول: معقوووول؟!!

تقول منال: هو فيه إيه؟! انتي فاهمة حاجة يا أميرة؟

تقول أميرة وهي تنظر في دهشة: والله ما فاهمة حاجة.

تقول أم علاء: هو ده وقته منك ليها؟ يلا خدي لنا معاد من العروسة بسرعة.

تجلس منال وأمها بجوار التليفون ويقوموا بالاتصال بأهل العروسة.

بينما تذهب أميرة إلى علاء وتقول له: هو فيه إيه يا أبيه؟

علاء: اقعدِي يا أميرة.

ويحكي لها ما حدث.

وتقول أميرة: واللي انت بتعمله ده حل؟ صحيح أنا مش برجح إنك تتجوّز هبة، بس برضه مش مع إنك تتجوّز سلوى وانت مابتجبهاش ولا تعرفها، وفي أقل من شهر؟! المدة اللي انت قاعدها لازم تكون كتبت كتاب وجهّزت حالك عشان تعمل لها ورقها، مش انت يا أبيه اللي تتجوّز جواز صالونات عشان تهرب من مشكلة.

وينقطع حديثهما بعد سماع صوت زغاريد أمه وأخته منال.

علاء: خلاص يا أميرة، انتي مش شايفة فرحة أمك عشان حتجوز، ومادام معرفش ولا واحدة من اللي بيتعرضوا عليا يبقى سلوى زي هالة زي منى، كله واحد، يلا قومي نشوف أمك عملت إيه، وماتقلقيش على أخوي... أخوي جدع. وتستمر أم علاء في الزغاريد.

وتسمع أم هبة الصوت وتصعد لهم، وتقول: خير يا اختي؟ فرحينا معاكي.

تقول أم علاء: رايحة أخطب النهاردة لعلاء يا أم هبة عقبال بنتك.

تسعد أم هبة لخبر علاء وبدخلها تنفَس الصعداء.

وتأتي هبة من يوم دراستها الأول بالجامعة، وتقف مع أمها في المحل وتروي لها ما حدث طيلة اليوم، وتنتبه على صوت علاء وإخوته وأمه يقترَب.

وتجد علاء دون أن ينظر ناحيتها، يقف ويفتح باب الجراج ليستخرج سيارته، وتتجه نحوها أميرة ومنال وأمهما لكي يسلموا عليها ويطمئنوا عليها في أول يوم دراسة.

عندما تراهم أم هبة تزغرد، وتقول: يا ألف نهار أبيض وألف نهار مبروك.

تنتبه هبة وتقول: فيه إيه يا جماعة، انتي بتزغرطي ليه يا ماما؟

تقول أم علاء: عقبالك يا حبيبتي رايحين نخطب لعلاء دلوقتي.

هبة تنظر له وتقول: ألف مبروك، ربنا يتمم على خير.

تقف أميرة بجوار هبة وتشعر بما يحدث ويدور في داخلها، وتربت على كتفها وتوشوشها وتقول: ابقِي عدي عليا نتكلم شوية.

تخبط هبة على يد أميرة وهي تمسكها: ماتقلقيش يا أبله، أنا كويسة، وعنيّا.. حجيلك حاضر.

وينصرفوا في طريقهم.

وتصعد هبة إلى شقتها وتضع آخر شريط أتى به علاء لها لهاني شاكر في التسجيل، وتجلس في شرفة منزلها وتستمع لأغنية (أنا مش بعتب عليك)

وإمر الوقت وهبة في مكانها وتبدل من شريط لآخر، وتلمح سيارة علاء تقترب فلا تهتم لشأنه وتجلس كما هي واضعة رأسها بين يديها على سور الشرفة. ويلفت انتباهه علاء أنها تجلس ولا تهتم لهم، ويصعد إلى شقته، وهو يمر من أمام شقتها يسمع صوت هاني شاكر.

يذهب إلى حجرته ومنها إلى الشرفة، ويجلس يستمع إلى الأغاني...

(وكان في رسالة منتظرها)

ولكن من باب الصدفة يظهر صوت هاني شاكر وهو يغني أغنية (نسيانك صعب أكيد)

ويستمع لها علاء، ويلفت انتباهه الكلمات التي يعتقد أن هبة موجهة إياها له عن عمد، ولا يعلم أن القدر يريد اللعب معهما.

في صباح اليوم التالي تستيقظ هبة على صوت أم علاء تتحدث مع أمها في الصالون، تنتبه هبة لما يدور من حوار دون أن يشعر بها أحد.

وتعلم من الحديث أنه تم الاتفاق على الخطوبة في نهاية الأسبوع، وقبل سفر علاء ب ٣ أيام يتم كتب الكتاب والشبكة، ويسافر علاء إلى عمله نهاية شهر أكتوبر أو منتصف نوفمبر يستلم شغله الجديد، وزوجته تسافر بعده بعد استكمال أوراقها، وتصعد هبة إلى الحمام كعادتها.

ولكن هذه المرة أصبحت غية الحمام غيتها وعالمها الذي تهرب إليه، اعتادت هبة أن تكتب، وأخذت المسجل الخاص بها نقلته للأعلى في تلك الغرفة الخاصة بها، وتستمر بالساعات في عالمها الخاص ما بين الحمام والورقة والقلم، وهاني شاكر...

الكل يعلم بما في داخلها، ولكن الكل يتجاهل حتى النظر في عينيها ولا يعلمون أنهم مخطئون.

أيام قليلة على خطوبة علاء وهو وهبة كل منها يتجنب الآخر، حتى إذا تقابلا على سلم المنزل بالصدفة، إلى أن يأتي يوم ما قبل الخطوبة حوالي الساعة ٧ مساءً.

ذهبت أم هبة مع أم علاء وأخوته لشراء بعض المستلزمات الخاصة بتجهيزات الخطوبة؛ كالملبس والشيكوالات وما شابه ذلك بعد أن رفضت هبة الذهاب معهم بحجة المذاكرة.

وتجلس هبة في حجرتها على مكتبها بجوار الشرفة، والضوء خافت عدا أباجور للمذاكرة موجود على المكتب.

ومسك هبة بقلمها وتنظر للكتاب وهي شاردة الذهن، كيف لها أن ترى حبيبها في يد فتاة أخرى، وهل هي تستطيع بالفعل الذهاب إلى الفرح أم ستمتنع؟! وتقف هبة حائرة في أمرها، تذهب هنا وهناك في غرفتها، وتخرج من شرودها فجأة بعد أن تسمع صوت هاني شاكر يأتي من غرفة علاء التي فوق غرفتها تمامًا، فيلفت انتباهها كلمات أغنية (ارجعيلي).

(أيوة سبتك غصب عني، القدر كان أقوى مني

بس وحياتك ماخنتش، غلطي إني ماقولتش

عن سبب بعدي ورحيلي لما كنتي بتندهيلي

ارجعيلي

انتي أول حب عشته... انتي آخر حُب عيشته

أحلى حلم فيوم حلمته... صدقيني وارجعيلي)

تسقط دموع هبة دون أن تشعر، وتذهب بهدوء للشرفة دون أن يشعر بها علاء لاستكمال باقي الأغنية التي تعتقد أن كلماتها موجهة إليها.

وفجأة يصمت صوت الكاسيت، وتسمع صوت علاء يقول: إيه يا محمد بس اللي خلّاك تشغّل الكاسيت؟

محمد صديق علاء: إيه يا عم مالك؟ مش عريس وكده، أنا قولت بقى أغاني وفرح وكده، بس إيه الأغنية الجامدة دي، استتّي بس حنكملها.

علاء: لا يا محمد، لو سمحت شغّل حاجه تانية لو عايز تسمع هاني شاكر،

لا ولا أقول لك ماتشغلش حاجة خالص.

ويقف علاء من جلوسه في الشرفة ينظر للأسفل لكي يرى هل هبة انتبهت  
لصوت الأغنية أم لا، ولكنه لم يستطع أن يراها.

تجلس هبة على ركبتيها على الأرض أمام الشرفة من الداخل، تبكي على ماهي  
فيه بعد أن تأكدت أن القدر يلعب بمشاعرها، وظنت أن علاء تعمد أن يُسمعها  
هذه الأغنية، ولكن تردّ له هبة الأغنية متعمدة.

وتذهب إلى المكتب وتضع فيه أحد شرائط هاني شاعر على أغنية (تخسري).

وينتبه علاء ومحمد على صوت أغنية تخسري وكلماتها..

(تخسري وأنا حبتدي أكتب السطر الأخير، سيبي قلبي وابعدي وحدي مش  
حخسر كثير، إنما انتي حتخسري.. تخسري حبي الحقيقي، ابعدي لو تقدري.. عن  
هوإيا وعن طريقي

آه آآآه تخسري، أه راهنت عليكي بالعمر الجميل، إن بُعدك عني أكبر  
مستحيل)

ويقول محمد: هو إيه حكاية هاني شاعر في الشارع ده؟!

علاء: ههشش وطّي صوتك يا أخي.

محمد: ليه؟! هو هاني شاعر ساكن جنبك وحيسمعنا ولا إيه؟

علاء: ههههه، والله انت فايق ورايق.

محمد: وانت ماتفوقش ليه إن شاء الله؟ بذمتك دا منظر عريس، دقنك  
طويلة ومكتتب وحالتك حالة، زي ما يكون بُكرة جنازة مش خطوبة.

علاء: يوووو يا محمد، وطّي صوتك بقى، وعاييز تتكلم تعالي نتكلم جوّة،  
بلاش في البلكونة.

محمد: والله يا بني ما انا فاهم حاجة، أنا ماشي يا عم وخليك كده في  
نكدك ده، أشوفك بُكرة يا عريس.

ويتركه ويذهب، ويستكمل علاء كلمات الأغنية.

وتنتبه هبة علي صوت طرقات قوية على باب الشقة؛ فتندesh هبة؛ لأنها تعلم أن أمها معها مفتاح، فتجري مسرعة بعد أن تغلق الكاسيت لكي تفتح الباب، تجد أم علاء ومنال أخته يسندوا أمها؛ فتنزع هبة وتقول: ماما... مالك حصل إيه؟! فيه إيه يا طنط؟ فيه إيه يا أبله!؟

تقول أم علاء: مفيش حاجة يا حبيبتى ما تقلقش، هي داخت مننا شوية في الشارع بس، واحنا طلعاها.

ويجلسوا بها على أقرب كرسي، تجري هبة تأتي بكوب من الماء من المطبخ، وترجع تجد علاء نزل من شقته ويقول لأمه: أنا شوفتكوا من فوق اتخضيت نزلت جري.

تقف هبة تقدّم رجلاً وتؤخر الأخرى؛ فمهما هربت من مقابلة علاء فهم يعيشون في مكان واحد، ومستحيل أن يحدث هذا الهروب بحكم الجيرة والعشرة. وتتقدم ببطء ويدها ترتعش، وتقدم لأمها الماء وتسندها إلى حجرتها، وتخرج إلى علاء ومن معه، وتقول لأم علاء: هو حصل إيه يا طنط؟

وتحكي لها ما حدث، يقول علاء: طيب ما نبعث نجيلها دكتور ولا نوذيها لمستشفى ولا حاجة.

ترد هبة بعصبية: شكرًا، مش عايزين حاجة من حد.

يقف علاء في مكانه ويقول: أنا سايبك تتدلعي وبقول معلش سيبها تتدلح، لكن توصل إنك تنسي أنا أبقى إيه ليكي ولوالدتك وللبيت ده يبقى كده كثير، أنا أبيه علاء وحفضل أبيه علاء، أخوي الكبير اللي مربّيكي، حتى لو انتي رافضة ده، وأمك دي أمي وأختي، ولا يمكن أتخلي عنها عشان خاطر بنتها طايشة.

ويتركهم جميعًا ويخرج من باب الشقة متوجّهًا إلى شقتهم، ويغلق الباب بحدة؛ مما يفزع هبة من مكانها.

تقول أم علاء: ليه كده يا هبة؟ انتي بقيتي تعاملي أبيهك علاء كده ليه!؟

تقول أميرة: خلاص يا ماما مش وقته، بعدين نتكلم في الموضوع ده، قومي يلاً انتي ومنال اطمّني على الست اللي لوحدها جوّة دي، وخلوا هبة معايا شوية. تجلس هبة مكانها، تسقط من عينها دموع في صمت، تأخذها أميرة من يدها وتقول لها: قومي يا حبيبتى نتكلم مع بعض شويّة... قومي. وتسحبها رغماً عنها علي حجرة هبة، يدخلوا إلى الغرفة ويجلسا على السرير أمام بعضهما البعض.

أميرة: أنا ملاحظة عليكى دائماً حزينة وشاردة، ومابقتيش تطلعي زي الأول ولا تقعدى معانا، وبقيتّى تتلاشي وجودنا، ليه كده يا هبة؟! هبة: أنا؟ لا والله يا أبله، مفيش..

قبل أن تستكمل حديثها تقطعها أميرة بقولها: من غير ما تحلفى، أنا عارفه انتي فيكى إيه، وحاسّة بيكى كويس، بس لازم تفصلي بين مشاعرك وطريقة تعاملك مع الناس، حتى لو كنتى انتي وعلاء مش بتتكلّموا ولّا زعلانين من بعض، ذنب أبله منال إيه، ولا ذنب طنط أم علاء إيه؟ وذنبى أنا كمان إيه، ماينفّش كده يا هبة، ومش من حقك أصلاً تزعلي من أبيه. وقبل أن تستكمل حديثها تندفع هبة في أحضانها وتبكي وتقول: أنا تعبانة أوي يا أبله.

أميرة تتحسّس شعرها وتقول: حاسّة بيكى يا حبيبتى من غير ما تقولي، بس تعالي نتكلم بالعقل من غير عياط، هي قفّلتك على نفسك وعياطك حيحلّ مشكلة؟ طبّعاً لا، بالعكس حيليكي تعندي وتتصرفي غلط دائماً، بصي للموضوع بشكل تاني، أنا عارفة إنك حاسّة تجاه علاء بمشاعر حب ممكن تكون صادقة، وممكن تكون مشاعر في سن تخبط، لكن ليه نخسره خالص؟ حتى لو خسرناه حبيب نحاول نكسبه زي الأول أخ وصديق وأب، علاء بالنسبة لينا، وأنا بقول لينا لأنك مننا... الثالثة بتاعتنا، سند وظهر، ماتنسيش إنه ربّاكي وشالك على إيدته، وممكن يكون ده السبب الرئيسي اللي خلاه يرفض الارتباط بيكي؛ إنه لسة شايفك

هبة الصغنة اللي بمامبرز ومصاصة، وكان كل همها تضحك عليه وتبوسه من خده عشان تعوضه روح، فاكرة.. فاكرة يا شقية؟ دا انتي جُنَّتينا.

ويضحكا وتنصت هبة لكلام أميرة وتفتتح به.

وتخرج هبة مع أميرة وهي تبتسم ويذهبا إلى غرفة أمها لكي تطمئن عليها، تجدها نائمة وتجلس بجانبها أم علاء ويظهر على وجهها القلق من شحوب لون أم هبة.

تهمس أميرة في أذن هبة وتقول: بدمتك لو لقيتني العالم تلاقي حد يبحبكوا ويخاف عليكوا كده؟

تبتسم هبة في وجه أميرة خجلاً من تصرفاتها، وينسحبوا واحدة تلو الأخرى من الغرفة تاركين أم هبة مستغرقة في النوم.

ويتجها إلى باب الشقة، وتحتضن هبة أم علاء، وتقول لها: ماتزعليش مني، أنا أسفة، واعتذري لأبيه علاء.

تقول أم علاء: أنا عمري ما أزعل منك، واعتذارك لأبيه قولوهوله انتي بنفسك بكرة لما يلاقي أخته الثالثة جاهزة مستنيّة تشوفه عريس.

ويصعدوا إلى شقتهم وتغلق هبة الباب وراءهم وهي خجلانة من نفسها.

يأتي صباح اليوم التالي، وتفتح هبة شرفة غرفتها تجد الشارع به أنوار الخطوبة، تخرج من حجرتها متجهة إلى حجرة أمها وكانت الساعة ١١ صباحاً تجد أمها جالسة على سريرها تبكي.

تسألها هبة: مالك يا ماما زعلانة ليه؟ وإيه الإشاعات اللي في إيدك دي، انتي روحتي للدكتور ولا إيه؟

تنظر أم هبة لهبة بحزن شديد، وتبكي بحرقة.

تقول هبة: مالك فيه إيه؟! طمّنيني عليكي، وّرّيني الإشاعة والتحليل دي.

وتأخذها من يدها، ولكن لا تستطيع فهم أي شيء.

تقبّل يدها، وتقول لها: يا ماما أبوس إيدك، طمّنيني فيه إيه؟

أم هبة وهي تبكي: حقولك يا بنتي عشان لازم تعملي حسابك، أنا من أيام امتحاناتك وأنا بحسّ بنهجان ودوخة وألم في بطني وبرجّح كثير، وبحاول ما أبينلكيش عشان ماتتوهميش ويأثر على دراستك وامتحاناتك، ولما التعب شدّ عليّ من أسبوع سيبتك بحجّة إني رايحة أجيّب بضاعة، ونزلت كشفت والدكتور طلب تحاليل وإشاعات ورُوح عملتها ونسيت أجيّبها، لما تعبت امبارح في الشارع قولت لازم أروح أجيّبها، روجت الصبح جِبتها وعدّيت على الدكتور، وقال لي.... وتصمت... قال لي...

هبة: قولي أبوس إيدك، قلبي حيقف.

أم هبة: قال لي إني عندي سرطان في المعدة، والحالة متأخرة، ولازم أبدأ رحلة الكيماوي. تضع هبة يدها على فمها لكي تكتم صوت صريخها؛ حتى لا يعلم بها أحد، وتقول: لا... لأ مش ممكن، مستحيل، أكيد فيه حاجة غلط، لا أنا مش مقتنعة، احنا لازم نروح لدكتور واتنين وثلاثة.

وتجلس بجانب أمها تبكي، ويحتضنا بعضهما الآخر بعمق.

تقول أم هبة: لا أنا مش عايزاكي تعيطي، أنا عايزاكي جامدة وثقفي في شهري ومحدث يحسّ بينا، ولا حتة خالك أم علاء، أنا وانتي ستر وغطا على بعض، عايزاكي ماتبعديش عني غير جامعتك وبس؛ عشان لو مُتّ في أي وقت أبقى شبعت منك، وانتي اللي تبقي آخر حاجة شافتها عيني يا نور عيني.

تعانقها هبة بعنف، وتقول: لأ.. ماتقوليش كدة، اوعي.. انتي حتخفي وتقومي وتبقي أحسن من الأول كمان.

ينتبها على صوت جرس الباب وزغاريط على الباب، تخفي أم هبة الإشاعات تحت المخدة بسرعة، وتطلب من هبة مسح دموعها وأن تتجه لفتح الباب، وتذهب هبة لفتح الباب تجد أم علاء وأخواته نازلين يطمئنوا على حال أم هبة، ويرتّبوا موعد الذهاب لخطوبة علاء.

تلاحظ أم علاء شحوب وجه هبة وبقايا دموع، تدخل مسرعة لحجرة أم هبة لتطمئن عليها.

أم علاء: مالك يا أم هبة، فيه حاجة يا حبيبتي؟

أم هبة: لا يا أختي أبداً، وألف مبروك لعلاء، ربنا يتمّمه على ألف خير.

أم علاء: طيب راقدة ليه دلوقتي؟! بقينا بعد الضهر قومي يلاً خرينا نرتب حنبلس إيه، والله يا أختي أنا لحد دلوقتي ما مصدّقة إن علاء ابني اقتنع بالجواز كده بسهولة.

أم هبة: اكيد يا حبيبتي، ابنك ست البنات تتمناه.

هبة تقف مع أخوات علاء على الباب.

هبة: تعالوا ادخلوا.

أميرة: لا مفيش وقت... يا دوب نروح للكوافير ونيجي نلبس، الخطوبة الساعه ٧، يلاً انتي كمان البسي وتعالى معانا.

هبة: إيه؟! آآه.

وتضع يدها على مقدمة رأسها: لأ معلش، روحوا انتوا، أنا حعمل شعري هنا وحجّهز قبل المعاد.

أميرة: ليه؟!!

هبة: معلش؛ أصل ماما لسة تعبانة شوية، مش حينفع أسبها.

منال: طيب يا حبيبتي، بس إوعي تطلعني وحشة، ولو إنك جميلة في أي حاجة.

منال: يلاً احنا يا أميرة ندخل نطمّن على خالتك أم هبة وننزل نشوف ورانا إيه، مفيش وقت.

تدخل أميرة ومنال ومعهم هبة يطمئنون على أم هبة ويأخذوا والدتهم، ويتركوا هبة وأمها متجهين إلى طريقهم لتحضير مراسم خطوبة علاء.

تترك هبة أمها لكي تستريح وتخرج من غرفة أمها حاملة على كتفها همّ وأم  
وخوف وقلق على كل ما هو قادم.

وتتجه إلى السطوح لتطعم الحمام وتجلس في خلوتها معه، تهرب من واقعها  
المريّر وتعيش لو للحظات في عالمها بين أغاني هاني شاكر وألوان الحمام، والسماء  
تحاوطها بأسرارها وتغمرها بسحاب يتحرك ويأخذ معه أحلامها المتطايرة.

تجلس على ركبتيها تبكي بحرقة وصوت عالٍ، ولا تنتبه لعلاء الذي سبقها لكي  
يوّدع المكان الذي شهد حبهما وفراقهما.

تنتبه هبة ليد تربت على كتفها وتأخذ بيدها وتوقفها.

تنظر هبة فتجد علاء، تسحب يدها وتقف بمفردها تلمم دموعها وجراحها.

وتذهب إلى السور، يقول لها علاء بصوت حزين: ليه كل الدموع دي يا هبة؟!  
انتي الحياة قدامك طويلة، وبكرة تقابلي اللي يناسبك سنًا وشكلًا، أنا خلاص  
شقيت طريقي ومقتنع بيه.

تنظر هبة إلى علاء، وتقول: أنا محتجك دلوقتي أكثر من الأول ١٠٠ مرة.

علاء: ماينفعش قولتلك.. ماينفعش.

هبة: انت مش فاهم حاجة، أنا...

يستوقفها علاء: انتي إيه؟! انتي بتحرجيني وتعدييني ومحسساني بذنوب  
ماعتلوش، ذنوب عشتي فيه وعايضة تفرضيه عليا، انتي مصممة تطلعييني  
وحش قدام مامتك اللي وعدتها إني حكون ليكي أخ وبس وأبعد عنك عشان  
تفوقي، تقدري تقولي لي شكلي إيه قدام مامتك دلوقتي لما تشوفك كده.

هبة وهي تبكي: مامتي! ااااه يا مامتي! مامتي دلوقتي مش شايفة غير  
حاجة واحدة بس. وتبكي.

علاء: مالها مامتك؟! فيها حاجة؟!!

هبة تنظر لعلاء وتقول: روح يا أبيه علاء شوف حتعمل إيه وماتشغلش بالك  
بيًا، ونفد وعدك مع أمي وابعد عني وخليني أنساك، وربنا يوفق، وسيبني مع

وهمي وحياتي، وأنا أكيد حُفوق لوحدي.

ينظر علاء لهبة مستغرباً لهجتها الحزينة، ويتركها في صمت ويتجه إلى السلم.  
تقول له هبة: آه على فكرة؛ ماتستأنيش النهاردة في خطوبتك، أنا مش حقدر  
أجي لأنا ولا ماما.

علاء: إزاي يعني؟! طيب انتي وقولنا عناديّة وراكبة دماغك، لكن مامتك كمان  
لأ ما أعتقدش حتسبني وتسبب أمي في يوم زي ده.  
هبة: مش بقول لك انت مش فاهم حاجة.  
علاء: لو ماجتيش النهاردة اعتبري أي علاقة بيكي انقطعت، وكل حاجة حلوة  
بيننا انتهت.

هبة: ما اتقطع من زمان يا... يا أبيه.

يترك علاء هبة ويذهب، وتستكمل هبة وقتها مع الحمام.

تأتي الساعة ٧ ويملاً الشارع أنوار وزغاريد ومباركات، وتقوم هبة على صوت  
طرقات الباب وصوت أم علاء تزغرد، تتجه إلى الباب، تسمع صوت أم هبة تنادي  
بصوت منخفض حتى لا يسمعها احد وتقول: هبة اقفلي الباب، ولو أم علاء  
سألت علياً قولي لها ماما تعبت ونامت نص ساعة صحيها وأجيبها وأجي،  
اوعي تبيني لها إنك زعلانة، أو إننا مش حنيجي أحسن تفتكر إننا زعلانين ولأ  
حاجة عشان علاء فاهمة يا بنتي؟

تشاور هبة لها بحركة تفهم منها أنها أدركت كلامها بفهم، وتغلق باب غرفة  
أمها وتتجه للباب بسرعة.

تجد أم علاء وأخواته وعلاء، تتجاهل هبة نظرات علاء الذي ظهر عليه  
الغضب والاستياء لعدم رؤية هبة مستعدة لهذه المناسبة وأنها ما زالت بملابس  
البيت.

تقول أم علاء: إيه ده؟! انتي لسة ماجهزتيش؟

هبة: معلش يا طنط، أصل ماما تعبت شوية.

أم علاء: يالهوي! فين؟

وتتجه إلى غرفة أم هبة مسرعة.

تعترض هبة طريقها وتستوقفها: لا اطمني، مافهاش حاجة، هي بس داخت شوية وأنا عملتلها حاجة سُخنة ونامت.

وتشاور هبة بيدها نحو الباب وتقول لها: اتفضلوا انتوا عشان ماتتأخروش، وأنا نص ساعة بالكثير وحصحيتها وأحصلك.

أم علاء: اوعي ماتجوش، وربنا أزل، آه.. دا الفرحة ماتكملش إلا بيكوا، يلاً احنا يا جماعة عشان مانتأخرش، وأنا عارفة إن هبة عاقلة وحتيجي.

هبة: طبعا، دا أخويا الكبير ولازم أكون جنبه.

يذهبوا جميعاً وتغلق هبة الباب وراءهم، وبعد دقائق تسمع هبة صوت أهات أمها، تجري هبة مسرعة تتحدّث إلى الدكتور المعالج لوالدها، وترتدي ملابسها بسرعة وتخرج من باب شقتها وتأتي بتاكسي، وتأخذ والدتها إلى مكان المستشفى.

وثصل أم علاء وأولادها إلى بيت سلوى خطيبة علاء...

وتظهر خطيبة علاء وهي جميلة ورقيقة، ويسلم عليها علاء وتبدأ مراسم الخطوبة، ولكن أم علاء تشعر بقلق لعدم حضور أم هبة إلى الآن.

ينظر علاء على الباب من حين لآخر منتظراً دخول هبة.. وتنتهي الخطوبة، وتترك أم علاء ابنها يستكمل سهرته مع خطيبته وتأخذ بناتها متوجهة إلى بيتهم.

ما زالت هبة تقف مع أمها مفردة وهي جليسة الفراش في المستشفى.

الدكتور: بُصّي يا هبة، أمك للأسف عندها كانسر في مرحلة متأخرة، ولازم تبدأ مرحلة العلاج الكيماوي، وطبعاً زي ما أنا شايف حالتكوا المادية ماتسمحش بالعلاج على حسابكوا؛ فأنا حبدأ أقدم اسم والدتك في مستشفى حكومي الأقرب لمحل سكنكم، بس طبعا فيها ١٠ أو ١٥ يوم لحد ما الدور يجي عليها، ده بعد كمان توصيتي الخاصة ليها مع مدير المستشفى، ومن هنا لحد ما معادها يجي

حتعيش على المسكّنات، وده محتاج منك مجهود جامد عشان تقدري تتبعيها.  
هبة: حاضر يا دكتور، بس فهمني أعمل إيه بالظبط عشان أخفف عنها الألم،  
دا أنا مش مستحيلة صوت صريخها.

الدكتور: خُدي الروشّة أهّي، وتقدري تاخدي مامتك وتروّحي، وامشي على  
العلاج والمسكّنات دي وربنا يشفيها.  
هبة: يارب.

وتأخذ هبة أمها وترجع على البيت.. ويأتي نهار اليوم التالي..  
وتبدأ هبة في تحمل كل المسؤولية؛ مذاكرتها، وأمها المريضة، وفتح المحل  
مصدر رزقهم الوحيد.  
تذهب هبة إلى جامعتها وتخلّص محاضراتها، وترجع مسرعة لكي تبقى بجانب  
أمها.

وتصل هبة إلى منزلها، وتصعد على سلم البيت في وقت نزول علاء.  
علاء: برضه عملتي اللي في دماغك وماجيتيش امبارح، وكمان منعتي أمك إنها  
تبقى جنب أمي في يوم زي ده.

هبة تتجاهل كلامه وتستكمل طريقها، يستوقفها علاء ويمسك بيدها بعنف  
ويقول: ماتقطعيش كل خيط بيّننا، ولو شايفة إن اللي بتعمليه ده عقاب ليا أنا  
مابتعاقيش، وبكرة تندمي على كل ده، عامةً أنا فاضل لي أقل من شهر وحكتب  
كتابي وأخذها وأسافر.

هبة: بُص يا أبيه، انت في المرحلة دي آخر همي وآخر حاجة أفكر فيها، أو  
يشغلني جوازك وسفرك.

علاء: أنا شايفك كده....

وقبل أن يستكمل كلامه تستوقفه هبة.

هبة: انت للأسف مابتقتش بتشوف إلا نفسك وعندك وكبرائك وبس، انت

اللي بكرة تندم على تجاهل مشاعرك ناحيتي، وحتندم كمان إنك بتبعد نفسك  
عني في أكثر فترة محتاجك فيها، وربنا يوقِّفك في حياتك، سلام ياااااااااا أبيه.  
وتدخل هبة إلى بيتها وهي محسورة القلب والمشاعر على حبه الضائع  
وحبيبها العنيد وأمها المريضة، فللأسف انفقت عليها الحياة دون مقدمات.  
تسمع هبة طرق الباب، وتستقبل أم علاء بابتسامة مصطنعة..  
هبة: اتفضلي يا طنط.

أم علاء: أنا مابكلمكيش وعتابي على أمك اللي طاواعتك، مش هنخسر بعض  
عشان شغل العيال بتاعك ده، يا أم هبة انتي فين؟  
وتدخل غرفتها تجدها مستلقية على سريرها يظهر عليها آثار التعب الشديد.  
أم علاء: مالك ياختي كفى الله الشر!؟

أم هبة: حقك عليا يا أختي، ليكي حق تزعلي، بس صدقيني كنت تعبانة  
وماقدرتش آجي.

أم علاء: مالك يا أختي؟

أم هبة: الظاهر من كتر المسكّنات يا أختي بطني ألتهيت، بس الدكتور مهوّل  
الموضوع، ما انتي عارفاهم.  
تنادي أم علاء على هبة ولم ترد...

أم هبة: تلاقبها نزلت تفتح الدكان، ما انتي عارفة البير وغطاه.

أم علاء: إخس عليكي! هو احنا مش أهل، قولي عايزة كام وأنا عنيا ليكي.

أم هبة: إن شالله يخليكي، شايلكي لوقت عوزة، ودايمًا الخير عندك.

أم علاء: طيب يلاً... يلاً قومي أنا مانستكيش وجايبالك من الحلويات اللي  
كانت في الخطوبة امبارح، حروح أعلّق على الشاي وأستنكي، يلاً قومي بقى  
وتعالى أحكيلك عملنا إيه امبارح.

وقر الأيام وتنشغل هبة في همومها، وتبذل أقصى جهدها حتى لا يلاحظ أحد

تعب والدتها، وتقوم بكل واجباتها من دراسة... لشغل.. لرعاية أمها متجاهلة  
علاء ولا تريد أن تقابله صدفة؛ فهي ما زالت تعالج جرحها منه بالنسيان.  
ويأتي يوم زفاف علاء وترى حبها واملها لآخر مره ويسافر علاء ويأخذ زوجته  
معه ويقطع اي خيط يربطه بهبه.

ويأتي ثاني يوم الزفاف، تذهب أم علاء إلى الصيدلية القريبة منهم.

أم علاء: صباح الخير يا دكتور.

الصيدلي: صباح الخير يا أم علاء، أهلاً.. أوْمري.

أم علاء: عايزه دوا السكر الله يبارلكك.

الصيدلي: عنيا افضلي.. ألا قوليلي أخبار أم هبة إيه؟ طمني عليها.

أم علاء: والله بخير، أهو حبة ترجع ومرة تسخن، ومرة كويسة، معرفش آخر  
التهاب المعدة ده إيه.

الصيدلي: معلش، ما ده أمر طبيعي؛ الكيماوي بيهدد بعيد عنك.

أم علاء: كيماوي إيه كفا الله الشر؟

الصيدلي: انتي ماتعرفيش يا حاجة؟! دي بقالها شهرين يا عيني بتاخذ كيماوي  
والحالة متأخرة جداً، وبنتها بتيجي تاخذ المسكنات من هنا باستمرار، وساعات  
بروح بنفسي أعلقلها محاليل وأديها حقن...

وقبل أن يستكمل حديثه تترك أم علاء الصيدلية وهي منهارة، وتجري إلى بيتها  
وتصعد إلى شقه أم هبة وتطرق الباب بشدة، تفتح لها هبة وتدخل بدون كلام  
ودموعها على خدها إلى حجرة أم هبة، وتجدها مستلقية على السرير، تأخذها  
وتضمها إلى حضنها وهي تبكي بحرقه، وتقول: يا قلب أختك يا بسمة، يا قلب  
أختك، شايلة الهم ده كله لوحذك يا بنتي ليه؟ إمال احنا أصحاب وجيرة وعِشرة  
إزاي؟!

تبكي أم هبة وتقول: ماكتنش عايزه أشيلك همّي وأنكد عليكي وانتي فرحانة  
بابنك وبتجوّزيه.

أم علاء: ابني إيه وهباب إيه؟! إذا متحملة ومحملة بنتك كل ده من غير ما تقولي لي.. ويستكملوا حديثهم.

تصعد أم علاء إلى شقتها وهي باكية العين والقلب على جارتها ورفيقه عمرها. تقف هبة في محل أمها، يأتي لها ذلك الشاب صاحب معرض السيارات القاطن في أول الشارع.

أشرف: صباح الخير يا أبله.

هبة: صباح النور.. خير؟

أشرف: كنت عايز منك هدية حلوة كده تنفع واحدة صاحبتني.

هبة: هدية! أنا مابيعش هدايا، أنا زي ما انت شايف كده بيع هدوم، شوف انت عاوز إيه وأنا أجيبهولك.

أشرف: لا أصل أنا مش بفهم في المواضيع دي، اختاري انتي على ذوقك كأنها ليكي وأنا هحاسب بس.

هبة: ذوقي! وأنا إيه دخلني في الموضوع، ما تقول عايز إيه وتخلصني.

أشرف: مالك بس يا أبله زعلانه ليه؟

هبة: أنا مش أبله، واخلى وخلصني.

أشرف: طيب طيب، اعتبريها في جسمك كده وفي طولك، وهاتي حاجة مشخلعة كده.

هبة: طيب يارب نخلص.

تأتي هبة بطقم بناتي وتضعه في كيس وتعطيه له وتقول حسابه.

أشرف: تسلمي يا أبله، اتفضلي فلوسه أهيه.

ويتجه أشرف لخارج المحل ويترك الشنطة.

هبة: تعالَى هنا رايح فين؟ خد حاجتك.

أشرف: لا دي بقى كادوه مني عشان عيد ميلادك يا أبله، مش هو كمان يومين برضه؟

ويتركها في حيرة من أمرها....

تقف هبة في ذهول لا تستطيع الكلام ولا الرد.

تدخل عليها أم علاء تقول: مالك مسهمة كده ليه؟!!

هبة: أعمل إيه بس يا طنط! أشرف بتاع المعرض ده مجنون ولا إيه؟! وتحكي لها ما حدث.

أم علاء: هاتي الكيس ده وأنا حروح أسود عيشته.

وتأخذ من هبة الكيس وتذهب إلى المعرض وتنادي: يا أشرف، انت يا أشرف بيه.

يخرج أشرف من مكتبه: أهلا بالحاجة أم الأستاذ علاء، اتفضلي.

أم علاء: خد حاجتك يابني وابعد عن هبة عشان غلبانه ومالهاش حد، واوعى تفتكر إني حسمح لك تتعرضلها.

أشرف: مفيش تعرض ولا حاجة يا حاجة ومن الآخر كده أنا غرضي شريف، أنا سامع إن الحاجة أم هبة بعافية شوية، وهو ده اللي أخرني أروح أطلب إيدها؛ فأنا بقول لك أهو... كلمي الحاجة أم هبة وحددي معاد معاه، ودا كارت فيه تليفون البيت والمعرض، وأنا جاهز من جنبه لألف جنبه، ومستني الرد.

تأخذ أم علاء الكارت وتخرج من المعرض وتذهب إلى بيتها.

.....

وصل علاء إلى بيته وعمله في إحدى دول الخليج ومعه زوجته.

سلوى: انت حتفضل قاعد كده يا علاء؟! ما تقوم نروح في أي مكان، أنا زهقانه ومش عايزة أقعد في البيت.

علاء: ما انتي عارفة إن أنا ورايا شغل كثير، وإن اليوم الوحيد اللي مناسب للخروج هو أجازتي بس.

سلوى: ااااه، مع نفسك انت بقى، أنا عن نفسي حنزل وأنفسح وأشوف الدنيا، وماتنساش تسييلي فلوس.

يقف علاء مذهولاً من كلام زوجته، ويمسك سماعة التليفون ويطلب والدته  
في مصر.... ترن ترن.

أم علاء: ألو.

علاء: أيوه يا أمي.. وحشتيني.

أم علاء: أهلا يا حبيبي، ازيك و ازى مراتك؟ يارب تكونوا بخير.

علاء: الحمد لله يا ماما، انتوا عاملين إيه؟ وإخواتي أخبارهم إيه.

أم علاء: الحمد لله يابني كلنا بخير.

علاء: وهبة يا ماما ومامتها أخبارهم إيه؟

أم علاء: ماتفكرش فيها يابني وعيش حياتك واتهنى بعروستك، اللي انت  
عملته ده عين العقل، بس أمها اللي تعبانة أوي وجالها المرض الوحش، بتاخذ  
كيماوي يا حبة عيني... اسكت مش هبة جالها عريس.

علاء: عريس! مين ده؟

أم علاء: أشرف ابن الحاج التوني بتاع معرض العربيات، مقتدر وشاريها وعازيها.

علاء: وهي وافقت؟

أم علاء: والله هي لسة ماتعرفش، ولا قولت لأمها؛ لأنهم كانوا مشغولين  
بجلسة الكيماوي اللي خالتك أم هبة خدتها امبارح، وماكانش فيه فرصة.

علاء يصمت.....

أم علاء: انت سامعني يا حبيبي؟

علاء: آه سامعك، ربنا يوفقها والى سلامة على أم هبة، اوعي تسيبها يا ماما،  
خليكي جنبهم، ولو احتاجوا حاجة قوليلي على طول.. آه صحيح هما بيصرفوا  
منين دلوقتي؟

أم علاء: هبة بترجع من الجامعة تفتح دكانة أمها وواقفة فيها، وربنا يكرمهم.

علاء: حظها قليل البت هبة دي، ربنا يقف معاها.

أم علاء: حبيبي يا علاء، أنا عايزة أفرح بعيالك بقى وأبقى تيته من عروستك..  
مع السلامة يا حبيبي.

علاء: مع السلامة يا أمي، دعواتك.

تغلق أم علاء الخط، وتقوم متجهة إلى شقه هبة.

تجد شراعة الباب مواربة، تعلم أن هبة ليست بالبيت، وتنادي: يا أم هبة..  
يا أم هبة.

أم هبة: أهلاً يا أم علاء، افتحي وادخلي، ماتأخذينيش مش قادرة أقوم.

تفتح أم علاء الباب وتدخل...

أم علاء: صباح الخير يا حبيتي، إزيك النهاردة، إمال البت هبة فين؟

أم هبة: هبة عندها جامعة وحتيجي على الدكان، الراجل اللي حيحيب  
البضاعة جاي.

أم علاء: طيب كويس، عندي ليكي خبر بقى وكويس إننا لوحدنا عشان نعرف  
نتكلم .

أم هبة: خير يا حبيتي؟ قولي.

أم علاء: هبة جالها عريس.

أم هبة: بجد؟!

أم علاء: آه والنبي، أشرف ابن الحاج التونسي، واد زي الفل، ما انتي عارفاه،  
ومقيدِر وعنده شقة ملك وفلوس كده تبقى بعد عمر طويل مطمئة عليها.

أم هبة: بس دا عيل طايش وبتاع بنات.

أم علاء: وأهو ساب كل البنات واختار ست البنات، هو يعني فيه شاب  
معرفش بنات ولا لعب بديلته، وفي الآخر مسيرهم يتجوزوا.

أم هبة: تفتكري هبة حترضى بيه؟

أم علاء: وماترضاش ليه؟! والبركة فيكي بقى، انتي أمها وتقدري تقنعها.

أم هبة: يارب يقدم الي فيه الخير، إن جيتي للحق أنا نفسي أجوزها وأطمئن عليها قبل ما أموت.

تدخل هبة تجد أم علاء مع أمها، فتقول: سلام عليكم يا جماعة، إزيك يا ماما إزيك يا طنط.

أم علاء: أهلاً يا عروستنا يا قمر.

أم هبة: أهلاً يا حبيبتني.

هبة: معلش يا طنط، أنا عارفة إنك تعبانة مع ماما اليومين دول.

أم علاء: يا هبة أمك دي حبيبتني وصاحبتي وعشرة عمر، عقبال ما أتعبلك يوم فرحك.

هبة: ألاً صحيح عملتي إيه يا طنط في موضوع أشرف؟

أم علاء: كل خير يا حبيبتني، أمك بقى تبقى تقول لك، وربنا يقدم الي فيه الخير.. سلام بقى وحنزل لكم آخر النهار.

وتخرج من باب الشقة وتغلقه وراءها.

هبة: إيه الحكاية يا ماما؟ فيه إيه؟!

أم هبة: بصي يا بنتي، اقعدي كده وصلي علي النبي.

هبة: عليه الصلاة والسلام.

أم هبة: أنا يا بنتي لو عشتلك النهاردة مش حعيشلك بكرة، وزى ما انتي شايفة احنا لا أب ولا أخ ولا سند، وعايشين بطولنا وأنا نفسي أطمئن عليك قبل ما أموت.

هبة: بعد الشر عليك، فيه إيه بس.

أم هبة: دلوقتي خالتك أم علاء راحت لأشرف وكانت حتبهدله وتمسح بيه الأرض، بس الواد طلع جدع وطلب إيدك ومستني الرد، وهو جاهز من مجاميعه، يعني لا حنستنى بقى واحد يجهز ولا يشتري شقة، ده جاهز وربنا فاتحها عليه وكسيب، إيه رأيك يا ست البنات؟

هبة: جواز وأشرف! إيه يا ماما الكلام ده؟! أنا مابفكرش إني أتجوز، ولو حفكر  
مش حيبقى أشرف الصايح التلفان بتاع البنات.

أم هبة: ماتفكريش ليه يا حبيبتى؟! وعلى رأي خالتك أم علاء أهو بتاع البنات  
ساب كل البنات وعاييز ست البنات.

هبة: بس أنا يا ماما عاييزة أكمل جامعة وأشتغل وأثبت نفسي.

أم هبة: يا بنتي أبوس إيدك نفسي أرتاح وأفرح بيكي قبل ما أموت،  
وماتركيبش دماغك، واللي انتي عاييزة تثبتتي نفسك قدامه أهو اتجوز وسافر  
وزمانه عايش في العزّ والهنا هو وعروسته، ومش بعيد كمان كام يوم نلاقني خبر  
إنه حيبقى أب قريب.

هبة: ياه يا ماما، ما بلاش السيرة دي، وهو ولا في دماغي ولا بفكر فيه ولا  
في غيره.

أم هبة: طيب بصي بقى، كلمة ومش حنتيها؛ أنا حبلّخ خالتك أم علاء إننا  
موافقين، وهي حتوصل له وحنعمل قاعدة كده تتعرفوا فيها على بعض، ونأجل  
الخطوبة بعد امتحاناتك، وكلمة زيادة في الموضوع ده مش عاييزة، ولو ركبتي  
دماغك حبعت لخالتك أقول لها تجيب ابنها وتيجي وحجوزك ليه، ولا جامعة ولا  
زفت، وتروحي تعيشي معاهم في البلد، ما أنا مش حسيبك في الدنيا كده بطولك،  
انتني فاهمة؟!!

هبة: يوووووه.

وتتركها وتدخل غرفتها وهي تكتم غضبها؛ فأمرها في حالة مرّضية لا تستطيع  
المناهدة ولا النقاش والغضب.

تتحرك هبة ذهابًا وإيابًا في غرفتها وهي مشتعلة بالغيظ مما حدث؛ فذلك  
الشاب هو أبعد من الخيال عن فكرها، ولا يوجد أي توافق بينهما بأي شكل  
من الأشكال.

ترفع سماعة تليفون غرفتها وتحدث فيه مع صديقتها منى...

هبة: منى إزيك.. بقول لك عدّي عليّا.

منى: إزيك يا هبة.. ماشي بس آخر النهار، فيه حاجة ولا إيه؟!

هبة: آه... فيه مصيبة.

منى: خير؟! طنط حصل لها حاجة؟

هبة: لا الحمد لله، أنا اللي حيحصل لي، بس تعالي وأنا أحكيلك.

ويعر باقي اليوم، وتأتي منى لهبة وتحكي لها هبة ما هي فيه.

هبة: إيه رأيك يا ست منى؟

منى: فين المصيبة دي أفهم؟ جايه تقويلي متقدملك عريس وغني كمان

وعينه منك أصلًا وتقويلي مصيبة!

هبة: انتي بتهرّجي، صح؟

منى: أهرّج إيه يا بنتي، انتي اللي حتفضلي عايشة في أحلامك كده من غير

ما تتحقق، علاء بيه سابك واتجوّز ومضحّاش عشانك وسافر وشاف حياته، وانتي

حتفضلي حابسة نفسك كده على ذكرى حبه.

هبة: ليه السيرة دي بس؟ دا علاقته إيه بكلامي؟!

منى: دا هو العلاقة نفسها، فوقي لنفسك يا بنتي، ماله أشرف عيبه إيه؟

هبة: دا صايح وبتاع بنات، انتي ناسية لما كان بيرزّل علينا وقت المدرسة.

منى: وأهو بقى أغنى شاب في المنطقة وكل يوم عربية شكل، وعاييز يتجوّزك

على سنة الله ورسوله.

هبة: هو فين أبو دبلوم ده وأنا فين! أنا بكرة حكّبر وأبقى مديعة مشهورة.

منى: ههههه والنبى لو بقيتي وزيرة مسيرك لبتيك ومطبخك ومواعينك.

هبة: انتي بتتكلمي زي أمي بالطبط، وأنا غلطانة إني قولت لك تعالي، قومي

امشي يا منى.. يلاً قومي.

منى: يا بنتي فوقي، بتكلم زي مامتك عشان مامتك بتتكلم زي ستي وخالتي

ومامتي ومجتمعك كله، مين فيهم ولا فينا حد ساعده يعيش حلمه! طول عمرنا عارفين إن الشهادة دي مجرد علام وكلام على ورق من باب الفشخرة في الآخر، حيجي أقرب عريس يقدر يجيبلك شقة وشبكة وحيقولوك مع ألف سلامة، أنا بقى فاهمة دماغهم كويس؛ عشان كده مابْتَعْش نفسي وجيبت من الآخر وماكملتش تعليمي.

هبة: بس أنا بقى غير أي حد، ولازم أثبت له وللكل إني حبقى حد كبير... وكبير أوي كمان.

منى: آه آه آه، انتي قولتيها أثبت له، عارفة لو مفيش «له» دي كان زمانك موافقة وفرحانة وطايرة من الفرح كمان، بُصِّي يا هبة انتي مفيش فايدة فيكي، خليكي كده لحد ما تكبري وتعنسي ووشك يكرممش أكثر ما هو مكرممش من بوزك اللي بقى شبرين دايمًا، سلام أنا ماشية، أوعدنا يارب بابن عم أشرف ولا أخوه ولا أبوه حتى.. نصيحه مني اتجوزي اللي معاه قرشين؛ يوم ما تتخني منه تعرفي تخرجي وتتسوقي، بدل ما كده كده حتتجوزي وفقرك ده يوقّعك في واحد فقير دُقه وماتلقيش لا فُسح ولا خروج ويبقى كله فقير في فقر.

وتقوم مني من مكانها وتخرج، وتترك هبة في حيرتها.

.....

أما علاء فقد اختار حياةً تقليدية فرضها عليه المجتمع والأهل، وهو استسلم لها دون معافرة، ولكن بدأ الصدام سريعًا بينه وبين زوجته.

يعود علاء من عمله دائماً في السادسة مساءً.

علاء: مساء الخير.

سلوى: مساء النور.

علاء: حضري لي الغدا أحسن أنا ميت من الجوع.

سلوى: لا مفيش غدا، أنا ماعملتش، ولابسة ومستنيك نزل نتغدا سوى في أي مكان.

يضع علاء مفاتيحه بعنف على منضدة الأنتريه ويتأفف زهفًا.  
علاء: هو أنا مش قولت إن مفيش خروج ولا فُسح إلا يوم الجمعة في الأجازة،  
وأنا باجي من شغلي تعبان عايز أتعدّي وأريح ساعة عشان أنزل أروح تمريني.  
سلوى: وأنا مش سايبّة بابي ومامي وشلتي والنادي بتاعي عشان آجي أتحيس  
هنا بين أربع حيطان أطبخ وأغسل وأمسح.

علاء: ليه؟! هو حضرتك كنتي مفكرة إننا حنتجوز ونعيش في الملاهي.  
سلوى: والله ماليش فيه، واعمل حسابك أنا أصلًا ماليش في المطبخ، يعني  
وانت جاي تبقى تجيب دليفري معاك، ويوم أجازتك بس حبقى أطبخلك.  
وتقوم وتتركه وتدخل غرفتها.

.....

تنزل أم علاء إلى أم هبة كما تعودا بعد صلاة العشاء يتبادلان أطراف الحديث.  
أم علاء: عملتي إيه مع هبة؟  
أم هبة: البت يا أختي راكبة دماغها وعمّالة تقول لي جامعتي ومستقبلي، وأنا  
حموت وأجوزها وأطمئن عليها قبل ما يجرا لي حاجة.  
أم علاء: لا يا أختي بعد الشر ماتقوليش كده، ربنا حيكريمك وتبقي زيّ الفل  
وتفرحي بيها، وتشيلي عيالها كمان.  
أم هبة: أنا أصلًا قولتلها إني موافقة وحبعت لأشرف الرد وخلص، وهي مش  
حيهون عليها زعلي، ولما تلاقي الخطوبة والشبكة أكيد حتفرح.  
أم علاء: صح كده، إمال إيه؟! أي بنت مسيرها لبيتها وجوزها، ماشوفتيش  
بناتي كانوا بالدّموع بيعيطوا عشان مايتجوزوش، ويوم خطوبتهم تقيدي الشمع  
من حمار كسوفهم اللي على خدودهم، خلاص أنا معايا الكارت، بكرة أتصل بيه  
وأقول له يحدّد معاد ويبلغنا بيه.  
أم هبة: على خيرة الله.

ويأتي صباح يوم جديد تتخلَّل أشعة الشمس من نافذة غرفة هبة مما جعلها تستيقظ من نومها.

تقوم تستعد ليومها الذي أصبح مليئًا بالواجبات من دواء والدتها.. لتنظيف المنزل.. للذهاب إلى كليتها.. لمتابعة المحل الذي يمتلكه، وهو يعتبر مصدر رزقهم الوحيد.

وتجري عقارب الساعة في صباح هذا اليوم حتى تصل إلى الساعة ١٢ ظهرًا، تسمع هبة طرَّقَ باب شقتها، تفتح الباب فتجد أم علاء.

أم علاء: صباح الخير يا هبوبة.

هبة: أهلاً يا طنط، اتفضلي.

أم علاء: ألف مبروك يا حبيبتي، ربنا يتمم بخير.

هبة: ليه فيه إيه!؟

أم علاء: أنا لسّة قافلة السكّة مع أشرف حالاً أهو، واتفقت معاه إن يوم الخميس الساعة ٧ حيجي هو وأمه وأخته يتعرّفوا عليكم، ولو فيه نصيب نقرأ الفاتحة على طول.

هبة: دا انتم متفقين عليّا انتي وماما بقى وبتحطوني قُدّام أمر واقع.

أم علاء: آه، ما هو جوازك ده أمر واقع، طبّ دا أبلتك منال وأبلتك أميرة متجوّزين وهما أصغر منك، وعلى فكرة أنا عرفتهم وجايّين يا حلوة من يوم الأربع بياتوا معانا عشان نخليكي قمر أكثر ما انتي قمر، وعلى فكرة أنا عرّفت أخوكي الكبير وهو موافق وبيباركلك، وساعة ما تتحدّد الخطوبة حيبعتلك هدية حلوة أوي.

هبة: كمان! دا انتم مرتبين كل حاجة أهو، طيب ابقو شوفوا مين حيقعد مع الناس يوم الخميس.

أم علاء: انتي يا بنتي..

وتقطع حديثها هي وهبة منتبهين لصوت صراخ أم هبة.

تجري هبة وأم علاء تجد أم هبة تمسك بطنها أماً، وينزل من فمها قطرات من الدماء؛ مما يجعل هبة وأم علاء يصرخان خوفاً عليها، وتجري هبة تطلب الإسعاف وبسرعة يحاولان استبدال ملابس أم هبة من ملابس بيت إلى ملابس تصلح للخروج.

تأتي عربة الإسعاف مسرعة من أول الشارع، وعندها يكون أشرف جالساً على باب معرضه، يقوم من مكانه مفزوعاً ينظر إلى أين تتجه هذه العربة، يجدها في طريقها إلى بيت هبة.

يدخل المعرض مسرعاً ويخرج إحدى سياراته الملاكي ويقودها بسرعة متجهاً إلى منزل هبة.

تنزل أم هبة في سرير عربة الإسعاف بعد أن أغميَ عليها، وأصبحت فاقدة للوعي، وتنزل على السلم ورائها أم علاء وهبة وهما يصرخان ويبيكان خوفاً. يقول أشرف لأم علاء: خير يا حاجة كفى الله الشر!؟

أم علاء: الحَقني يا بني... خالتك أم هبة مغمى عليها وبتجيب دم من بوقها.

أشرف: طيب اركبوا، اركبوا بسرعة نمشي وراها.

تقول هبة: لا.. أنا حركب مع ماما.

يقول المُسعف: لا ممنوع يا أبله، الحاجة بس، انتو حصلونا بالعربية.

يقول أشرف: مش وقته يا أبله، اركبي خَلينا نطمّن على الحاجة.

تركب هبة وهي مجبرة، وأم علاء معها تجلس بجوار أشرف، وهبة بالخلف عينها تتغَلغل بالدموع، وتتنظر من نافذة السيارة ونظراتها تسبق الناس والأحداث. يصلُّوا جميعاً إلى المستشفى، تنزل هبة وأم علاء وأشرف، تجري هبة على سيارة الإسعاف تنظر إلى أمها المستلقية على سرير الإسعاف وما زالت فاقدة للوعي.

تصرخ هبة وتنادي بصوت عالٍ: ماما... ماما، رُدِّي عليا، رُدِّي عليا.

تأخذها أم علاء في حضنها، وتقول: اهدي يا بنتي خَليهم يشوفوا شغلهم  
ويطمئونا عليها.

وتدخل أم هبة إلى الرعاية المركَزة، ويأتي لها الطبيب المعالج ويغيب عنهم  
ساعة من الزمن داخل غرفة الرعاية مع أم هبة تاركهم حائرين باكين على ما  
وصلت لها حالة أم هبة.

ويخرج الدكتور وتجري عليه هبة، وتقول: طمني يا دكتور والنبي، ماما  
كويسة؟

الدكتور: بُصي يا هبة، أنا مفهمكم من الأول إن حالة الكبد عند أمك فيها  
سرطان في مراحلهِ الأخيرة، واحنا بنعمل اللي علينا بالعلاج والكيماوي، والشفاء من  
عند ربنا بقى.

أم علاء: طيب هي ليه يا دكتور نزلت دم كده؟! وحالتها إيه دلوقتي؟

الدكتور: الدم ده أمر طبيعي لحالتها، احنا حنسيبها تحت الملاحظة النهاردة،  
وأنا ادّتلها أدوية وحقن توقّف النزيف وتسكّن الألم، وربنا يقدرها بقى على  
جلسة الكيماوي اللي جاّية.

هبة: طيب أقدر أشوفها.

الدكتور: لأ ممنوع، دي رعاية، ممكن وقت الزيارة الساعة ٦ تبصي عليها من  
بعيد، وبلاش عياطك ده، اجمّدي.. أمك محتجالك أكثر من الأول، عن إذنكم.

وتسند هبة ظهرها على أقرب حائط، وتضع يدها على وجهها وهي منهارة  
من البكاء.

يقول أشرف: الوقفة دي بقى ما منّهاش فايده، اهدوا يا جماعة عشان تعرفوا  
تبقوا معها زي ما الدكتور بيقول، يلاً تعالوا أوصلكم البيت وأبقى أرجعكم  
وقت الزيارة.

هبة: لا أنا مش منقولة من هنا، امشي انت شكراً ليك لحد كده، احنا مش  
عايزين مساعدة ولا شفقة من حد.

أم علاء: إخس عليكي يا هبة، دي أصول برضه؟ بدل ما الراجل كتر خيره واقف معانا، بدل ما نبقى لوحدينا كده من غير راجل، معلش يا أشرف يابني ماتاخذش على كلامها، هي بس زعلانة على أمها.

أشرف: لا حول ولا قوه إلا بالله، لا يا حاجة مفيش حاجة، دا مش وقت زعل، أنا عارف، ودي أصول إني أقف جنبكم من غير حاجه والله، احنا جيران برضه والجار للجار.

أم علاء: ابن أصول يابني.

أشرف: طيب الساعة لسة ماجانش ٢ حتى، رجليكوا حتوجعكوا كده، طيب بضوا تعالوا نقعد في الكافتيريا دي حبة ريحوا رجليكوا واشربولكم بوق مائة، تعالوا يلا.

هبة: قولت مش منقوله من هنا.

أم علاء: تعالي بس يا هبة واستهدي بالله، والله أمك حتبقى زي الفل.

وتأخذها أم علاء تحت باطها وتتحرك معها هبة بصعوبة، ويسبقهما أشرف بخطوات لكي يختار لهما أقرب ترابيزة للجلوس عليها، ويدخلوا الكافتيريا سويًا.

أشرف: اتفضّلوا اتفضّلوا، تعالي يابني هنا شوف الجماعة يشربوا إيه.

هبة: مش عايزة حاجة.

أشرف: طيب بُصي، حطّب شاي لينا كلنا.. ماشي؟ ماتكسفينيش بقى.

تنظر هبة له وتستدير بوجهها إلى الناحية الأخرى وهي صامتة.

أم علاء: طيب يا ولاد، على ما الشاي يجي حروح أتكلم في التليفون. حكّم منال يا هبة أحسن تعدّي علينا ماتلقنيش فتقلق.

هبة: اتفضلي يا طنط.

أشرف: خُدي وقتك يا حاجة، أنا قاعد مع الأبلّة ومش حسيبها لحد ما نطمّن على والدتها إن شاء الله.

تبتسم أم علاء لأشرف وتقوم.

يجلس أشرف بجانب هبة على كرسي، ويقول: رُوِّقِي كده يا أستاذة إن شاء  
الله خير، أنا فرِحْتُ والله لما الحاجَّة أم علاء كلمتني الصبح وقالت إن انتوا  
وافقتوا نحدِّد معاد أجيب الحاجَّة وأجي أزوركم.

هبة تخبِّط على الترابيزة بيدها بقوة، وتقول: بُص، أظنّ دا لا وقته ولا مكانه،  
ولا أنا فيّا دماغ للكلام ده.

تفاجأ أشرف من رد فعلها وبدى عليه الانزعاج، وقال: طيب طيب، أنا آسف  
ما أقصدش أضايقك والله، انتي صح معلش، نطمّن على الحاجَّة الأول وبعدين  
نتكلم.

يمر الوقت والساعات، وساعات الليل طويلة على هبة وهي ما زالت تجلس  
على ترابيزة الكافيتريا، وتركها أشرف وأم علاء في وقت متأخر من الليل وعلى وعد  
للعودة مرة أخرى في صباح الغد.

تجلس هبة مكانها في الكافيتريا، يلفت انتباهها صوت هاني شاكر يأتي من  
مسجّل داخل الكافية يغني...

(لو بتحب حقيقي صحيح، كنت وقفت في وش الريح، كنت ما سبتش قلبي  
جريح وسط النناااار

لو كان قلبك لسة بريء، تحكم ظلم إزاي في بريء

وتسيب قلبي لوحده غريق في التياااار

لو بتحب حقيقي بقلبك، كنت عرفت تخاف على حبك

كنت ماتتدّش ثواني إنك تسكن بين أحضاني، مش في دقيقة تروح تنساني  
بدون أعذار

لو حبّتي ماكنتش تقدر، تخدع قلبي في حبك أكثر

أكثر ما اتحمّلت غيابك، واستنيت ودموع على بابك

يبقى نصيبي أعيش في عذابك ليل ونهااa

يمر الوقت وتغرق هبة في دموعها وشرودها ووحدتها وخوفها من مستقبل مجهول.  
تأتي الساعة التاسعة صباح اليوم التالي، تقف هبة أمام غرفة الرعاية، تجد  
الدكتور خارج منها فتقول له: طمّئي يا دكتور.

الدكتور: الحمد لله وقفنا النزيف وعملنا سونار وعرفنا الحالة بالظبط، هي  
المفروض تخرج كمان شويّة على غرفة عادية تقعد كده تحت عنيّا يومين،  
يعني النهاردة وبكرة كده، وممكن تخرج التلات الصبح بإذن الله، وحتمشي على  
العلاج الكام يوم هنا، والتمريض أنا موضيه عليها، ولما تخرج حكّبتلك العلاج  
الجديد.

هبة: طيّب الحمد لله.

بعد ساعات قليلة تخرج أم هبة من الرعاية لغرفة في المستشفى، وتلازمها  
هبة لحظة بلحظة.

تأتي أم علاء وأشرف ووالدة أشرف لزيارتها.

يطرقوا باب الغرفة.. تقوم هبة بفتح الباب.

أم علاء: صباح الخير على الحلوين.

هبة: أهلاً اتفضلوا.

وتنظر لأشرف ومن معه باستغراب ولا تعلم من هذه السيدة التي ترافقه!

يقول أشرف: حمد الله على سلامتكم يا حاجة، إن شاء الله مفيش تعب تاني،  
والدتي جات معايا مخصوص عشان تطمّئن عليكي والله.

أم هبة بصوت يملأه الوهن والتعب: أهلاً وسهلاً، خطوة عزيزة، اتفضلوا.

تجلس أم أشرف بالكروسي بجوار السرير الذي تستلقي عليه أم هبة وتقول لها:  
حمد الله على السلامة، دا أنا أشرف حكالي والله وزعلت جدّاً، بس إن شاء الله  
تقومي من هنا بألف خير.

تقول أم علاء: تشربوا إليه يا جماعة؟ عصير ولا شاي؟

أم أشرف: لا ولا أي حاجة، إن شاء الله بقى العصير والشاي نشربه في البيت لما نطمئن على أم هبة أمّا تروّح بالسّلامة.

تقول أم أشرف لأم هبة: احنا طبعًا كُنّا متفقين مع أم علاء وأشرف بلّغني إن احنا متفقين مع أم علاء إننا هنيجي يوم الخميس، بس احنا كده هناجلها.  
ترد هبة وتقول: طبعًا هناجلها.

وقبل أن تستكمل هبة حديثها تقاطعها أمها وتقول: لا مفيش تأجيل، أنا إن شاء الله بكرة أو يوم التلات بالكثير هخرج من هنا بالسّلامة، وإن شاء الله على معادنا يوم الخميس وربنا يقدم اللي فيه الخير، وإن شاء الله مفيش أي خلاف وأنا لازم أفرح بيهم.

هبة تقول لأمها: هو ده وقته يا ماما، الكلام في الموضوع ده؟! مش لما نطمئن عليكي.  
ترد أم هبة وتقول: أنا الحمد لله كويسة، وأنا مش هرتاح ولا أبقى كويسة إلا لما أطمئن عليكي وانتي لابسة دبتك ومع حد يصونك إن شاء الله، وأشرف باين عليه ابن حلال.

ينظر أشرف إلى هبة بنظرة حب وابتسامة كبيرة؛ فقد جاء اليوم الذي ينتظره من فترة.

تتأفف هبة بداخلها وتبتسم ابتسامة صفراء حتى لا يرى من حولها ما هي فيه بداخلها.

تجلس أم أشرف وأشرف لحظات قليلة، ويتكوا أم هبة وهبة على موعد بلقائهم يوم الخميس إن شاء الله، عندما تخرج أم هبة من المستشفى.

تقول أم علاء لأم هبة: كنتي أجلتيتها أسبوع كمان يا أم هبة لحد ما نطمئن عليكي.  
أم هبة: لا ازاى أأجلها؟ أنا مش عايزه أأجلها، دا أنا نفسي النهاردة قبل بكرة أشبُكها وأفرح بيها، أنا حاسّة إن أنا خلاص في آخر أيامي، ونفسي أطمئن عليها قبل ما أموت.

هبة: ماما، انتي كده بتضغطي عليا، وأنا مش عايزة أزعلك.

تبكي أم هبة وتقول لها: لو بتحبيني وأنا غالية عندك ونفسك أموت وأنا راضية عليكي وأدعيلك دنيا وآخرة يا بنتي؛ تحققيلي أمنييتي دي، هو صعب عليكي تعمليلي حاجة أنا بحبها قبل ما أموت؟ أنا طول عمري عايشة تحت رجلك وبين إيديكي، وبعمل لك اللي انتي عايزاه، ودفنت حياتي وشبابي من بعد ما أبوكي سابني عليكي عشان أربيكي وأعلمك، وجيه اليوم اللي لازم تردّيلي فيه المعروف ده.

تقول هبة: بعد الشر عليكي يا ماما ماتقوليش كده، خلاص حاضر اللي انتي شافاه، وأنا عمري ما حزعلك ولا أقدر إنك في يوم من الأيام تكوني زعلانة.

تقول أم هبة لابنتها: كلّميلي خالتك في التليفون.

هبة: إيه لازمة خالتي دلوقتي؟! هو لسة فيه حاجة؟

أم هبة: لا هو عشان تبقى معانا يا بنتي، وابنها إبراهيم يبقى موجود، يبقى راجل معانا بدل ما نبقى يومها كده مقطوعين من شجرة، وفي نفس الوقت أنا عايزة أطمئن عليها وأطمئنها عليا، وهي هتزعل لو عرفت إن أنا تعبانة ودخلت المستشفى من غير ما نقول لها.

تقول أم علاء: إخس عليكي يا أم هبة؛ برضه انتوا مقطوعين من شجرة؟ وأنا روحت فين؟ دا أنا اليوم ده والله منال وأميرة واعديني إن همّا هيجوا من قبلها بيوم ننصف الشقة ونعمل حاجات حلوة، ونبس هبة ونبقى معاها ونطلعها لأهل عريسها ولعريسها في أحسن منظر.

تقول أم هبة: طبعًا يا حبيبتني، دا احنا أهل واخوات وأصحاب العمر كله، وأنا ماليش غيركوا هنا.

تقول هبة: حاضر، هكلمها آخر النهار.

أم هبة: لأ.. دلوقتي حالًا تروحي تكلمياها.

تترك هبة أمها وأم علاء، تخرج خارج الغرفة وتأخذ نفسًا عميقًا؛ فهي كل ما

يدور بداخل الغرفة لا يسعدها ولا يرضيها، ولكن هي الآن أمام اختيار كبير؛ أن ترضي والدتها وتريحها وهي في أيامها الأخيرة، وأن تُرضي نفسها وغرورها وأحلامها المؤجلة.

تذهب هبة إلى التليفون، تتحدّث إلى خالتها وتحكي لها ما وصلت إليها حالة أمها، وخالتها تقول لها: غدًا سوف نأتي إليكم للاطمئنان على والدتك.

أم هبة وأم علاء في الغرفة، وأم علاء تقول لها: ألف مبروك يا أم هبة، شدّي حيلك يلاً عشان يوم الخميس نطمّن على هبة ونتفق على كل حاجة، وإن شاء الله نقرأ الفاتحة على طول.

تقول أم هبة لأم علاء: أنا طول عمري بجهّز في هبة وجهازها جاهز، يعني إن شاء الله لو اتفقنا ومفیش أي خلاف، وأنا مش حوقف ولا حعرقل حاجة عشان الجوازة تمشي، وإن شاء الله نقرأ الفاتحة على طول ونشوف هما إمكانياتهم إيه. ينتهي اليوم ويأتي اليوم التالي ثم التالي، ويأتي يوم الثلاثاء، تخرج أم هبة من المستشفى بسلام وتكون أختها وصلت من البلد هي وابنها وابنتها، تجلس هبة وأهلها جميعًا وأم علاء في صالة منزلهم تتحدث معهم على ما سوف يحدث يوم الخميس، تقول خالة هبة: إيه يا أم هبة، انتي بعد ما حدّدي وكل حاجة باعتالنا، طيب باعتالنا ليه بقى؟

أم هبة: لا يا حبييتي والله، أنا ما حدّدت ولا حاجة، ده الناس لسّة جايين يشوفوها، كل الموضوع إن أنا اليوم اللي كنا اتفقنا فيه إن هما يجوا أنا تعبت ودخلت المستشفى، ومش أنا كمان اللي كلمتهم، دا أم علاء اللي كانت وسيط بيننا.

تقول أم علاء: يا حبييتي ماترعليش والله، دا الموضوع كله جيه فجأة وأنا اللي كنت موجودة، كنت معدّية فأشرف وقفني وقال لي وأنا قولت لأختك، وأختك قالتلي حدّدي معاهم معاد، واليوم اللي حدّدنا فيه على إنه الخميس الجاي أختك تعبت ودخلت المستشفى ومالجقناش نبليخ حد.

تقول خالة هبة: طيب ربنا يتمم على خير يارب، وإن شاء الله تفرحي بيها.

تقول أم هبة: نفسِي وأمنية حياتي أفرح بيها قبل ما أموت.

تقول أختها: بعد الشر عليكي يا حبيبتِي، إن شاء الله تفرحي بيها، ما هي بنتك اللي دماغها ناشفة، لو كانت وافقت على إبراهيم من السنة اللي فاتت كان زمانك مطمئة عليها، وكان زمانها في وسطينا وأنا كنت حطيتها في عيني.

تقول هبة لخالتها: خلاص يا خالتي، كل شيء نصيب، وده مش وقته، وانتي فكرك يعني أنا موافقة ولا راضية على أشرف ولا على غيره؟ أنا نفسي أكمل تعليمي وأكمل كليتي، بس أنا ماما اللي مش راضية ومصممة، وأنا مش عايزة أزعلها.

تقول خالة هبة: ليه يا بنتي؟! أمك خايفة عليكي ونفسها تطمن عليكي واحنا كمان، احنا ستات وولايًا ولازم يكون ليكي راجل وسند.

يستكملوا الحديث لترتيب يوم الخميس، ويأتي يوم الأربعاء، وتأتي منال وأميرة إلى أهمهم وينزلوا لزيارة أم هبة والاطمئنان عليها وترتيب أحداث يوم الخميس، ويختاروا مع هبة ملابس هذا اللقاء ويرتبوا المنزل ويجهزوه بالورد والشموع وتحضير الحلوى والمشروبات التي ستقدم يوم الخميس.

يأتي يوم الخميس الساعة السابعة، ويأتي أشرف وأمه وأخته للتعرف على هبة وأمها ويتحدثوا سويًا على كل شيء بخصوص الخطوبة.

تقول أم هبة: عايزة في أسرع وقت يا جماعة نحدد قراية الفاتحة، أنا تعبانه ويا عالم لو عيشت النهاردة مش حعيش بكرة.

تقول أم اشرف: إن شاء الله كله خير يا حبيبتِي.

تقول أم هبة: أنا مجهزة هبة بجهازها الكامل وكله موجود، وإن شاء الله مفيش أي خلاف.

تقول أم أشرف: واحنا كمان جاهزين من جنيه ل ١٠٠ ألف جنيه، وأحلى عفش حجيلهم، وانتوا عارفين إن أشرف له شقة في بيت أبوه، وده ابني الوحيد، وأنا مش

حبخل عليه بحاجة، وشغله مضمون وكسيب، وبيكسب من وقفته في معرض أبوه  
الي هو معرضه.

يقول أشرف: خلاص يا جماعة، إن شاء الله أول الشهر الي جاي ميعاد الخطوبة.  
ترد هبة تقول: معلش يا جماعة مش حينفع أول الشهر عشان امتحانات  
الجامعة بتاعتني.

تقول أم اشرف: جامعة إيه يا حبييتي؟ احنا بنتكلم في جواز وخطوبة وانتي  
تقولي جامعة.

تقول هبة: ما أنا مش حسيب جامعتي، وده أول شرط لموافقتي على الجواز.

تقول أم اشرف: وده تعقيد يعني!؟

يقف أشرف وينظر إلى أمه، ويقول لها: خلاص يا ماما، الي الأستاذة عايزاه  
أنا عمله.

تقول أم أشرف: الأستاذة! خلاص يا حبيبي شيلوا الألقاب، دا انتوا خلاص بقيتوا  
في حكم المخطوبين، واحنا خلاص قرّينا نقرا الفاتحة.

يقول أشرف: لا طول ما هي بتتعلم وطول ما أنا لسّة ماكتبتش عليها  
حتفضل الأستاذة، خلاص نستنى نقرا الفاتحة الخميس الجاي عشان بس أقدر  
أزورها ولأ أوصلها بالعربية الجامعة، أو أي حاجة أقدر أشوفها، وإن شاء الله بعد  
ما الامتحانات بتاعة الأستاذة تخلص نحدّ الخطوبة.

تقول أم هبة: لا مش خطوبة، أنا عايزة كتب كتاب على طول.

تقول هبة: ماما.....

تقول أمها: شششششششش، أنا عايزة كتب كتاب على طول يا جماعة، دي  
الأصول، ما دام حنلبس شبكة ونخطب يبقى نكتب الكتاب، احنا اتنين ستات  
ولايّا عايشين لوحدها، وماينفعش أشرف يفضل داخل طالع علينا الفترة دي كلها  
من غير ما يكون ليه شكل رسمي قدام الناس، الخطوبة حتمنعه إنه يدخل  
علينا أو ياخذها ويخرج؛ عشان كده لازم نكتب الكتاب وتبقى مراته يدخل يخرج

بيات محدش من الجيران ولا من أهل الحتّة ياكلوا وشنا، ولا إيه؟! مش دي الأصول.

يرد أشرف يقول: ونعم يا حاجة، أنا كان نفسي أقول كده بس خُوفت انتوا اللي ترفضوا.

تقول أم هبة: لا يا حبيبي إزاي؟ أنا عارفة الأصول كويس، وهو ده اللي لازم يحصل.

هبة غير راضية عن الذي يحدث تمامًا، وكل الكلام الذي تسمعه، من داخلها رافضة له، لكن ليس بيدها أي حيلة غير أنها تقول حاضر ونعم لتحقيق أمنية والدتها وهي في أيامها الأخيرة وفي عزّ مرضها.

وينتهي اليوم على هذا الوضع.....

تمر الأيام على هبة تشبه بعضها، مسلوبة الرأي والإرادة تقول حاضر على أي شيء، ونعم لأي شيء، جميل على أي شيء.

يأتي يوم قراءة فاتحتها على أشرف، تقوم على صوت زغاريد أمها وخالتها وابنة خالتها، وصوت أم علاء ومنال وأميرة في صالة بيتها.

تدخل عليها بنت خالتها رشا وتقول: قومي يا هوبا يلاً، دا وقت نوم، يلاً لسة حنوح للكوافير ونظبط حالنا.

هبة: كوافير عشان قراية فاتحة؟! إمال لو دُخلة حتعملوا فيا إيه؟!

رشا: لا زمانًا بنعمل حاجة تانية هههههههههه.. مالك يا هبة أنا حاسه إنك مش مبسوفة؟

هبة: ياااااااااا أخيراً حد سألني مالك وحسّ إني مش مبسوفة، بقالكوا أسبوع محدش لا حسّ ولا سألني مالك.

رشا: بُصي يا هبة يمكن أنا أصغر منك آه، وماكملتش تعليمي زيك آه، بس كل شيء في الدنيا دي نصيب، خصوصًا الجواز ومادام نصيبك جيه ماتقدريش تهربي منه، المهم إنك تعيشيه زي ما انتي عايضة، وبالتفاهم والعقل تقدري عملي كل

اللي نفسك فيه، أنا شايفة أشرف غلبان وبيحبك، وممكن لو كسبتيه يعمل لك كل اللي نفسك فيه، ومادام مقتدر مادياً يبقى مش حيقى فيه مشاكل أبداً، ولو على الحب حيي بال عشرة زي ما كلنا حيينا أجازنا بال عشرة، وأنا أهو بقالي سنة متجوزة وحامل، وأخذت على طبع جوزي وأهو عايشة، وإبراهيم اللي كان مايعجبهوش واحده في بلدنا نصيبه جابُه في قدرية، كانوا أول جوازهم صوتهم يجيب البرّ كله ومع الوقت خدوا على بعض ويتمنأها الرضا ترضى، خصوصاً بعد ما جابوا يوسف ابنهم، ارضي بنصيبك يا بنت خالتي وماتبصيش ل فوق.

وتشاور لها رشا بأصبعها وعينها على سقف غرفتها تلميحاً لها بأنها تعرف موضوع علاء، وتقول: يلاً يا بنت بسمة قومي البسي خلينا نلحق وقتنا. وترتكها في غرفتها وتخرج.

تخرج هبة خلفها تجد الجميع في صالة بيتها وسط أمها وخالتها يتمايلون ويصقون على أنغام أغنية يا دبلة الخطوبة.

ترى هبة لمعة فرح في عين أمها وابتسامة لم ترها من قبل، وأول ما تراه أمها تقوم وهي تصلب ظهرها وتنسى تعبها وآلامها، وتجري على هبة وتأخذها بالحضن، والدموع السعيدة تملأ عينيها، وتقول لها: مبروك يا روح قلب أمك، عايزاكي قمر النهاردة، فاهمة؟

هبة تنظر في عين أمها وتهز رأسها بالموافقة، وتبتسم وتقول بداخلها: فداكي مستقبلي وسعادي يا أمي، وأفضل شايفة الابتسامه دي على وشك طول العمر. تنزل هبة وبنت خالتها رشا وأميرة بنت أم علاء في طريقهم إلى الكوافير، تجلس هبة بجوار نافذة الشباك وتسرح في دنياها الجديدة التي تخطوها رغماً عن إرادتها، وتتوه في عالمها الذي كانت تحلم أن يتحقق، وتخرج من شرودها عندما تسمع أغنية هاني شاكر التي شغلها سائق التاكسي وكأنها رسالة يوجهها القدر لها لآخر مرة، كلماتها؛ (نسيانك صعب أكيد، مالهوش غير حل وحيد، أبداً من تاني حياتي وأصادف حب جديد، ولون الحب التاني مش حيرجعلي زمانى، ولا

حيعوّص حرماني اللي في حبك بيزيد، لكن طول ما انت في بالي صورتك دايماً في خيالي، نسيانك صعب أكيد... نسيانك صعب أكيد)

تسقط من عينها دموع لا تعرف سببها..

ينتهي النهار كما رتّب له الجميع، وبلغت الساعة السادسة مساءً وجميعهم في انتظار وصول العريس وأهله الساعة السابعة.

تظل هبة في غرفتها، وتتجول في الغرفه ذهاباً وإياباً.

تدخل عليها أميرة وتقول: احنا حنقلق من دلوقتي ولا إيه؟ لسّة فاضل ساعة.

تنظر هبة الى أميرة وتقول: أبلّة، انتي طول عمرك أختي الكبيرة وصاحبتي،

أنا عايزة أعمل حاجة لآخر مرة.

أميرة: أنا فاهمياي يا هبة، وعارفة انتي عايزة إيه، بس فكرِك حترتاحي لو

عملتِي كده؟

هبة تهز رأسها بالموافقه والدموع تسقط منها.

تقول أميرة: طيب تعالي معايا.

وتأخذها من يدها وتخرج بها من غرفتها متجهة إلى باب الشقة.

تنادي أم هبة عليهما: الله! على فين يا بنات؟

أميرة وهي متقلقة: دا احنا طالعين فوق بس ٥ دقائق.

أم علاء: ليه خير؟!

هبة تنظر إلى أميرة، وترد أميرة: أصل... أصل شعر هبة فكّ والمكوة بتاعتها

باردة أوي، فهعيد عليه بسرعة فوق بالمكوة بتاعتني وننزل بسرعة.

تقول أم هبة: إن شالله يخليكي يا أميرة ويبارك في ولادك يارب.

تصمت أم علاء؛ فهي تعلم أن ابنتها تكذب، ولكن لا وقت للاستفسار.

تخرج هبة و أميرة من باب شقتها وتصعد مع أميرة إلى شقتها، وتدخل

من الباب إلى الصالون حيث يوجد التليفون وبجواره أجندة التليفونات، وتطلب

السنترال وتقول نحتاج إلى مكاملة دولية، ومملهم رقم علاء وتعطي السماعه لهبة، وتركها وتغلق الباب عليها، وتنتظر بالخارج وتقول: ماتطوليش عشان الناس اللي جاية.

تبتسم لها هبة وهي مستغربة؛ لهذه الدرجة أميرة تفهمها وتشعر بها وتتعاون معها.

تضع هبة السماعه على أذنها وصوت دقات قلبها أعلى من صوت جرس الهاتف الذي يدق في أذنها.

على الجانب الآخر علاء بالصدفة يفتح باب شقته بعد عودته من شغله، يسمع صوت التليفون، يتجه إليه وهو ينادي على زوجته ولم تُجبه.

يضع السماعه على أذنه وهو يستغرب أين ذهبت هذه المرأة! ويقول: ألو...

تسمع هبة صوته، تحاول أن تستجمع قواها وتبلع ريقها، وهو على الخط الآخر يكرّر: ألو ألو...

تتشجع هبة وتقول: ألو... أبيه علاء؟

علاء يجلس مسرعًا إلى أقرب كرسي بجوار التليفون وظهره لباب الشقة، يأخذ نفسًا عميقًا بعد أن تسارعت دقات قلبه لسماع صوت هبة الغير متوقع.

علاء: ألو.. هبة؟

هبة: أيوة أنا هبة.

علاء: إزيك؟

هبة: أنا الحمد لله، وانت ازيك؟

علاء: الحمد لله.

هبة: انت عارف إن قراية فاتحتي النهاردة؟

علاء: آه، أمي قالت لي.

هبة: وانت إيه رأيك؟

علاء يصمت ولم يرد.

هبة: قولها يا علاء، قولها ولو لمرة واحدة، واجه نفسك بحُبِّك ليا وطز في الناس والمجتمع، المهم احنا، قولها ولو بإشارة إنك بتحبني وعايزني، وأنا أبيع الدنيا كلها وأستناك.

علاء: ماعادش ينفع يا هبة، ماعادش ينفع قبل ما آجي هنا وأتجوز وأبقى مسؤل عن واحدة كل ذنبها إنها استأمنتني، ماعادش ينفع حتى لو مش مبسوط، حتى لو عايش غضب عني، برضه ماعادش ينفع، فات الأوان.

هبة: يعني ده آخر كلام عندك؟ انا كده أبقى عمّلت اللي عليّا للآخر، ماتلومنيش مع الوقت.

علاء: انزلي يا هبة لضيوفك وعريسك وافرحي وافرحي أمك وانسيني، ربنا يوفقك.

ويضع علاء السماعة لكي ينهي المكالمة قبل أن كلام هبة وصوت دموعها ودقات قلبها يجعلوه يضعف ويعترف لها باحتياجه وحبّه. ينتبه من شروده على صوت زوجته التي عادت من الخارج وواقفة خلفه ولم يشعر بها.

تقول وهي تنظر بسخرية: مش دي هبة بنت بياعة الهدوم جارتكم؟!!

علاء: بياعة الهدوم! أه خير؟!!

سلوى: لا أبداً، كانت عايزة منك إيه بقى؟

علاء يقف من مكانه ويهرب من النظر في عين زوجته، ويقول: ولا حاجة، قراية فاتحتها النهاردة وهي بتبّلغني، ما انتي عارفة أنا اللي مربّيها وبتعتبرني أخوها الكبير، وبتقول لي يا أبيه.

سلوى: هههههههههه، طيب يلاً يا أبيه، أنا كنت في السوق وجييت بيتزا وأنا جايّة، تعالي نتغدى.

وتتركة وتذهب في اتجاه السفارة..

على الجانب الآخر مازالت هبة رافعة السماعه، ورغم عدم وجود صوت فيها  
تنتبه على صوت أميرة تطرق عليها باب غرفة الصالون، وتنادي: يلاً يا هبة أمك  
وأمي فضحونا؛ عمّالين ينادوا بيستعجلونا.

وتضع أميرة السماعه من يدها وتحاول أن تخفّف عنها حزنها وتمسح دموعها،  
وتقول لها: انسي يا هبة.. انسي، أنا خلّيتك تكلميه عشان تعرفي إن الصح اللي  
بيحصل دلوقتى، يلاً اضحكي وانزلي فرّحي أمك وافرحي، دا انتي عروسه.  
وتنزل هبة مع أميرة.

تدخل غرفتها... تجلس علي كرسي في الشرفة منتظرة الدقائق الأخيره حتى يأتي  
موعد أشرف، تقوم بالضغط علي التسجيل لكي تخرج نفسها وتفكيرها من حزنها،  
ولكن ما زالت لعبة القدر تستمر؛ فهي لا تتذكر ما هو شريط الكاسيت الموجود  
داخل المسجل، ومجرد الضغط عليه تسمع صوت هاني شاكر يقول:

(امتدّت الإيدين هربت دموع العين

واتسمّر الزمن ما بين العاشقين

لا سألته نعمل إيه، ولا قال لي حنوح فين وهما الكلمتين

قال لي مع السلامة، وأنا قولت مع السلامة وماتت الابتسامه

ماتت الابتسامه وبردت الإيدين آهين آهين آهين

يلاً السلامة من ده اليوم الحزين

دا وداع فقير مايلقش بالجراح

ولا بالحب الكبير ولا بالحلم اللي راح

دا كان وداع فقير مايلقش بالحكاية

وكأنه خيط حرير وقطعناه من البداية)

وتنتبه به على صوت أمها تغلق الكاسيت وتقوم.

مر يوم قراءة فاتحتها ومرت أيام كثيرة بعدها...

وجاء أول يوم امتحان هبة وهي مستعدة للامتحان؛ فالذاكرة هي مهربها  
الوحيد في تلك الأيام السابقة.

تنزل هبة من منزلها تجد أشرف واقفاً تحت منزلها..

أشرف: صباح الخير يا جميل، أنا جيت أهو عشان أوصلك.

هبة: توصلني ليه؟ أنا حروح لوحدي.

أشرف: تروحي لوحده ده إيه؟ انتي مخطوبة للوسي!

هبة تضحك وتقول: لوسي!!

أشرف: آه، يلا اركبي حتتأخري.

تركب هبة...

يقول أشرف: هي الامتحانات حتخلص امتي؟

هبة: لسنة ٢٠ يوم تقريباً.

أشرف: حلو... هانت أهيه.

هبة: هانت على إيه؟

أشرف: عشان نكتب الكتاب ونعليّ الجواب.

هبة: آه، ربنا يسهل... ربنا يسهل.

أشرف: حتخلصي الساعة كام بقى؟

هبة: ليه؟!

أشرف: عشان آجي أأخذك.

هبة: لا لا، مفيش داعي.

أشرف: دا ازاي يعني؟ إمال أسيبك للمواصلات ولا التاكسيات، دا اسمه كلام!

هبة: أصل حقف مع أصحابي شويّة بعد الامتحان آخذ منهم مذكرات

وحاجات مهمة للمادة الجايّة.

أشرف: وأصحابك دول بنات ولا شباب؟

هبة: نعم؟!!

أشرف: إيه؟ بلاش أسأل؟!!

هبة: لا بس صيغة السؤال لسة بدري عليها شوية.

أشرف: شوفي يا أبله.. لا أبله إيه بقى، شوفي يا هبة.

هبة: شوف انت يا أشرف، وياريت تسمّعي للآخر، أنا الجواز والخطوبة ماكانوش في دماغي أصلاً، ولو كنت وافقت على حاجة فهو عشان أمي وحالتها اللي انت شوفتها بعينك؛ لأن هي من وجهة نظرها إن الجواز سُترة وإنها كده حتبقى مطمّنة علياً لو جralها حاجة.

أشرف: ووجهة نظركِ انتي إيه؟

هبة: وجهة نظري إننا لسة يادوب قراية فاتحة، يعني مش كل الصلاحيات من حقك، وبلاش تقتحم حياتي مرّة واحدة كده وأحس إنك رقيب علياً وعلى تصرفاتي، أظنّ أنا عايشة طول عمري لوحدي وعمرك ما سمّعت عني كلمة مالهاش لازمة، فياريت يكون فيه فرصة نتعرّف على بعض واحدة واحدة من هنا لحد كتب كتابنا من غير أوامر ولا شروط.

أشرف: معنى كده إنك موافقتيش علياً بمزاجك، وكله عشان الست الحاجّة،

يعني مغصوبة على الجواز، صح؟

هبة: مش موضوع مغصوبة ولا راضية، موضوع إننا عايزين وقت بس نحاول نفهم بعض.

أشرف: لو على الوقت نصبرُ مفيش مشكلة، وكلها شهر بالكثير وتبقي خطيبي رسمي ومراتي كمان، وساعتها برضه حسألك أصحابك بنات ولا شباب.... ويضحك.

تصل هبة إلى جامعتها، ويمر أول يوم امتحانات على خير، وتمر باقي الأيام حتى يأتي آخر يوم ويذهب أشرف لهبة الجامعة ليأخذها كما تعود طوال فترة الامتحانات، ويقول أشرف: الحمد لله خلّصتني على خير، عقبال كل سنة وبالنجاح

إن شاء الله، حسيبك يومين ترتاحي، وبعد يومين بالظبط حستنى منك تليفون  
عشان نحدّد كتب الكتاب بقى.

هبة: انت مستعجل كده على طول؟

أشرف: وما أستعجلش ليه؟! أنا وقّيت بوعدى وخلّيتك تخلصى امتحانات أهو،  
نستنى ليه تاني؟

هبة: أشرف هو انت بعد كتب الكتاب حتخلّيني أكمل تعليمي؟

أشرف: وماله العلام مش وحش، كمّلي لحد ما تقولي استكفيت، مادام ده  
حيرضيكي وحتكوني مبسوطة خلاص، بس طبعًا بعد الجواز.. الجامعة والمذاكره  
مياأثروش على بيتك وتهمليني، بقى جوزك حبيبك ولا إيه؟  
هبة: آه طبعًا، إن شاء الله.. ربنا يسهل.

أشرف: حمد الله على السلامة يا جميل، وزّي ما قولتلك يومين بالكثير ونحدّد  
معاد الفرح، تمام؟  
هبة: إن شاء الله، سلام.

.....

على الصعيد الآخر علاء فى غربته، وكل يوم يمر يثبت له سوء اختياره لسلى  
عن اليوم الذى قبله؛ فهو اختار الجمال والمنصب، ولكن ليست كل امرأة تصلح  
لأن تكون زوجة؛ فالشكل ممكن أن يتغير، ولكن الطبع صعب تغييره، وإن الزواج  
دون حب كالمريض الذى يحتاج الى تنفس صناعي دائماً؛ فهو لا يستطيع أن يعيش  
دون تنفس، ولكنه ليس لديه القدرة على التنفس أصلاً.

علاء: مالك؟! بقالك كام يوم كده ما بتخرجيش زي العادة يعنى وقاعدة فى  
البيت.

سلى: حاشة إني تعبانة شوّبة.

علاء: تعبانة ازاي يعنى؟

سلوى: مش عارفة بس مش مطبوطة.

علاء: طيب ما نكشِف لو تحبي.

سلوى: ماشي، بس ممكن بكرة، أنا مش قادرة أنزل النهاردة.

علاء: طيب، أنا واخد بُكرة أجازة عشان عايز أروح البنك أبعث لأمي واخواتي فلوس، لو تحبِّي تنزلي معايا ونعدِّي نكشف بعد ما أخلص ونطمئن.

سلوى: إن شاء الله، بس قول لي هو انت حتحوّل لهم كام؟

علاء: دا اشمعنى يعني؟ يخصّك في إيه؟

سلوى: يعني إيه يخصني في إيه؟! مش أعرف.

علاء: لا طبعًا، دي حاجة بيني وبينهم، وخصوصًا أمي.

سلوى: طيب أمك وقولنا معلش... لازم تبعتها، لكن إخوانك ليه بتبعتلهم؟  
مش هما متجوّزين ومسئولين من رجالتهم.

علاء: بُصِّي... عشان الموضوع ده مايتفتحش تاني، أنا بالنسبة لإخواتي أبوهم وأخوهم الكبير، مش معنى إنهم متجوّزين إنهم مايكونش ليهم دخل، لا طبعًا، دول مسئولين مني.

سلوى: آه مسئولين منك، بس أنا ماما قالتلي إنك مش ملزوم تبعت ليهم ولا تجيبيلهم حاجة، ولو جيبت يبقى من باب الذوق كده مش فرض عليك.

علاء: ماما! ماما دي هناك تقول الي عايزاه براحتها، مالهش إنها تدّخل في حياتي، وبعد كده أي حاجة تخصني وتخصّ عيلتي ياريت ماتتحكيش لماما، وكفاية بقى كلام.

ويتركها ويدخل غرفته الأخرى التي يجلس فيها عندما يريد أن يهرب من سخافات سلوى، يرى الكاسيت موجود على المكتب، يفتح درج المكتب يجد أكثر من شريط كاسيت، منهم شرائط خاصة بالموسيقى التي كان يسمعها قبل زواجه، ويلفت انتباهه وجود شريطين مكتوب عليهما هاني شاكر.

يتذكر هبة وأيام أغاني هاني شاكر التي كانت تخرج من حجرتها دائماً، يختار شريطاً منهما بشكل عشوائي ويضعه في الكاسيت، ويجلس على كرسي المكتب ويضع رجله على سطح المكتب ويشغل الكاسيت، وتبدأ الموسيقى، يضع يده وراء رأسه ويستمتع إلى أغنية هاني شاكر، وتقول:

(أيوه سيبتك غصب عني... القدر كان أقوى مني

بس وحياتك ماخنتش غلطتي إني مقولتتش

عن سبب بعدي ورحيلي لما كنتي بتندهيلي

ارجعيلي

انتي أول حب عيشته... انتي آخر حُب عيشته

أحلى حلم في يوم حلمته... صدقيني وارجعيلي

نفسِي أقول لك لسة دايب في اشتياقي

واللي بيسكتني خوفاً وكبريائي)

يشعر علاء بضيق ويتذكر هبة وحبها لها، يغلق الكاسيت ويذهب إلى النوم

وهو يهرب حتى من نفسه عندما يحاول التفكير فيها....

ويأتي ثاني يوم.. يقوم علاء وينادي على سلوى لكي تقوم وتجهز نفسها لكي

تنزل معه.

ينهي علاء مشواره ويذهب معها إلى المستشفى، ويتم الكشف على سلوى

ويكتشفاً سوياً أن سلوى حامل.

يشعر علاء بالذهول والفرحة والخضة في نفس الوقت.

أما سلوى: ما تقول حامل. وتصمت.

ويخرجها سوياً ويعودا للمنزل، يقول علاء: أنا لازم أكلّم ماما وأقول لها، دي

حتفرح أوي.

سلوى: لو سمحت يا علاء ماتعرفش حد دلوقتي.

علاء: ليه خير؟

سلوى: كده.. لحد بس ما أفكر كويس حمل إيه.

علاء: تعلمي إيه في إيه؟!

سلوى: انت عارف يعني إيه حمل، يعني بطني تكبر وجسمي بيُوظ، ومفيش بقى لا خروج ولا دخول ورضاعة وبامبرز، لا لا أنا مش مستعدة لده دلوقتي.

علاء ينظر لها باستغراب ويقول: انتي بتتكلمي بجد؟

سلوى: آه طبعًا بتكلم بجد، أنا عاملة حسايي إني مش قبل ٥ سنين على الأقل، تكون انت جبت عربيّة أحدث موديل وفيللا والشغالة الفلبينية، وبعدين أخلف وأنزل أعيش في مصر.

علاء: يااااه ده انتي مخططة زي ما تكوني عايشة لوحديك، وأهو ربنا خَلَف ظنك وحملتني، وإن شاء الله برضه كمان ٥ سنين حيكون عندنا كل ده.

سلوى: لا طبعًا، دا حمل تاني ومصاريف تانية.

علاء: يا ستي هو أنا اشتكيت لك؟

سلوى: برضه ماتعرفش حد لحد ما أكلم ماما وأعرف وأرتب معاها حمل إيه.

علاء: يادي ماما، عامة إوعي تاخدي قرار لوحديك، ماما تقول لك براحتها، لكن أي قرار لازم تتكلم فيه، مفهوم؟

يتركها ويخرج من المنزل، وتحدث سلوى مع أمها...

سلوى: ماما، الحقيني أنا حامل.

أم سلوى: حامل إزاي على البرشام، هو انتي مابتاخديش الحبوب؟

سلوى: لا والله باخدها كل يوم، المهم حمل إيه دلوقتي؟

أم سلوى: خلاص العمل عمل ربنا يا بنتي حملتي وخلص.

سلوى: لا بقى، أنا مش عايزة الولد ده، أنا لسة ماحققتش اللي أنا عايزاه،

والولد ده حَيْخَلِّيْ عِلاءِ فِلسه تَقِلِّ بسببِ مسؤليته، وأنا لَسَّة عايِزة حاجات كثير أوي.

أم سلوى: إمال حنعمل إيه بس؟! أنا معاكي إنه مش وقت حمل، وكنت عايِزايِ تقصِّصِي ريشه وتجيبيك كام طقم ذهب كده من عندِك وتعمليلك قرشين في البنك، وتجيبي عربية آخر موديل، بس ماتقلقيش، خليكي معايا وبرضه حنعمل اللي عايِزينه.

سلوى: لا الولد ده لازم ينزل.

أم سلوى: يالهوري، لا يا بنتي اعقلي، جوزك مش حيعديها.

سلوى: طيب اقلي دلوقتي يا ماما، أنا حفكر كده وأرتب أموري وحكلمك.

تغلق سلوى الخط مع أمها وتفكر كيف تتخلص من هذه الورطة؛ فالحمل بالنسبة لها لم يكن حلماً ولا طموحاً؛ فهي عاشت حياة مدللة لدرجة الدلع الزائد؛ فكل طلباتها مجابة، لا تشعر بأي مسؤولية ولا تستطيع أن تتحملها.

يمر يومان وعلاء وسلوى كل منهما يتلاشى الكلام مع الآخر، يخرج علاء إلى صالة بيته فيرن هاتف منزله ويجيب: ألو.

أم علاء: ازيك يا حبيبي عامل إيه؟

علاء: أهلاً يا أمي، وحشتيني.

أم علاء: انت كمان وحشتيني، بس ليه يا علاء حاسة إنك مش مبسوط يا حبيبي؟

علاء: لا والله عادي يعني متاعب الشغل، وهنا زي ما انتي عارفة مفيش مجال لأي ترفيه، من البيت للشغل ومن الشغل للبيت.

أم علاء: طيب يا حبيبي مش تتجدعن كده وتفرحني بحتة عيل يقول لي اعمليلي بطاطس يا تيته.

علاء يصمت لثواني، ويقول: والله يا أم علاء باينته كده حتعملي بطاطس قريب. ويضحك.

أم علاء: إيه؟ فرحني... مراتك حامل؟

علاء: شكلها كده.

أم علاء: شكلها يعني إيه يا بني؟! ما هي يا حامل يا لأ، يعني كشفتوا وحللتوا وكده؟

علاء: هي تعبت من كام يوم وكشفنا، والدكتور قال حامل في شهر لسنة، وطلب تحاليل نتأكد.

أم علاء: يبقى بأمر الله حامل، آه... ما هي الحاجات دي بتتعرف على طول، مبروك يا حبيبي، ناديلي سلوى أسلم عليها وأقول لها ألف مبروك.

علاء: إيه.. آه.. سلوى أصلها نايمة، لما تصحى إن شاء الله أنا حوصل لها سلامك.

وتنتهي المحادثة.

يغلق علاء الخط، يلفت نظره أن سلوى واقفة على مدخل الريسبشن تتصنت لحديثه مع والدته، فيقول لها: انتي واقفة كده ليه؟ ولما انتي سامعاني مجيتيش ليه تسلمي على ماما؟

سلوى: واقفة بسمع حتقول إيه، وكنت متوقّعة إنك مش حتخبّي وحتقول لمامتك كل حاجة.

علاء: أخبي إيه وأقول إيه؟!

سلوى: مش أنا قولتلك محدّش يعرف بموضوع الحمل دلوقتي؟

علاء: هي سألتني وأنا ماينفّش أكذب عليها، عشان لو عرفت بعد كده حتزعل منّي.

سلوى: بعد كده؟! وحتعرف منين أصلاً؟

علاء: ليه؟! احنا حنخيه، ما هو حيان حيان.

سلوى: هو إيه اللي بيان؟

علاء: حملك.

سلوى: مش لو كان فيه حمل أصلاً.

علاء: يعني إيه؟! ما احنا كشفنا وحللنا وطلعتي حامل.

سلوى: قصدك كنت حامل.

يقوم علاء من مكانه مفزوعاً ويمسكها من ذراعها، ويهزها بقوة ويقول:

يعني إيه كنتي حامل! انتي عملتي إيه؟!

سلوى: عملت اللي لازم يتعمل، مابقاش فيه حمل، سقطت نفسي.

علاء: إيه؟! انتي بتقولي إيه؟ وازاي تعملي كده؟ انتي اتجننتي؟

سلوى: لا ماتجننتيش، بس تقدر تقول لي نخلف ليه وعشان إيه واحنا بنتخانق

أكثر ما بنتصالح وكل واحد منّا عايش في عامله، أنا عارفة إنك مابتجنّيش ولا

حتى بتحاول، وأنا بالنسبة ليك جوازة والسلام، بس عادي ده مش فارق معايا،

أنا كمان مابحكش وجوازي منك جواز عقلائي، شاب كويس ومحترم ومن عيلة

ومستقبلك كويس، وبس.

علاء: طيب وليه محاولتيش تحبّيني فيكي؟ ليه متعمّدة دايمًا تعملي صدام،

إزاي تنزلي الجنين من غير ما أعرف؟ إزاي تاخدي قرار زي ده لوحك؟

سلوى: أحببك فيا؟! أنا سلوى الشريف اللي كل رجالة عيلتي وشارعنا كانوا

يتمنّوا بس أصبّح عليهم مش هي اللي تتحايل على حد عشان يحبها، وبعدين

انت عايز جاه وتعليم وجمال أكثر من كده إيه عشان يتحبّ.

علاء: جمال؟! لا أنا مش عايز جمال، أنا عايز روح... روح تحبّني وتفهمني

وتحسّ بيّا، روح تكلمني وتشدّني ليها، انتي جميلة آه، لكن باردة.. باردة، وأنا

مش حعديها ليك بالسهل إنك تتخلّصي من الجنين من غير ما أعرف، وحسابي مع

أمك الصبح في التليفون.

سلوى: عايز حد يفهمك ويكلمك، ااااه طيب، عامة الحمد لله إن البيبي نزل،

أنا ماكنتش مستعدّة لا نفسيًا ولا جسمانيًا، ليه ألخّم نفسي من دلوقتي؟ وأهو

فرصة بقى أعرفك وأكلمك وأفهمك، يمكن نقرب من بعض على رأيك.

علاء: للأسف اللي عملتيه ده بعدنا عن بعض أكثر وأكثر، عن إذنك.

ويتركها ويدخل غرفته ويغلق الباب.

تنادي أم هبة على هبة وتقول: يا بنتي بقالك أسبوع مخلصه امتحانات وخطيبك كل يوم يتصل يسألني حنحد كتب الكتاب امتي، شكلنا بقى وحش.

هبة: شوفي يا ماما امتي، أنا أي وقت مش فارق معايا.

أم هبة: أنا الجلسة الجاية بتاعتي امتي؟ جلسة الكيماوي.

هبة: اشمعنى؟!!

أم هبة: امتي بس؟

هبة: تقريبا كده كمان ٤٠ يوم.

أم هبة: خلاص يبقى زي النهاردة الشهر الجاي نكون فرحنا بيكي قبل الجلسة اللي بتهدني دي وبقى شكلي زي الميتين، خير البر عاجله يا بنتي، أنا مش ضامنة حعيش بعدها ولا لا.

هبة: بعد الشر يا أمي، ليه كده بس؟ حاضر اللي انتي شايفاه ويبسطك حنعمله.

أم هبة: إلهي يريح قلبك يا بنتي ويسعدك، خلاص قومي يلا كلميه انتي وقوليله على المعاد، وخليه يجي يتغدى معنا النهاردة ونتكلم في التفاصيل كلها.

هبة: يتغدى مرة واحدة! ما أنا حقول له في التلفزيون، إيه لزمته الغدوة دي؟

أم هبة: قومي يا بت بلاش دلح يلا، آه صحيح... قوليلي البت اللي جبتها

تشتغل في المحل كويسة؟

هبة: آه كويسة، مطلقه وعايشة مع أمها ومحتاجة قرشين، وهي بتفتح وتقفل بمواعيد ثابتة بدل ما احنا كل ما يطلعنا مشوار نقفل المحل بالساعات، وأنا مباشرها ماتقلقيش.

أم هبة: انتي قولتيلي اسمها إيه؟  
هبة: ماجدة.

بعد قليل تنزل أم علاء لأم هبة...  
أم علاء: ازيكوا النهاردة.

أم هبة: أهلاً يا حبيبتي، تعالي.

أم علاء: أخبارك إيه النهاردة؟

أم هبة: أهو الحمد لله كويسة شوية، شوية ألم وشوية وجع وشوية تمام.

أم علاء: معلش يا حبيبتي ربنا يشفيكي يارب، إمال البت هبة فين؟

أم هبة: جوه بتعمل الأكل.

تسمعها هبة، وتقول وهي في المطبخ: أنا أهو يا طنط، حخلص الأكل وأجيلك.

أم علاء: براحتك يا حبيبتي.

أم هبة تنظر لأم علاء وتقول: مالك ياختي متضايقه ليه؟

أم علاء: والله يا أم هبة انتي بتفهميني أكثر من نفسي.

أم هبة: طبعا، دا احنا عشرة عمر، قولي ياختي وفضفضي مالك.

أم علاء: مش عارفة قلبي كده مش مرتاح، قلقانة على علاء.

أم هبة: ليه خير كفى الله الشر؟ فيه حاجة؟!

أم علاء: ما انتي عارفة علاء كُثوم ومابيحكيش حاجة، بس آخر مكاملة له

ماطمّنتنيش.

أم هبة: ليه بس؟

أم علاء: بيقول لي احتمال تكون مراته حامل، بس حاسة إنه عايز يقول

حاجة أو متضايق من حاجة.

أم هبة: يا ألف نهار مبروك، ربنا يكمل لها على خير، بس قوليلي ياختي هو

إيه احتمال دي؟ هو الحمل اليومين دول بالاحتمالات؟

وتضحك أم هبة وتضحك أم علاء.

وتقف هبة بالمطبخ تسمع حديثهما...

أم علاء: أهو هو ده اللي قالهولي، يومين كده وأكلمهم أطمن عليهم وأعرف، قوليلي... ما حددْتُوش كتب الكتاب؟

أم هبة: آه إن شاء الله آخر الشهر اللي حبيداً بكرة، ده يعني ٧/٣٠، وحنجيب الشبَّكة قبلها بكام يوم.

أم علاء: حتعملوه فين؟

أم هبة: أهو ده الموضوع اللي كنت عايزة أكلمك فيه.

أم علاء: عنيا ياختي قولي.

أم هبة: أنا بستأذَنك نعمله فوق على السطوح، انتي عارفة اللي فيها، الخطوبة علينا وأي قاعة مش حتقل عن الشيء الفلاني، وكمان أنا عايزة الحتة كلها تعرف وتشوف وتسمع إن هبة اتجوزت؛ عشان بعد ما أموت محدش يقول عليها نص كلمة .

أم علاء: بعد الشر عليكي يا اختي تقي من بوقك، والله فكرة حلوة، وأهو نبقى في بيتنا ونعمل أكلنا ونلبس براحتنا، بس بنتك حترضي؟

أم هبة: إن جيتي للحق بنتي ربنا هاديها ليا اللي أقول لها عليه تقول لي اللي يريحك، مش هاين عليها تتعني يا حبيبي زي ما يكون حاسة إني حموت وبتراضيني.

أم علاء: إيه ياختي مالك شايلة الهم ليه كده؟ وسيرة الموت على لسانك؟ وحدي الله محدش بيموت ناقص عمر، وكل اللي يجيبه ربنا رضا، بكرة تشوفها عروسة وتفرحي بولادها وولاد ولادها.

في مساء اليوم التالي يتصل علاء بأمه..

علاء: ازيك يا أمي.

أم علاء: أهلاً يا حبيبي، طمّني عليك وعلى مراتك.

علاء: الحمد لله احنا كويسين، إزيّ اخواني؟

أم علاء: كويسين الحمد لله يبسّموا عليك، قول لي مراتك طلعت حامل؟

علاء: إيه.. آه..

أم علاء: إيه يابني مالك؟

علاء: لا مفيش، أصلها كانت حامل وتعبت والبيبي نزل الحمد لله.

أم علاء: يا عيني يابني ليه كده؟

علاء: أهو.. خير يا ماما خير.

أم علاء: هو أنا ليه حاسة إنك مش مبسوط وتعبان ومش عايز تتكلم.

علاء: عادي يا أمي، أنا لا مبسوط ولا تعبان، عادي مفيش حاجه تفرّح.

أم علاء: ليه كده بس؟! ربنا حيعوّضك إن شاء الله بحمل ثاني وتملاك البيت عيال، المهم مراتك كويسة؟ اوعى تزعلها يا علاء انتوا في غربة يابني ومالهاش غيرك وبعيد عن أهلها، يعني انت أهلها.

علاء: ماتقلّيش يا ماما، قوليلي أم هبة صحّتها عاملة إيه وأخبارها إيه، وهبة خطوبتها امتي؟

أم علاء: والله يا علاء أنا قلقانة على أم هبة، وشها شاحب كده وبتخسّ وتدبل، وأنا مش عايزة أقلّقها على نفسها، بس أنا مش مرتاحة.

علاء: يا عيني! ليه كده بس؟ لا حول ولا قوة إلا بالله، اوعي يا ماما تسببها، وأي فلوس تحتاجها أنا متكفل بيها.. وهبة عاملة إيه؟

أم علاء: إن جيت للحق هبة بقيت أحسّها تابهة ومش حاسة بالدنيا وموافقة على أي حاجة نقولها، معرفش استسلام ولا حاسة إن أمها بتموت فبتراضيها، دا حتى خلاص؛ خطوبتها وكتب كتابها آخر الشهر يوم ٣٠، وأم هبة استأذنتني نعمل على السطوح وأنا وافقت، وربنا يكتبها الخير ويهدّي سرها.

علاء: بُصِّي... على قَدِّ ما أنا فرحان إنها حتتخِطِب، بس مش مرتاح للواد ده، بحسُّه مستهتر كده ومتدلِّع ومش عنده مسئولية.

أم علاء: كل الشباب كده يا علاء وربنا يهديهم بعد الجواز، انت بس اللي كنت عاقل يا حبيب أمك، وأهو مقتدر وكويس ويقدر يفتح بيت وحيعيشها كويس، وربنا يهديه.

علاء: ربنا يهنيها، المهم أنا حبتلك كمان كام يوم تجيبي هدية لهبة حلوة مع الشبكة، ومصاريف فرحها كله على حسابي، تجييلها فراشة حلوة وكوشة وأكل للمعازيم، ماتخليش نفسها في حاجة كأني موجود وزيادة، هبة دي أختي الصغيرة ومسئولة مني زِي منال وأميرة بالظبط، وانتي عارفة إني بعزها يا ماما. أم علاء: ربنا يزيدك يابني ويكرمك، ياريتك كنت جنبنا، يلاً يا حبيبي مع ألف سلامة.

يغلق علاء الخط، يجد زوجته كالعادة تقف تستمع للحديث..

علاء: هو مفيش مرة أخلص تليفون إلا لما ألاقيني واقفة كده؟

سلوى: آه ما أنا لازم أقف أسمع وأستغرب على اللي جوزي بيعمله.

علاء: إيه خير؟ إيه اللي مش عاجبك في المكالمة.

سلوى: ولا حاجة... اخواتك وقولتي انت المسئول عنهم، وأمك ومنعني أتكلم

في حاجة تخصها، لكن ست زفتة دي وأمها دي كمان مالنا ومالهم؟

علاء: مين دي اللي زفتة؟! ما تتكلمي على الناس كويس.

سلوى: ناس مين؟ ومين دول أصلاً الي حتبعثلهم وتجبِّلهم هدية؟ هو إيه مش

لاقي حاجة تضيع فيها فلوسك.

علاء: أولاً اتكلمي بأدب، الناس ماغلطوش فيكي.

سلوى: غلطوا مين؟ ولا يقدرُوا.

علاء: انتي مالِك باصَّة على الناس من فوق كده ليه؟ ومتعنظة على إيه؟!

وانتي ما تحاسبينيش أنا أعمل إيه وما أعملش إيه، قولتلك قبل كده عيلتي مالكيش تقولي لي أعمل إيه وما أعملش إيه.

سلوى: وهي ست هبة بقت من عيلتك تبعتها هدية؟ ذهب ومصاري فـ الفرح، انت مالك؟ وأنا من حقي أحافظ على فلوسك مادام انت مش حتحافظ. علاء: أولًا أنا حر في فلوسي، ثانيًا أنا قولتلك قبل كده إن الناس دي مهمة عندي جدًا، وأنا بعترها زي أختي ومالهمش حد غيرنا، الأهم بقى من كل ده إني زهقت خناق كل شوية، وانتي بقيتي نكد وقعدتـك نكد.

سلوى: اااه نسيت إنك أبيه، ماشي يا أبيه براحتك، وطول ما انت بتتصرّف من دماغك كده أنا فضل كده مش حتغيّر. وتتركه وتدخل لغرفتها وتغلق الباب بقوة وراءها.

يجلس علاء على أقرب كرسي له، ويضع يده على رأسه ويتأفّف زهقًا. تمر الأيام والأسابيع على علاء وحالته كما ما هي، كل الأيام تشبه بعضها؛ فالغربة قاسية، وتزداد قسوة مع بُعد أمه وقسوة زوجته وطبعها الذي لا يتغير، وحرص علاء على احترامها مهما حصل؛ لأنهما في غربة.

.....

وتمر الأيام والأسابيع على هبة وهي كما هي، الأيام تشبه بعضها، وقلبها مغلق على ما فيه، وكل ما تفعله هو إرضاء أمها المريضة؛ فبالنسبة لها أشرف مثل غيره.

ويأتي يوم كتب كتابها، وينتهي كما تتمنى أمها أن تراها؛ فقد تزيّنت وتجمّلت من أجل أمها فقط.

و يمر بعد فرحها بضعة أيام، ولكن تندهور حالة أمها وتصبح جليسة الفراش وكأنها أدّت رسالتها في الحياة وأصبحت مستعدة للقاء ربها.

ويأتي قبل موعد جلسة الكيماوي بيوم تجد هبة لون أمها شاحبًا ورجلها ويدها تثقل حركتهما، ولسانها تثقل حركته في الكلام.

تقف هبة عاجزة أمامها وتبكي، وتقف أم علاء بجوارها تقول: احنا حنفضل نقف نتفرج عليها كده يا بنتي؟ كلمي دكتورها.

هبة: والله يا طنط كلمته، وقال لي الساعة ٤ حيعدّي علينا.

أم علاء: يااه.. لسة حنستتي ساعتين على الهّم ده، استرها يارب، إنا حكلّم إخواتك أميرة ومنال ييجوا يقفوا معنا.

وتقوم أم علاء تتحدث إليهما في التلفون، وتجلس هبة على الأرض بجوار سرير أمها تمسك بيدها وتبكي.

تمر الساعات.. ويأتي الدكتور ويطلب من الجميع الخروج من غرفتها؛ لكي يستطيع الكشف عليها.

ويخرج لهم الدكتور ويقول: لا إله الا الله.

تقول هبة وأم علاء وأميرة ومنال وخالة هبة، التي طلبت أمها ان تحضر: خير يا دكتور؟

يقول: ادعولها، إن شاء الله خير.

وطبعًا الدكتور يعرف أم علاء؛ فيأخذها على جنب، تقول أم علاء: خير يا دكتور؟ طمني.

الدكتور: ما أقدرش أحبّي عليكي.. الحاجة بسمه بتموت وفاضل لها ساعات.

أم علاء تضع يدها على فمها وتقول: يا نهار أسود.

مما يلفت انتباه الجميع، ويجروا جميعًا عليهم.

هبة تقول: فيه إيه؟ طمنوني.

يقول الدكتور: يا جماعة انتوا مؤمنين بقضاء الله، الحاجة بسمه بتموت تقريبًا، دخلت غيبوبة وجسمها تقريبًا ما بيتحركش، هي ساعات قليلة وتقابل رب كريم.

هبة تقوله: طيب نوديتها مستشفى ولأ رعاية ولأ أي حاجة.

الدكتور: مفيش داعي يا بنتي تبهدلوهما وتبهدلوا في المستشفى، ربنا يتولاها برحمته، احنا حنفضل مشغلين المحاليل للتغذية يمكن ربنا ينفخ في صورتها، عن إذنكوا. تجلس هبة على ركبتهما وتبكي بحرقه على والدتها، والكل يقف مذهولاً من هول ما يسمعه.

تقف رشا وأميرة بجوار هبة يحاولان أن يسنداها حتى تقف على رجلها، وينتبه الجميع إلى صوت أم هبة تنادي: هبة.. يا هبة. تقوم هبة وتجري على والدتها والجميع خلفها، تقول أم هبة: طلّعوني من الأوضة دي، مش عايزة أموت فيها، طلّعوني برّة.

يسرع الجميع على حمل أم هبة لكي يخرجوها من غرفتها وينفذوا طلبها الأخير، ويضعوها على كنبه الأنتريه، تقول أم هبة: خلّي الكنبه في اتجاه القبلة يا هبة.. وصوتها يكاد لم يخرج منها.

وينتبه الجميع ويقول: حاضر عنيينا.

وبعد ثواني تقول أم هبة وصوتها كله ألم ووهن: أنا عايزة أتوضي... ووضوني.

تقوم هبة بجلب طبق بلاستيك صغير به ماء نظيف فاتر وفوطه وجه، وتقوم بتلبية طلب أمها وهي تبكي بحرقه دون صوت حتى لا تشعر بها أمها. وبعد لحظات تغيب أم هبة مرة أخرى عن الوعي، ويجلس الجميع كل منهم في مكانه حزيناً على ما وصلت إليه أم هبة، يمسك كل منهم مصحفًا يقرأ ترحمًا عليها ويدعو لها.

ويستمر الحال إلى الساعة الواحدة بعد منتصف الليل، تجلس هبة على الكرسي بجانب أمها، ولكن من البكاء والتعب يغلبها النوم، تقوم خالتها وأم علاء بإيقاظها ويطلبوا منها أن تدخل إلى غرفتها تستريح قليلاً.

هبة: لا سيبوني جنبها.

أم علاء: يا بنتي كده حتموتي من التعب وأمك محتاجالك، قومي يا بنتي.. قومي ريحي شوية.. قومي.

تستند هبة على يدها وتقوم إلى غرفتها، وتضع جنبها على السرير وتنزل دموعها على وسادتها ويغلب عليها النعاس لدقائق، وتستيقظ على صوت عالي وهرج ومرج، تقوم من النوم مفزوعة تجري على الصالة، تجد الجميع يقف بجوار أمها وإبراهيم ابن خالتها يقول: انطقي الشهادة يا خالتي... انطقي الشهادة.

تنظر إلى أمها وتدفع إبراهيم بعيداً من جانب أمها، وتجلس على ركبتها وفي يدها كوب به قليلاً من الماء وتحاول أن تسند رأس أمها لكي تعطيها قليلاً من الماء، ولكن تمتنع أم هبة عن الشرب وتفتح عينيها الحائرتين تبحث عن هبة في كل الموجودين، حتى تقع بعينيها عليها بجوارها، تقول وهي تبكي: هبة، بنتي حبيبتني، حتوحشيني.

وتبحث بيدها يميناً وشمالاً على يد هبة؛ فتضع هبة يدها بيد أمها فتغلق أم هبة على يد هبة بيدها الأخرى، وتضعها على صدرها، وتأخذ آخر نفس وتودّع العالم بدمعة حزن على فراق بنتها تسيل على خدها، وموت أم هبة.

وتشعر هبة بأن ضمة يد أمها أصبحت ضعيفة، تنظر لها وتهزها يميناً وشمالاً، وتقول بصوت عالي وصرخ أم: ماما، ردي علياً يا ماما، ماما ماتسبينيش يا ماما.

ويبكي الجميع بحرقه، ويحاولوا أن يهدأوا من وضع هبة وانهيائها، ويحملها إبراهيم ورشاً وأميرة ويدخلوا بأم هبة إلى غرفتها، ويضعوا بجوارها مروحة وتسجيل على القرآن الكريم، ويغطوها بملاءة سرير في مشهد صعب تصوّره على هبة، ولا تستطيع أن تتخيله.

ويصبح البيت مليئاً بأجواء كئيبة ومحزنة.

يرن جرس التليفون عند هبة، تقوم أم علاء لترد تجده علاء.

علاء: خير يا ماما؟! بكلمك من الصبح على تليفون البيت محدش بيرد فيه إيه؟ أم علاء وهي تبكي بحرقه: بسمه ماتت يا علاء، صاحبة عمري وعشيرة سنين ماتت.

ينزل الخبر على علاء كالصاعقة، يقول بصوت عالٍ: ماتت؟!  
يلفت انتباه زوجته ويوقظها من نومها؛ فالساعة تتعدى الثانية بعد منتصف  
الليل.. ماتت امتي؟

أم علاء: لسة من ربح ساعة يا بني.

علاء: لا حول ولا قوة إلا بالله، وهو يبكي، وهبة فين يا ماما؟

أم علاء: هبة يا حبة عيني يا بنتي تايهة.. بتعيط من غير صوت ومش  
مستوعبة اللي بيحصل لها.

علاء: ناديها يا ماما عايز أكلمها.

أم علاء: هبة، تعالي يا بنتي كلمي أبيهك علاء.

تقوم هبة وهي تستند على أميرة، تمسك سماعة التليفون وتضعها على أذنها.

علاء: هبة، البقاء لله وحده، اجمدي يا هبة.. انتي بقيتي لوحديك... اجمدي  
وادعيها بالرحمة، ارتاحت من تعبها.

تصمت هبة ولا ترد، ولكن صوت دموعها يحكي كل ما تريد أن تقول.

علاء: حاوي تبطلي عياط وتجمدي، بكرة يوم طويل وربنا يقويكي.

هبة وهي تبكي بحرقة وصوتها متقطع: انت حيتجي؟

علاء: طبعا حاجي، النهار يطلع حطلب أجازة وأنزل في أول طيارة.

هبة: طيب... وتغلق الخط.

سلوى تجلس على سريرها، تقول بصوت عالٍ: تروح فين؟! لا انت باين عليك  
اتجننت خالص.

علاء: سلوى اخربي خالص، أنا لا طايق ولا قادر لمجادلتك دي، واسمعي... هي  
كلمة.. أنا نازل مصر بكرة إن شاء الله، حترقد من الشغل، عايزه تنزلي معايا  
أهلاً وسهلاً.. عرفيني عشان أحجزك معايا، مش عايزة خلّكي ماتجيش، أهو  
أرتاح منك.

سلوى: طيب خليها بعد بُكرة ألحق أنزل أشترى شوية هدايا لبابا وماما.  
علاء: هدايا! تصدّقي انتي ماعندكيش دم ولا بتحسّي، أنا في مصيبة وانتي  
تقولي هدايا.

سلوى: مصيبة ليه إن شاء الله؟! هي من بقية عيلتك؟  
علاء يقوم ويأخذ وسادته وغطاء له ويقول: يوووووه.  
ويتركها ويخرج وهو يحترق غضبًا من رد فعل سلوى.

.....

تنادي خالة هبة عليها، وتقول: مش تكلمي جوزك يا بنتي وتعرفيه أحسن  
حيزعل.

هبة تنظر لها وتحرك رأسها بالموافقة..

ويمر ليل أسود حالك بما تراه هبة، وسواده يدلّ على ما سوف تراه في الأيام  
المقبلة، ويطلب منها الجميع أن تلمّ شعرها وتداريه بطرحة سوداء، وأن تبدّل  
ملابسها وتستبدلها بملابس سوداء، وترى الجميع حولها يرتدي السواد وكأنه إشارة  
لها بأنه لون أيامها المقبلة.

يطلع النهار ويعلو صوت القرآن، ويتساءل الجميع في الشارع ما الذي  
يحدث؟! ولماذا؟! ومن أين يصدر القرآن؟ ويعلم الجميع أنه عزاء أم هبة، ويصل  
الخبر إلى أشرف وعائلته، ينزل أشرف مسرعًا إلى بيت هبة ومعه أمه وأخته.

ويكون إبراهيم ابن خالة هبة عاد من وزارة الصحة ومعه تصريح الدفن  
وشهادة الوفاة، وسيدتان ليقوما بتغسيل أم هبة.

تدخل السيدتان ويسألان على بنتها أو أختها، ويقولان أين سنقوم بغسلها؟!  
وتقف هبة حائرة، تقول أم علاء: هنا تعالوا اتفضلوا.

وتكون أم علاء أخذت حجرة الصالون من محتوياتها استعدادًا لهذه اللحظة.

تميل خالة هبة عليها وتقول: انتي حتخلي أمك تنكشف على حد غريب؟!!

اقفي واجمدي على غُسل أمك، وماتدخليش عليها أم علاء وعيالها.

تقول هبة بصوت حزين: لا يا خالتي، الست دي عمرنا ما نقدر نوقي جمایلها، وهي بالنسبة ليّا أمي الثانية، وبناتها إخواني، وعلى فكرة أمي كانت موصّيانا إنها ساعة ما تموت محدّش يقف عليها وعلى غُسلها غيرك انتي وهي بس، عن إذنك.

تترك هبة خالتها وتقف أمام الغرفة التي سوف تغُسل فيها أمها، ترى الكفن الأبيض وبعض المستلزمات للغُسل وماء ساخن وبارد في جرادل بلاستيكية، وتنتبه على أشرف وإبراهيم وهُما يحملان أمها ويضعها على منضدة الغسل، تجري هبة على جثة أمها وتحضنها وتبكي بحرقة، يمسك بها أشرف ويأخذها تحت ذراعه ويخرج بها من الغرفة.

ويقول لها: صلّي على النبي واهدي، وادعيها بالرحمة.

تقول هبة لأم علاء: ادخلي معانا يا طنط، ماما كانت بتحبّك، ادخلي مع خالتي عشان نغُسلها.

تقوم أميرة من مكانها وتأخذ بيد هبة، وتقول لها: تعالي يا هبة معايا، تعالي... بلاش يا حبيبتي تدخل معاهم، بلاش... حتتعديّ ومش حتنسي عمرك كله المنظر ده.

تحاول هبة أن تدخل، ولكن أشرف وأميرة يمنعاها.

تقوم منال تجعل أمها وخالة هبة يدخل على الغرفة لكي يقفا على غُسل أم هبة، وتغلق الباب ورائهما.

وتنتهي مراسم اليوم من غُسلٍ ودَفْن، وتجلس هبة على أول كرسي في مدخل باب شقتها تستقبل عزاء أمها من السيدات.

ويقف أشرف وإبراهيم وزوج كل من منال وأميرة وزوج رشا في الشارع أمام المنزل في صوان عزاء أم هبة يستقبلوا الرجال.

أما علاء يصل إلى مطار القاهرة في الساعة ٨ مساءً.

يخرج من صالة الوصول مسرعًا وبجواره سلوى، يقول لها: ماكنتيش قادرة تلبسي أسود؟ حتغيري فين دلوقتي؟! دا زمان العزا في الشارع.

سلوى: أسود وعزا! لا أنا ماليش في الجو ده.

علاء: إمال نازلة ليه معايا؟

سلوى: لا أنا رايحة عند ماما، انت بقى رُوح عزِّي وابقى كلمني في التليفون، وشوف حتعمل إيه وكلمني.

علاء: كده؟! ماشي... روحي لماما ولوحدك.

ويشاور لتاكسي ويركب فيه بمفرده تارگًا سلوى مكانها، ويصل إلى منزلهم، ينزل من التاكسي ولا يدخل إلى صوان العزاء، ويدخل مسرعًا إلى البيت ويجري مسرعًا إلى أعلى لكي يرى هبة وأمه.

يدخل من الباب وينظر إلى كل الموجودين، يرى هبة ولا تراه، تقف أم علاء في مكانها وتقول: علاء حبيبي، حمد الله على السلامة. وهي تبكي.

وتجري مسرعة لتحضنه وينتبه الجميع، وتقوم أميرة ومنال مسرعين على أحيهم. تنتبه هبة وتقوم هي الأخرى وتقف مكانها، يحتضن علاء أمه وأخواته ويعزيهم، ويتجه وهو باكي العين تجاه هبة، ويمد يده وذراعه لكي يطبطب على كتفها ويقبلها من رأسها، يرى يدًا غريبة تقف بينهما، ينظر هو وهي لبعض ولهذه اليد؛ فريان أشرف زوج هبة.

يقول أشرف وهو يمد يده إلى علاء: البقيّة في حياتك يا أستاذ علاء، حمد الله على السلامة.

تمد هبة يدها إلى علاء، تسلم عليه وتقول له: حمد الله على السلامة يا أبيه.

أشرف: اتفضل يا باشا، العزا بتاع الرّجاله تحت.

علاء: لا اتفضل انت، أنا في بيتي.

أشرف: طبعًا أكيد في بيتك ووسط أهلك.

ينظر إليه علاء ولا يجيب على ما يقول، ويقول لهبة: شدي حيلك، أمك كانت زي أختي الكبيرة وفي مكانة أمي الله يرحمها.

تبكي هبة بشدة ولا تستطيع أن تقف على رجلها، يمسك علاء بيد هبة ويسندها لتجلس، يقف أشرف بينهما ويمسك يد علاء ويجعله يترك يد هبة، ويقول: عنك انت دي مراي وأنا حسنها.. وينظر لهبة بغضب.

يتركهما علاء ويتجه إلى باب الشقة، ويقول لأمه: أنا فوق يا ماما لو عوزتي حاجة.

يقف أشرف ليتأكد أنه ترك المكان، وينزل إلى صوان العزاء.

وانتهت أيام العزاء الثلاثة والجميع يترك هبة ويذهب إلى بيته وأشغاله، وتقف هبة في صالة بيتها تنظر هنا وهناك تجد الشقة صامتة هادئة، كل ركن فيها يفكرها بأمرها، تسمع صوت ضحكها وكلامها يملأ أركان البيت، صورتها على كل جدار.

يأتي صوت خافت من الخارج وهو صوت أغنيه هاني شاكر يقول:

(الحلم الجميل... البيت الصغير

كله ضاع.. كله اتكسر.. كله اتغير

وفضيت علينا الدار، والوحدة زي النار

راحوا اللي كانوا بيمسحوا بإيدهم دموعنا

راحوا اللي كنا بنرمي في أحضانهم وجعنا)

تجلس على ركبتيها وتبكي بحرقه، وصوت عالي يدل على ألم بداخلها على وحدتها وفراق أمها.

علاء ينزل على سلم المنزل متجهًا إلى الشارع، يبطئ في حركة رجله أمام شقة هبة، تنتصت على الباب من بعيد من الشقة، يتجه مسرعًا إلى الباب ويكاد أن يطرقه، ولكن يتذكر أن هبة الآن بمفردها ولا يجوز التحدث أو الوقوف معها دون وجود أحد، خاصة أنها أصبحت متزوجة من رجل آخر؛ فيتراجع عن الفكرة

ويصعد مرة أخرى إلى شقته، ينادي على أمه ويحكي لها ما سمعه، ويطلب منها أن تنزل إلى هبة وتأخذها معها إلى شقتهم، ويطرحها وألا تتركها وحدها، خاصة في أول أيام بُعد أمها عنها.

تنظر أم علاء وتقول: يا بني أنا ما بسبيهاش، بس الوضع..

وقبل أن تستكمل حديثها يقول علاء: أنا فاهم يا ماما، وعشان كده نازل رايح لسلوى، وبعد ما أمشي من البيت خالص انزلي لها يا تاخديها هنا يا تُقعدِي معاها تحت.. ويترك علاء المنزل ويغادر.

يقف أشرف على باب معرضه وعينه على المنزل الذي تسكن فيه هبة، يرى علاء يخرج منه فيطمئن قلبه، وبعد دقائق يقوم لكي يتحدث مع هبة في التليفون، ولكنها لم تجبه، يذهب إلى البيت و يصعد على شقة هبة ويطرق الباب، ولكن هبة لم تفتح، يصعد إلى شقة أم علاء ويطرق الباب؛ فتجيب أم علاء: مين؟ يقول: أنا يا حاجة أشرف جوز هبة.

أم علاء تذهب إلى الباب وتفتحه وتقول: أهلاً وسهلاً يا بني، خير؟!

أشرف: لامؤاخذة يا حاجة، هي هبة عندكم؟

أم علاء: آه يا بني عندي، معلش مش حقدّر أقول لك اتفضل؛ علاء مش هنا.

أشرف: لا أبداً مفيش مشكلة، ناديلي هبة بس.

تأتي هبة على صوت أشرف، وتستأذن من أم علاء وتأخذه وتنزل إلى شقتها..

تفتح هبة الباب، وتقول لأشرف: اتفضل.

يدخل أشرف ويغلق الباب وراءه، تجري هبة على الباب وتفتحه....

يقول أشرف باستغراب: انتي فتحتي الباب ليه؟! هو حد جاي؟!

هبة: لا، بس أنا وانت لوحدنا ومايصحش.

أشرف: هو إيه اللي مايصحش؟ هو أنا واحد صاحبك؟ دا أنا جوزك، إمال كنا

كتبنا الكتاب ليه؟

هبة: أشرف، أنا لا فيّا دماغ ولا نفسيّة لعمايلك دي، عايز تقعد اتفضل، بس يبقى الباب مفتوح، مش عايز خلاص انزل.

أشرف: أنا صابر للآخر أهو، وصبري قرّب ينفد، والوضع ده غلط، مش حتفضلي قاعدة لوحدك هنا وفيه راجل غريب داخل طالع براحتة، ما هو بيته وما أقدرش أقول له حاجة، ألا هو ناوي يسافر امتي؟

هبة: راجل مين؟! قصدك أبيه علاء؟

أشرف: ههههههه والله ما بيقلقني إلا أبيه دي، آه هو أبيه علاء.

هبة: انت باين عليك اتجنّنت، يعني انت اللي جُوزي مش سامحالك تقعد معايا لوحدي حسمح لأبيه.. على فكرة أنا عارفة الأصول كويس أوي، وهو كمان، وهو جاي بهراته هنا بالليل عند أمه، يعني مش حيبقى لوحده.

أشرف: طيب ماتزغّيش، أنا ماشي وحسيبك يومين كمان، وبعد كده لازم نحدّد نحعمل إيه.

ويتركها وينزل.... ويرن جرس تليفون هبة.

هبة: ألو، مين؟

أميرة: أنا يا هبة.

هبة: أهلاً يا أبله ازيك؟

أميرة: أهلاً يا حبيبتى، عامله إيه؟

هبة: أهو.. حعمل إيه؟ قاعدة لوحدي.

أميرة: حبيبتى لازم تشغلي نفسك بحاجة... بأى حاجة، فُعادك لوحدك كده مش حلو، حاولي تخرجي... تنزلي الجامعة، حتى تقابلي أصحابك، أقول لك انزلي المحل بتاعك افتحيه وقابلي الناس واتكلمي معاهم، أهو منها تطلّعي من وحدتك دي، ومنها يا حبيبتى تشوفي أكل عيشك، انتي دلوقتي محتاجة كل قرش للأكل وشربك ودراستك وجهازك.

هبة: آه والله يا أبله أنا ناسية المحل خالص، أنا حكلم ماجدة تيجي وتبدأ تفتحه، وأنزل أشغل نفسي فيه، وأهو أحوش قرشين كلها شهر، والجامعة حتبدأ ولازم أستعد.

أميرة: ربنا يوفقك يا حبيبتني يارب، ومش حوصيكي يا هبة... حافظي على نفسك أوي، أشرف صحيح جوزك على الورق، لكن لسة يا حبيبتني دُخلتك ماتحدّتش، إوعي يا هبة.

هبة: ماتخافيش يا أبله، أنا ترييتكوا، وانتي عارفة أنا مابحبش أشرف أصلاً ولا بسمحله يتجاوز حدوده معايا، وحتى كان لسة هنا ونزلته.

أميرة: ماشي يا حبيبتني، ولو عوزتي أي حاجة وانكسفتي تطليها من طنط أم علاء كلميني على طول، سلام.

هبة: سلام.

يأتي صباح اليوم التالي، تجلس هبة في المحل؛ فقد قرّرت أن تنزل تباشره ومعها ماجدة، تلك البنت التي أتت بها وقت مرض أمها لكي تعمل بالمحل وقت انشغالهم، تقف هبة وتعطي ظهرها لباب المحل ترتب صفوف وأرفف الملابس التي تبيعها وماجدة بجوارها.

تسمع صوت علاء ينادي...

علاء: هبة.

هبة تسمع صوته يرن في أذنها، تغمض عينها لثواني وتأخذ نفساً عميقاً؛ فمهما كان عنادها وكبريائها فهي تعشق هذا الصوت، تستدير وتقول: أهلاً يا أييه اتفضل، هاتي كرسي يا ماجدة.

علاء: لا لا مفيش داعي، أنا كت ماشي وفرحت لما شوفتك نزلتي المحل، أيوة كده هي دي هبة الي أنا أعرفها.

هبة تقترب له وهي تتنهد، وتقف أمامه مباشرة يفصل بينهما فاترينا زجاج قصيرة من الزجاج بها بعض البضائع التي تبيعها هبة، وتقول له: للأسف هبة

اللي انت تعرفها ماتت من زمان وبقت هبة تانية خالص.

علاء: هبة، صدّقيني أنا عارف إني عانِدت نفسي، وصدّقيني أنا حياتي ماتفرّقش عن حياتك أبدًا، على قَدِّ ما انتي حزينه وتعيّسه أنا كمان كده للأسف، انا ماتوقّفتش في اختياري، ودائمًا فيه مشاكل مع سلوى، وأمّي واخواتي هُمّا اللي مصبّرّيني عليها، وأنا للأسف زي ما يكون بعاقب نفسي وفرحان إني بعذب فيها وبتحمل سوء اختياري.

هبة: ليه؟! مش دا الجواز اللي يليق بيك سنًا واجتماعيًا وشكلًا؟ وبعدين انت ناسي إنها حامل، أنا كنت سمعت كده من قريب.

علاء: للأسف والحمد لله إن مفيش حمل، المدام مش مستعدّة إنها تبقى أم وسقطت نفسها.

هبة: يا ساتر يارب، ليه الغباء ده؟

علاء: أهو نصيب، يمكن كده أحسن عشان وقت ما أعرف آخذ قرار ما أكونش متقيّد.

هبة: آه، وانت بقى جاي دلوقتي تحكي لي مأساتك وإنك تعيس، وإنك احتمال ماتكلمش في جوازتك، ليه معتقد إني حسيب الدنيا وأجري تحت رجلك وأقول لك أنا قاعدة أهو مستنيك لما تجرب الجواز العقلاني ويفشل وتيجي تجرب بقى الجواز اللي على حب؟! انت للأسف بعندك وتكبرك قضيت على نفسك وعليًا.

وتمسك هبة بأصبعها الذي يوجد به دبلة خطوبتها، وتقوم بحركة تلقائية بتدوير الدبلة في يدها، وتقول له: شايف دي بالنسبة ليّا طوق بحسّ ساعات إنه ملبوس في رقبتى وبيضيقي عليًا وبيخنقني، وكل ما يضيقي بلُوم عليك أكثر وأحملك الذنب أكثر وأكثر، وساعات كتير أوي بفكر أخلص منها، خاصة بعد ما ماما ماتت، لكن صدّقني لو ده حصل وطلّعت من جوّة الطوق ده عمري ما حلجّالك أبدًا، من يوم ما قفلت في وشي خط التليفون وأنا كنت وقتها مستعدّة أبيع كل حاجة عشانك.

علاء: بقيتي قاسية أوي يا هبة، وكلامك كله مرار.

هبة: دي نتيجة طبيعية....

وقبل أن تستكمل كلامها ترى أشرف يأتي من وراء علاء، يظهر على هبة التوتر والقلق، يلاحظ علاء وينظر خلفه يرى أشرف يقف.

يقول أشرف بكل استهزاء: الله! حلو ده، تحبوا أجيب شجرة واتنين لمون؟

علاء: اتكلمم بأدب يا جدع انت.

أشرف: ليه بس يا أبيه؟ زعلت ليه؟ مش انت أبيه برضه؟

هبة: أشرف.

أشرف: إيه يا ست الأستاذة، هو أبيه مش عارف إنك بقيتي مراتي ولا إيه؟!  
اااه ولا يمكن كان جاي يجيب حاجة للمدام صح.

علاء: لا انت زودتها أوي.

أشرف: لا أنا لسة مازودتهاش، وانت لازم تعرف إن خلاص كان فيه منه وخلص.

علاء: خلص؟! هو إيه ده؟!

أشرف: يعني خالتي وخالتيك واتفرقوا الخالات، كنتوا جيران وأمها صاحبة أمك وهي خلاص أيام وحتسيب البيت، وأمها الله يرحمها، يعني لا كلامك ولا وقفتك وتنطيتك ليها له معنى، وأي حاجة عايزها منها تيجي تكلمني أنا، مش دي الأصول ولا إيه يا باشا؟

هبة: أشرف، خلصنا بقى، أبيه كان جاي يطمن عليا وماشي، مفيش داعي لكل ده.

أشرف: والحمد لله اطمئن، يلا يتكل على الله.

علاء: لا انت زودتها أوي وشكلك عايز....

هبة: خلاص يا أبيه، عشان خاطري خلاص، أنا أعصابي تعبانة ومش متحملة، عشان خاطري يا أبيه امشي دلوقتي.

علاء ينظر لهما ويتركهما ويمشي في طريقه.

أشرف ينظر لهبة ويقول: إيه؟! ها إيه؟

هبة: إيه؟ انت مالك طايح كده ليه؟

وتتركة وتدخل تستكمل ما كانت تفعله.

أشرف: أنا بقى قعدتك لوحك دي مابقتش عاجباني ومش مرتاح.

هبة: أشرف خلصنا، مش كل ما تشوف وشي تقول لي الكلمتين دول، أنا مش حتجوز دلوقتي، لسة الدراسة ولسة على الأقل يفوت كام شهر على وفاة أمي، ما هي مش كلبة راحت هي تموت وأنا أفرح وأتجوز.

أشرف: امممممم ماشي.

ويتركها ويمشي.

تجلس هبة على أقرب كرسي لها وتتأفف زهقًا.

ينتهي اليوم وتصعد هبة إلى شقتها، وتغلق ماجدة المحل وتذهب في طريقها إلى بيتها.

وعلى أول الشارع يستوقفها أشرف: إزيك يا أبله؟

ماجدة: انت بتكلمني أنا؟

أشرف: آه، انتي مش عارفاني؟

ماجدة: لا طبعًا عارفة حضرتك، أهلاً وسهلاً، انت أستاذ أشرف خطيب الأنسه هبة.

أشرف: اسم الله عليك، أنا بقي معرفتش اسمك إيه.

ماجدة: أنا اسمي ماجدة.

أشرف: طيب تحبي أوصلك في حته.

ماجدة: لا شكرًا، ربنا يخليك.

أشرف: عامةً لو عوزتي أي حاجة أنا تحت أمرك.

ماجدة: إن شاء الله، بعد إذنك.... وتتركة وتمشي.

يقف أشرف ينظر إليها من الخلف وهي تمشي، ويحرك حاجبه بحركة تدل على أنه ينظر على مفاتها.

تقوم هبة في اليوم التالي على صوت طرق الباب...

تفتح الباب تجد أم علاء.

هبة: صباح الخير يا طنط.. اتفضلي.

أم علاء: أهلاً يا حبيبتني، علاء فوق هو ومراته وكانوا عايزين يسلموا عليكي قبل ما يمشي، كانوا حينزلوك وأنا قولتلهم خليكوا وأنا حنزل أنادي عليها.

هبة: آه، حاضر، طب غير هدومي بس وأحصلك.

أم علاء: ماشي حستناكي فوق.. وتتركها وتخرج.

تصعد هبة إليهم وهي ما زالت مرتديه ملابس سوداء حداداً على أمها، تطرق الباب برفق فهو مفتوح أصلاً، ولكن من باب الاستئذان.

يقوم علاء من مكانه يستقبل هبة، ويمد يده يسلم عليها ويقول لها: اتفضلي يا هبة.

تجلس سلوى مكانها ولا تتحرك، وتنظر لهبة نظرة غيظ ولا ترحب بها.

تتقدم هبة بخطواتها وتمد يدها لسلوى لكي تسلم عليها.

تجلس سلوى مكانها وتمد يدها بتعالٍ، وتسلم على هبة وتقول: أهلاً.

أم علاء تنظر لسلوى باستغراب، وعلاء ينظر لها بغضب.

وتقول أم علاء: اتفضلي يا بنتي اقعدي.. اتفضلي.

تجلس هبة على أقرب كرسي لها وهي محرجة؛ فيبدو أن سلوى لا تريدها.

علاء: أنا مسافر كمان كام ساعة، وطلبت من ماما إننا نسلم عليكي ومش حوصيكي على نفسك، ولو غوزتي حاجة كلميني على طول.

هبة: ربنا يخليك يا أبيه، توصلوا بالسلامة.

سلوى: والله أنا زعلت خالص لموت مامتك، ورغم إن مجيّا ده كلّفنا كثير

وخسّر أبيهك علاء كثير، بس هو كان مُصرّ ينزل.  
هبة: ربنا يعوّضكوا خير، وأنا آسفة لو اتسببت في أي خسارة.  
أم علاء تلاحق سلوى في الكلام: لا يا حبيبتى ماتقوليش كده، انتي زي أميرة  
ومنال بالظبط، وعارفة علاء بيحبك زيهم إزاي.  
سلوى تنظر وهي تستهزه: آه، الصراحة هو بيعزّك أوي.  
هبة: طبعا ما هو زي أخويا الكبير.

وتقوم من مكانها بعد أن اشتد احمرار وجهها خجلاً من طريقة سلوى، وتقول:  
توصلوا بالسلامة، وشكراً يا أبيه على كل حاجة، أشوفكوا على خير، عن إذنكم.  
وتتركهم وتنزل إلى شقتها وتغلق الباب وراءها.

أم علاء بالداخل: ليه كده يا بنتي تكسري بخاطرها؟ لا مالكيش حق أبداً يا سلوى.  
سلوى: ليه يا طنط؟ كان المفروض أقوم أبوس راسها ولا أفرشلها الأرض رمل.  
أم علاء: لا يا بنتي، بس ماكنتيش اتكلمتي خالص، يا تتكلمي بطريقة أحسن  
من كده، انتي أخرجتها جداً.

سلوى: ما تتحرج أنا مالي، مش كفاية جاييننا على ملا وشنا ما أعرفش ليه،  
ومصاريف وعطلة، هو علاء ناقص؟ ما كفاية عليه مسؤولياته هنا وهناك.

أم علاء: مسؤولياته؟! قصدك إيه يا بنتي؟

سلوى: يعني....

ويستوقفها علاء، ويقف مكانه ويقول وهو غاضب: سلوى، خلاص حنفضل  
نرغي كثير؟ خلصنا، وأنا مفهمك كويس طبيعة علاقتنا بهبة وأمها الله يرحمها.  
أم علاء تقوم من مكانها وهي غاضبة، وتقول بنبرة صوت حزينة: طيب عن  
إذنكم، أما أروح أصلي الظهر، طبعا البيت بيتكوا.

وتتركهم وتتجه إلى غرفتها، علاء ينظر لسلوى ويقول: مفيش فائدة فيكي.

ويقوم خلف أمه يدخل غرفتها، يجدها تجلس على السرير وهي حزينة

الملاحج.

يقول علاء: معلش يا ماما، هي مش قصدها حاجة، هي سلوى كده دَبْش كلام.  
أم علاء: ولأ قصدها يابني، حقها، وأنا قولتلك كذا مرّة ماتبعّتش حاجة، أنا  
الإيجار اللي باخدُه من هبة والمحل على معاش أبوك بيكفيني، وربنا يخلي  
إخواتك مش مخليّتي عايّزة حاجة.

علاء: إيه يا ماما الكلام ده؟ ماتقوليش كده، دا أنا كلي تحت رجلك، هي مش  
قصدها كده والله، هي بس ماتحبش هبة، ومن وجهة نظرها إنها ماتقربلناش،  
وإن احنا مهتمين بيها زيادة.

أم علاء: أكيد يابني ليها حق تغيّر عليك، ما هي مراتك، بس لو هي كده  
أسلوبها على طول الله يكون في عونك يابني ويقدرك عليها.  
علاء: يارب.

وينتبها على صوت جرس الباب، وتقول أم علاء: أكيد دول اخواتك جايّين  
يسلموا عليك.

وقر الأيام والأيام ويبدأ العام الدراسي الجديد، وتبدأ هبة في الذهاب إلى  
جامعتها.

ويبدأ أشرف في فرض سيطرته عليها؛ فهو يلاحقها في أي مكان تذهب إليه،  
سواء الجامعة أو المحل، وقبل امتحانات الترم لهذا العام ذهبت هبة إلى الجامعة  
في يوم دون أن تخبر أشرف.

ذهب أشرف إلى المحل وجد ماجدة بمفردها سألتها: هي هبة فين؟  
ماجدة: راحت الجامعة.

أشرف: جامعة إيه؟! هي عندها جامعة النهاردة؟

ماجده: مش عارفة، هي كانت قاعدة، جالها تليفون قامت طلعت غيرت  
هدومها وقالتلي رايحة الجامعة وخرج على الساعة ٥ كده.

أشرف: ٥! جامعة إيه دي اللي حتفضل من ١١ ل٥، ماشي.

ودخل أشرف المحل وجلس على كرسي المكتب، ونظر إلى ماجدة نظرتة الخبيثة وهو يتحرك بالكرسي يميناً وشمالاً، وقال: انتي فطرتي؟  
ماجدة: لا والله لسة، أصل عندي شوية شغل كده، حدخل المخزن أجيّب بضاعه أرضها.

أشرف: طيب أنا كمان مافطرتش، نفطر سوى بقى عشان يبقى عيش وملح.  
ماجدة تنظر له نظرة مثيرة وتبتسم وتصمت.

يتصل أشرف بالمعرض الخاص به الكائن على أول الشارع، ويطلب من زقزوق العامل هناك أن يأتي له بالسندوتشات للفطار.

يجلس أشرف مع ماجدة بالمحل يتبادلا أطراف الحديث، وعين كل منهما تنطق بما يريد أن يقول؛ فأشرف تعود على مثل هذه العلاقات الغير شرعية كلما سمح له الأمر.

ويبدو على ماجدة أنها تفهم غرضه ولا تمنع.

يطلب أشرف من ماجدة أن تصنع له كوباً من الشاي.

قامت ماجدة ودخلت إلى المطبخ الموجود بالمحل؛ فهو عبارة عن حجرة صغيرة جداً بها حوض صغير، ورخامة عليها أغراض المطبخ الصغيرة من أكواب وبرطمانات للشاي والسكر وموقد غاز صغير، وبداخل هذه الحجرة باب لحمام صغير أيضاً، تقف ماجدة في المطبخ وتعطي ظهرها للستارة الفاصلة بين المطبخ والمحل من الداخل، تشعر بنفَس أشرف يقترب منها وجسمه يلمسها من الخلف، ويقول: معلش أنا بس جاي أغسل إيدي.

ماجدة تسحب نفسها ببطء وتنظر لأشرف بإثارة وتقول: ولا يهملك اتفضل.

وتأخذ صينية الشاي وتخرج من المطبخ.

يغسل أشرف يده ويخرج، ويستكمل مع ماجدة الكلام فهو يحاول أن يتقرب لها لكي ينال غرضه منها، خاصة بعد أن شعر بأنها لا ترفض وتفهم جيداً مقصده.

تأتي الساعة الثالثة عصرًا، يقوم أشرف من مكانه ويقول ماجدة: انتي ساكنة  
فين يا ماجدة؟

تقول له ماجدة على عنوانها، فيقول لها: ابقني عدّي وانتي مروحة كده، لو  
فاضي يعني آجي أوصلك.  
ماجده: وماله.

يذهب أشرف إلى الجامعة عند هبة، ولم يستطع الوصول لهبة أو مكان  
محاضرتها.

يرجع وهو يشتعل غيظًا إلى معرضه...

يرى هبة تأتي من بعيد في تاكسي، وتنزل هبة على باب بيتها.

تصعد إلى شقتها، وبعد ثوانٍ قليلة تسمع صوت طرق الباب، تفتح لتجد أشرف  
أمامها يدفعها إلى الداخل، ويقول لها: كنتي فين للساعة ٦ وانتي نازلة من ١١؟!  
هبة: إيه ده فيه إيه؟ ازاي ترقني كده؟

أشرف يمسك ذراعها بقوة ويقول: ردّي كنتي فين؟ أنا روحت الجامعة وسألت  
مالقّتكيش ولا طلع إن فيه محاضرات أصلًا.

هبة: روحت الجامعة وسألت عليًا! على أساس إنك بتسأل على تلميذة في  
تالته تالت! دي جامعة.. يعني كذا كلية وكذا مكان وكذا سنة، وبعدين أنا كان  
عندي سِكشَن عملي، يعني عمرك ما كنت حتتعرف توصل لي.

أشرف: أنا ماعرفش كل الكلام ده، اللي أعرفه إنك راكبة دماغك وماشية على  
كيفك زي ما يكون مالكيش راجل يحكمك.

هبة تشد يدها من يده وتقول له: لا انت أكيد اتجنّنت، وأنا ما أسمحلكش  
تتكلم ولا تتعامل بأسلوب السواقين ده، انت ما لكش حكم عليًا.

أشرف يصفح هبة على وجهها، ويمسك بشعرها بقوة ويقول لها: لا دا انتي  
عايزة تترّي، وأنا حعرّفك انتي متجوزة مين.

هبة يعلو صوت صريخها، وتحاول أن تفلت رأسها من يده وهو يدفع بها  
مِينًا وشمالًا.

تنزل أم علاء على صوتهما العالي، تجد باب الشقة مفتوحًا وترى أشرف وهو  
يمسك بشعر هبة، تجري على هبة وتسلكها من يده وتبعدها عنه، وتقول: إيه  
يا ولاد كفى الله الشر، بتزعقوا ليه؟

أشرف: خير يا حاجة إن شاء الله.

أم علاء: إخس عليك يا أشرف، كده هبة تعمل فيها كده؟

أشرف: آه، وأكثر من كده، وأنا حر في مراتي، وما أحبش حد يتدخل بيننا  
لامؤاخدة.

هبة: مراتك؟! لا ده بُعدك.

أشرف: طيب اسمعي بقى، من هنا ورايح مفيش جامعة ولا نزول محل، وأنا  
اللي حباشره وأبعتلك الفلوس، وأحرك هنا أسبوع تلمّي البيت وتلمّي هدومك  
وحاجتك وحبعت أمي وأختي ياخدوكي على بيتك عندي هناك، ولا فرح ولا  
دياوله، حنعمل فرح لمين وازاي وانتي الست الحاجّة لسّة ميّنة، ودا آخر كلام  
عندي.. ومفيش جامعة، سامعاني؟ مفيش جامعة.

ويتركها ويخرج ويغلق الباب وراءه.

تبكي هبة في حزن أم علاء وتقول: أنا إيه اللي مصبرني عليه؟! ما خلاص..  
اللي كنت ساكنة ومستحملة عشانها ماتت، أنا تعبت ومش عايزاه، أنا الصبح  
حطلب الطلاق.

أم علاء: يا لهوي! الطلاق؟! طلاق إيه يابنتي كفى الله الشر، لا طبعًا، استهدي  
بالله كده بس واصبري، هو بكرة حيهدي ويروق ويبقى زي الفل.

هبة: آه الطلاق، وفيها إيه؟ مش أحسن ما أعيش مع إنسان متخلف زي ده؟

أم علاء: يا بنتي انتي أمك ميّنة ماكملتش ٣ أو ٤ شهور، أشرف دخل وخرج  
عليكي كام مرة وانتي قاعدة لوحدك، عارفة يعني إيه طلاق دلوقتي؟ يعني الناس

حتاكل وشك، حيقولوا خَد غرُضه منها وطلَّقتها، ومحدث حيقدر ده، وبعدين  
حتروحي تقولي لأمه إيه؟ حطلق عشان بيغير عليًا، يا بنتي الناس مابترحمش  
وانتي لوحك في الدنيا، الجواز ليكي ستر، حتسوئي سمعتك على الفاضي، ومحدث  
حيصدق إنه مالمسكيش، معلش اصبري، عند الله كل ده، وشوفي ربنا حيعوضك  
إزاي، أنا الصبح لما يهدى حكلمه في موضوع الجامعة ده وربنا يسهل، وانتي  
بعد كده منعًا للمشاكل لازم تعزفيه إنك نازلة، حقه عليكي، إمال همًا اخترعوا  
التليفونات ليه؟

هبة تبكي وتصمت دون أن تنطق بحرف واحد.

ينتهي اليوم ويخرج النهار من عتمة الليل، ولكن العتمة ما زالت تعشش  
في قلب وحياة هبة، تقوم هبة من نومها تنظر من النافذة تجد ماجدة تفتح  
المحل، تنادي عليها وتصعد لها ماجدة.

هبة: أنا قاعدة النهاردة هنا مش نازلة، عندي مذاكرة مش حقدر أنزل.

ماجدة: حاضر، عن إذنك.

وتنزل ماجدة، تجلس هبة في شرفة منزلها تنظر على الشارع والمارة، ترى  
أشرف يأتي بسيارته من أول الشارع تستتر في جدار البلكونة حتى لا يراها، ينزل  
أشرف ويمر على المحل قبل أن يصعد؛ مما يلفت انتباه هبة، وبعد دقائق تدخل  
هبة بالداخل لتبذل ملابس البيت وترتدي لبسًا آخر، يتأخر أشرف لثواني؛ فهو ما  
زال تحت عند ماجدة، يصعد أشرف ويطرق الباب، تفتح له هبة وتدخل تجلس  
على الكرسي دون ترحيب، تجد أشرف بيده بوكيه ورد، ويقول: هو الجميل لسة  
زعلان؟

هبة لا تنظر إليه ولا تجيبه.

أشرف: لا لا دا أنا شكلي عكيت جامد امبارح.

يتجه نحوها ويقول: خلاص بقى المسامح كريم، مايقاش قلبك أسود وخُدي  
جاييلك بوكيه ورد أهو، وعشان خاطر ترضي تصالحيني فيه جامعة يا ستي.

تنظر هبة وتبتسم وتقول له: بجد؟

أشرف: آه بجد، بس علي شرط، مفيش تنطيط ومحاضرات انتي فاضلك تقريبًا  
١٠ أيام على امتحاناتك، تقعدني في البيت وتذاكري وحتروحي على الامتحان بس،  
وأنا اللي حودِّيكي وأرجعك.

هبة: ماشي.

أشرف: وأنا عشان خاطر ك برضه حأجل الدخلة لبعده الامتحانات، بس آخر  
يوم امتحان حتطلعني من الجامعة عليا.. آه.

هبة: طيب ربنا يسهل.

أشرف: يلا قومي بقى غيري هدومك، حخدك ناطر ونتغدى برّة.

هبة: طيب ماشي.

وتقوم هبة وتدخل غرفتها لكي تبدّل ملابسها، وقبل أن تستكمل ارتداء ملابسها  
يفتح أشرف الباب عليها؛ فتلتفت هبة للباب وتقول: إيه ده؟! مايصحّش كده.  
أشرف وهو يتجه إليها وعينه تلمع شهوة ورغبة فيها ويحتضنها بقوة ويريد  
أن يقبلها.

هبة: يا أشرف مايصحّش كده عيب، يا عم امسك نفسك شوّيّة، كلها كام يوم  
وأبقى معاك.

أشرف يعاقر معها ويمسك بيدها الاثنتين ويضعها خلفها، ويلف يده على  
وسطها ويقترّب منها، يجذبها له وينجح في تقبيلها ويتكّرها.

تخجل هبة أن تنظر في وجهه وتنظر في الأرض، وتحاول أن ترتب ملابسها التي  
تبعثرت عليها من مقاومة أشرف.

أشرف: يالهووووي على دي بوسة، أموت أنا في الخدود الحمر دول يالهووي يالهووي.

هبة: ممكن بقى تطلع عشان أغيّر هدومي.

أشرف: طيب ما تغيري كده وأنا قاعد، مش أنا جوزك برضه.

هبة: لا طبعًا مش حعرف، يلاً بقى عشان مانتأخرش، انت مش عايز تاكل.  
وتدفع به برفق وضحك إلى خارج غرفتها وتستكمل ملابسها، وتنزل معه  
يقضيان يومًا جميلًا، ويشترى لها أشرف الكثير من الهدايا ويوصلها إلى منزلها،  
ويذهب إلى منزله، تصعد هبة تتحدث مع خالتها في التليفون لإبلاغها بأن أشرف  
يريد إتمام الزواج في خلال أيام قليلة.

هبة: ألو يا خالتي إزيك؟

خالته هبة: أهلاً يا هبة إزيك؟

هبة: الحمد لله، بقول لك يا خالتي.

وتحكي لها هبة ما قاله أشرف.

خالته هبة: وماله يا حبيبتى، روجي واتجوزي، احنا لا حينفع نعمل فرح  
عشان أمك اللي لسة مَيّنة دي ولا حاجة، يبقى ادخلي وخلص، حتستنى إيه؟  
أهو تجيبيلك حته عيل يسليكي.

هبة: يعني حروح كده لبيتهم من غير حد من أهلي؟! طيب حاجتي وفرشي،  
طيب الشقة اللي حقعد فيها ظروفها إيه؟ أنا حتكسف أكلمه في حاجة دي كده.  
خالته هبة: أنا مش حعرف أجيلك، مرات إبراهيم كام يوم وحتولد، ابقي  
خُدي معاك أمك التانيه أم علاء، ما انتى على طول مبقياها عني.

هبة: مبقياها عنك؟! ليه بتقولي كده؟

خالته هبة: مش حنفتح مواضيع، خلاص ربنا يوفقك، سلام يا هبة، ولما  
تروحي هناك حبقى آجي أزورك وأباركلك وأنقطك.

تغلق هبة الخط وتجلس مكانها، وتفكر... هل ما سوف تقبل عليه خير أم لا؟!  
ولكن يستوقفها كلام خالتها وأم علاء عندما كرّروا عليها نفس الجملة التي تقول  
(انتى مابقاش ليكي حد، اتجوزي وخلفي حته عيل يملى عليكي البيت، واعملي  
عزوة وأسرة تعيشي عشانها) ولكن تحتار هبة بين أحلامها التي كانت تحلم بها،  
فهل الزواج ومن أشرف بالأخص سيكُون عونًا لها على استكمال دراستها وتحقيق

حلمها بأن تتخرج من إعلام وتعمل في مجال الإعلام والصحافة، أم سيكون عقبة في مشوارها؟! خاصة أن أشرف دائماً يريد أن يفرض رأيه وسيطرته عليها.

تأخذ هبة نفساً عميقاً وتقول: اللي يجيبه ربنا بقى، حيكون يعني قعدتي بين ٤ حيطان دي لوحدي كده مش كويسة برضه، وأنا حاول أسيطر على أشرف وأخليه ينقذ لي اللي عايزاه.

وبعد كم يوم تأتي أم أشرف وأخته لهبة لكي يساعدها في ترتيب أغراضها ونقلها إلى بيت أشرف وإتمام الزواج، تقول هبة: كان نفسي يا طنط ألبس فستان ونعمل حتى قعدة صغيرة كده.

أم أشرف: أولاً يختي إيه طنط دي؟ أنا من هنا ورايح اسمي ماما يا حبيبتى، وبعدين هي كلفة على الفاضي، احنا حنجهزلك الشقة ونرتب كل حاجة، وبعمل عشا عرايس وحتبقوا لوحدكوا، وحنسب البيت كله وغشي كام يوم كده على ما تدخلوا بقى عشان تبقوا على راحتكوا.

هبة: طيب أنا مش حاجي أشوف الشقه وفرشها.

أم أشرف: إيه ده؟ ما انتي حتيجي على طول، بقى دا الشقة جديدة وزى الفل، فاضل بس أوضة النوم ودي بقى حسيبها لذوقك، بكرة ولا بعده أشرف ياخذك وتروحوا للحاج خضر تختاروا أحلى أوضة نوم، وعمك الحاج حيدفع منها.

هبة: ربنا يسهل.

ويستكملوا ما يفعلونه.

وتاني يوم أشرف يأخذ هبة ويذهب لشراء غرفة النوم الخاصة بهما.

تقول هبة: هو أنا مش حروح أفرشها وأبص على الشقة؟ معقول يعني حتجوز كده من غير ما أشوف شقتي اللي حعيش فيها!

أشرف: يا حبيبتى انتي هانم، أنا أمي وأختي حيطبوا الدنيا، وبعدين الأول كانت الحاجة عايشة، كان ممكن تيجي معاها، لكن دلوقتي حتدخلي وتخرجي كده حيبقى شكلها وحش، أنا يوم الخميس حعدّي عليكى تكوني لابسة طقم

من اللي جايهملك من كام يوم، ونقف في الشارع كده نعرّف الناس إننا خلاص  
حنتجوّز، ونخرج خروجة حلوة، ونرجع على بيتنا بقى.

هبة: ولو إني مش مقتنعة بأي حاجة من اللي بتحصل بس حعمل إيه يعني.  
أشرف: كله حيبقى زي الفل.

ويأتي يوم الخميس، وتقف هبة تحت منزلها وبجوارها أم علاء وماجدة ومنال  
وأميرة، ويسلموا على هبة ويوضونها على نفسها وحياتها الجديدة.

ويظهر على ملامح أميرة ومنال عدم الرضى على ما يحدث لهبة.

وتذهب هبة مع أشرف بالسيارة، تقف أميرة وتقول لأمها: هو دا الطبيعي  
يحصل؟ البننت تدخل سوگيتي كده، محدش معاها ولا نعرف شقتها ولا فرشها ولا  
قايمةها ولا أي حاجة؟

أم علاء: هو يا بنتي حد كان يعرف إن أمها حتموت بدري كده، وكمان هي  
مكتوب كتابها وخالتها مشغولة بولادة مرات ابنها ومارضيتش تيجي، وأي خلاف  
بين أشرف وهبة حيادي للطلاق، ودة مش لمصلحتها يا بنتي، بلأرنا يهنيها يارب  
ويهدّي سرها.

أميرة: لا يا ماما أنا زعلانة، وربنا حياحسبنا بذنب البننت دي، بس ما باليد  
حيلة.

تنهي هبة سهرتها مع أشرف وتعود إلى منزله لأول مرة، وتصعد إلى الشقة،  
ويفتح أشرف الباب ويقول: اتفضلي.

تقف أم أشرف وأخته ويزغردوا فرحًا بقدم أشرف وعروسته..

تقف هبة وهي محرجه، يقول أبو أشرف: أهلا بست العرايس، ادخلي نورتي  
بيتك.

تدخل هبة وتجلس على أقرب كرسي تتفقده بعينها المكان؛ فهو يبدو على  
المكان النظافة، ولكن الأثاث ومحتويات الشقة ليست جديدة رغم نظافتها  
وترتيبها.

يقوم كل من أبو أشرف وأمه وأخته يسلمون على أشرف وهبة، وتقول أم أشرف:  
احنا حنمشي بقى يا أشرف، وشدّ حيلك بقى، تتهنّئ بعروستك، سلام يا هبة.

ويتركوهم ويذهبون إلى الإسكندرية كام يوم.

بعد أن يغلقوا الباب تقول هبة لأشرف.

هبة: أنا مش فاهمة حاجة.

أشرف: مش فاهمة إيه بس يا جميل هما مشيووا واحنا بقينا وحدينا يلا بقى يلا.

هبة تقف تقول: طيب هو احنا مش حنطلع شقتنا ولا إيه؟

أشرف: نطلع ما شقتنا هي دي.

هبة تنظر باستغراب: هي دي إزاي؟!

أشرف: من غير إزاي إيه مش عاجباكي؟

هبة: لا مش موضوع مش عاجباني، بس هي مش باين عليها إنها جديدة يعني.

أشرف: آه، ما دي شقة أبويا وأمي، يعني الشقة اللي احنا أصلاً عايشين فيها كلنا.

هبة: آه، ودي علاقتها إيه بينا؟

أشرف: ما احنا حنعيش هنا، انتي شايفة أهو الشقة كبيرة وواسعة دي ء إوض،

يعني حنعيش كلنا على حريتنا، وأوضة النوم اللي اختارتها مفروشة ومتعطرة

وزي الفل.

هبة: آه، بس ده ماكانش اتفاقنا يا أشرف ولا اتفاقكوا مع ماما.

أشرف: ماما آه، الله يرحمها بقى، أنا شقتي لسة ماخلصتش، فيها شغل،

وبعدين ما البيت ده كله بتاعى يعني هنا زي فوق... أدينا حنعيش مع بعض

وواحدة واحدة حنفرش فوق بقى ونبقى ننقل.

هبة: طيب وفرشي وحاجتي اللي أمك وأختك جُم خدوها.

أشرف: مالهم ما هم اتفرشوا، حاجة النيش في النيش والفرش في أوضتك

وحاجة المطبخ في المطبخ.



تقوم هبة بتشغيل «الفيديو» وتجلس مكانها مستغربة ما الذي يحدث أو سوف يحدث.

تجد أشرف يلف بضغاً من السجائر ويبدأ في شربها، رائحتها كريهة جداً مما يصيب «هبة» بالسعال والخناق تقول هبة: إيه القرف ده.

أشرف: قرف؟ حد يقول على الحشيش قرف؟

هبة: يا نهار أسود حشيش.

أشرف: أه يا بنتي دي أحلى دماغ تعالي كده جربي نفس وانتي تعرفي.

هبة: نفس إيه؟ إنت بتشرب حشيش يا أشرف؟

أشرف: ده تفاريح كده لزوم المزاج بس متعكنيش علينا بقى اتفرجي معايا كده على الفيلم حبيدأ أهو ومقولكيش بقى الفيلم حيعجبك أوي.

وتبدأ الأبطال بالظهور ولكن هبة تنظر إلى الفيلم وتقول له: إيه المناظر دي ده فيلم؟ ده إيه قلة الأدب دي؟!

أشرف: يادي العكنة يا بنتي انتي مسمعتيش عن ليلة الدخلة بيتعمل فيها إيه؟ أمال حندخل كده عادي؟

هبة: تدخل؟ إنت مفكر نفسك حتلمسني بعد القرف اللي شوفته ده؟ إنسى.. تقوم وتنصرف ذاهبة إلى غرفتها.

يذهب أشرف ورائها ويدخل خلفها الغرفة ويغلق الباب.

تقول له هبة: أخرج برة أنا مش طايقاك.

يدفع أشرف هبة على السرير بقوة وفي عينه شرار بينما تبدو عليه علامات التخدير من كمية المخدرات التي تعاطاها.

وقبل أن تستكمل هبة كلامها يقوم بتمزيق ملابسها وينقض عليها كالوحش الكاسر دون مراعاة لمشاعرها ويدخل عليها أشرف بالقوة وبعد أن ينال منها ويشبع رغبته الجنسية منها يتركها غارقة في دموعها وينام وهو لا يشعر بشيء حوله.

تحاول هبة أن تستجمع قواها وتقوم من مكانها بصعوبة وكأنها كانت في معركة وليست في ليلة تتمناها أي بنت.

تدخل هبة إلى الحمام تقف تحت «دش» المياح وهي تبكي حظها فإذا كانت تفكر في الانفصال قبل ذلك فبعد الآن لا تستطيع فهي أصبحت زوجته رسمياً وشرعياً، تخرج من حمامها وتضع رأسها على وسادة السرير وتستسلم للنوم.

.....

يفتح علاء الباب ويدخل، يضع مفاتيحه على المنضدة.

علاء: السلام عليكم.. إزيك النهاردة؟

سلوى: الحمد لله كويسة.

علاء: إيه؟ عاملة غدا ولا حنجيب من برة؟

سلوى: لا ده أنا عاملة أكل النهاردة بطبخ فيه من امبارح.

علاء: يالهوي من امبارح؟ طيب يا ستي كتر خيرك أنا جايب فاكهة وحاجات للبيت حطتهم برة.

سلوى: طيب حقوم أحضر السفارة واحط الفاكهة في التلاجة.

يجلس كل من «سلوى» و«علاء» على السفارة يتناولون الغداء.

سلوى: إيه رأيك؟

علاء: كويس بس ابقي قللي الملح شوية.

سلوى: لا أنا مش عايزة أي انتقاد أنا من امبارح بعمل في الأكل ده وتعبت فيه.

علاء: هو أنا قولت إيه؟! كويس وابقى قللي الملح.

سلوى: يا سلام مفيش تسلم إيدك؟ مفيش شكرا!؟

علاء: بس كده، تسلم إيدك يا ستي وشكراً.

ويقوم من على السفارة بعد أن أنهى طعامه.

يجلس علاء في غرفة المعيشة يحتسي الشاي...

تأتي سلوى ومعها طبق به بعض من حبات الفاكهة التي أتى بها علاء، تضعها على المنضدة، يلاحظ علاء أن هناك بعض القطع غير صالحة للأكل أو معطوبة بعض الشيء.

علاء: إيه ده؟ هي الحاجة بايظة ولا إيه؟ أنا جايب كراتين مقفولة.

سلوى: لا بالعكس الفاكهة كويسة جدًا.

علاء: أمال إيه ده؟!

سلوى: دول كانوا مش حلوين جبتهم عشان تاكلهم أصل ماما قالت لي لما يجيب فاكهة وتطلع فيها حاجة بايظة تحطيها له عشان يبطل يجيب كده تاني.

علاء: نعم؟؟ لا يا حبيبتى المعطب ده تاكليه انتي وامك أنا تعبان وشقيان وانا اللي بصرف وبجيب، يجيلي أحسن حاجة... ثم يضرب طبق الفاكهة بيده فيبعثره هنا وهناك ويتزكها ويدخل غرفة نومه.

تدق الساعة ١٢ منتصف الليل يرن جرس الهاتف المنزلي عند «علاء» يقوم «علاء» من فراشه منزعجًا، ويجفل ثم يقول: خير يا رب!

يرفع سماعه التليفون ويقول....

علاء: ألو؟ مين؟

أنا «سمير» أخو «سلوى».

علاء: أهلا يا «سمير» خير.

سمير: معلىش أنا آسف على الإزعاج.

علاء: لا خالص ولا يهملك خير.

سمير: بابا تعبان أوي في المستشفى في رعاية القلب بقاله يومين وللأسف طالبين مننا مبلغ كبير أوي وانا وماما مش معانا دلوقتي لحد أول الشهر بس اقبض واردهملك.

علاء: لا حول ولا قوة إلا بالله متقولش كده ولا يهملك قول عايز كام؟

سمير: أنا آسف والله يا «علاء» بس انت أخونا.

علاء: عيب يا «سمير» قول بس محتاج كام؟  
يلفت الكلام انتباه «سلوى» وتقوم من نومها لتجلس على الفراش.  
علاء: بس كده عنيا الصبح حولك ألفين جنيه ولو عوزت أي حاجة في أي  
وقت قول، ده زي والدي.

ويخلق علاء الخط....

تقول «سلوى»: هو ده سمير أخويا؟

علاء: أه هو انتي كنتي عارفة إن والدك تعبان؟

سلوى: أه.. عارفة من يومين.

علاء: طيب مش كنتي تقولي؟! كنت كلمتهم أطمئن عليه بدل مانا آخر من  
يعلم كده.

سلوى: مجتش مناسبة.. هو بقى بيكلمك ليه؟ عايز إيه؟

علاء: ما انتي سامعة أبوكي محجوز ومحتاجين فلوس.

سلوى: أه واحنا مالنا.

علاء: لا ده ابوكي انتي مش ابويا أنا.

سلوى: عارفة.. معموش حسابهم ليه قبل ما يدخل؟

علاء: يدخل فين؟! ده تعب يعني محدش عارف حيتعب امتي وبعدين أنا  
قولت حديله يعني حديله.

سلوى: لا.. أنا قولتلك لا.. ملناش دعوة.

علاء: انتي تقولي على مزاجك.. أنا مشوفتش كده بصراحة!! انتي خايفة  
ميردهمش يعني؟! يا ستي ولا يهملك أهلك أهلي.

سلوى: خلاص انت حر أنا زهقت من تصرفاتك.

علاء: تصرفاتي أنا؟ أقولك على حاجة؟! بجد انتي محتاجة دكتور نفسي أه  
والله انتي مش طبيعية... ويرجع لفراشه ليستكمل نومه.

يأتي اليوم التالي يخرج «علاء» إلى عمله ويرسل المبلغ المتفق عليه وبعد انتهاء يوم العمل الشاق في طريق عودته للمنزل يحدث تصادم قوي بين «علاء» بسيارته وسيارة أخرى مما يجعل «علاء» يتأخر على ميعاد عودته للمنزل خاصة أن الموضوع تحول إلى قسم الشرطة والسيارة تهشمت وهو أصيب بجروح طفيفة. يصل «علاء» إلى منزله بعد الساعة الواحدة بعد منتصف الليل يجد زوجته غارقة في نومها لا تبالي بتأخره وكأنها لا يهمها وجوده من عدمه...

يدخل إلى غرفة النوم ويضيء الأنوار و«سلوى» نائمة في فراشها فتقول بصوت نائم: تء تء تء تء اطفى النور إيه ده؟

علاء: أطفى النور إيه؟؟ هو انتي مش حاسة اني اتأخرت؟ ولا عارفة الساعة كام؟ سلوى: يوووه أنا عايزة أنام.. الصبح نتكلم.

علاء: أنا عامل حادثة بالعربية قومي حضري لي الحمام جسمي واجعني واعميلي لقمة أنا مكلتش من الصبح.

سلوى: تنظر إلى الساعة وتقول حمام إيه وأكل إيه الساعة واحدة ده؟!

علاء: بقولك عامل حادثة وتعبان، مش فارق معاي ولا هايين عليكي حتى تقولي لي مالك.

تقوم «سلوى» من فراشها وهي تتأفف وتقول: حيحصلك إيه يعني؟؟.. مدام وصلت البيت وقاعد بتناكف فيا، تبقى زي الفل مفكش حاجة!

وتذهب لتبلي طلب «علاء» وهي مجبرة عليه وكارهة له..

.....

في صباح اليوم التالي.

تقف هبة في المطبخ عند أهل «أشرف» تحضر الفطار وتنظف المنزل، تسمع صوت طرقات الباب فتفتح لتجد أم «أشرف» وأخته وأباه عادوا من إجازتهم.

تقول أم «أشرف»: ياااه مفيش أحلى من بيت الواحد.

تستقبلهم «هبة» بضيق فهي مازالت غير راضية على ما فعلوه فيها فكلهم ضحكوا عليها.

تقول أخت «أشرف»: مالك ياختي ضاربة بوز في وشنا كده ليه؟؟ إيش حال مكناش بعيد عنك بقالنا كام يوم!

أم «أشرف»: أمال «أشرف» فين؟ لسه نايم.

هبة: أه يا طنط لسه نايم وانا عايزاكي في كلمتين.

أم أشرف: لا كلام إيه دلوقتي؟.. قومي حضريلنا لقمه ناكلها واعمليلنا شاي نرتاح من السفر والمشوار وآخر النهار نتكلم أنا مش فايقة دلوقتي.

«أماني» أخت أشرف: أنا داخلة أنام يا ماما.. لا عايزة أكل ولا اشرب من وش مرات ابنك دي، لما أقوم أنا حبقى أكل، سلام!

أم أشرف: طيب يلا يا بنتي اتحركي حتفضلي واقفة تتفرجي علينا كده زمان عمك الحاج جعان!

تدخل «هبة» إلى المطبخ تجهز سندوتشات للفطار وتعد الشاي لهم وتوقظ «أشرف» من نومه.

يقول أبو «أشرف»: مش كفاية يا بيه بقى نوم في العسل وتقوم تفتح المخروب اللي تحت ده؟

أشرف: يوووووه اصطبحت على الصبح.. يا فتاح يا عليم أنا لحقت دانا بقالي ٣ أيام بس وانت لسه جاي!.. ما تهدي يا عم الحاج ع الصبح!

يقول أشرف لـ «هبة»: قومي حضريلي طقم خليني أنزل أشوف المعرض.

تذهب هبة إلى غرفتها تمر على غرفة «أماني» تجد الباب مفتوحًا قليلًا، تلاحظ أماني نائمة على فراشها الذي يوجد عليه لحاف «فاير» كان من ضمن جهاز «هبة»، تستغرب «هبة» وتقف لشوانٍ وتطرق باب غرفة «أماني».

أماني: يوووووه مين؟ مش قولت عايزة أنام.

هبة: أنا يا أماني.

أماني: خير؟ فيه حاجة؟!

هبة: أيوة.. هو اللحاف اللي انتي متغطية بيه ده مش المفروض بتاعي؟

أماني: المفروض؟؟؟؟ أه المفروض إنه بتاعك وأنا أخذته.. فيه حاجة عايزة تقوليها روعي قولها لماما واطلعي بقى واقفلي الباب وراكي أنا عايزة أنام..

تخرج هبة وتغلق الباب ورائها....

وتذهب إلى غرفتها تحضر لـ «أشرف» ملابسه يدخل «أشرف» يلاحظ على وجهها الغضب.

أشرف: خير مالك ع الصبح؟

«هبة» تحكي له ما حدث مع أماني..

أشرف: بقولك إيه أنا مش ناقص، ومليش في شغل النسوان ده.. عندك أمي اتصرفي معاها أديكي شايفة أبويا راجع مش طابق نفسه، إوعي خليني أنزل.. ويتركها ويخرج. تقف «هبة» مكانها وهي تشتعل غيظًا من كل ما يحدث، يرن هاتف المنزل فتخرج «هبة» لكي تجيب على الهاتف..

هبة: ألو؟ أميرة

ألو؟ إزيك يا «هبة» أنا أميرة

هبة: أبله أميرة.. إزيك عاملة إيه؟

أميرة: إزيك انتي يا حبيبتي عاملة إيه؟

«هبة» تبكي وتقول لها:

أنا تعبانة أوووي!!

أميرة: طيب مالك؟ تعرفي تحكي؟

هبة: لا مش دلوقتي أنا امتحاني كمان أسبوع حكلمك وابقى أشوفك عند

الجامعة

أميرة: وماله يا حبيبتى، حستناكي..، وتنتهي معها الحوار ثم تغلق الخط بعد ساعات تستيقظ أم «أشرف» من النوم تجد «هبة» جالسة على كرسي الأنتريه وتشاهد «التلفزيون» أم أشرف: عملتي إيه ع الغدا؟

هبة: غدا إيه؟ أنا معملمتش أكل!

أم «أشرف»: ليه إن شاء الله؟ على إيدك نقش الحنة؟ مش شايفانا جاين م السفر لما عمك يصحي حقوله إيه لما يسالني ع الأكل؟؟!

هبة: وأنا أعرف منين انتو عايزين تاكلوا إيه؟ التلاجة لسه فيها حاجات من اللي كنتي عاملها ومعرفش أصلا انتو بتاكلوا إيه! وبعدين أنا عايزة أعيش في شقتي لوحدي انتو ضحكتموا عليا.. فين حاجتي اللي خدتوها؟

يعني إيه فرشي الأقيه في كل حته شوية وبتتك واخدة لحافي وفرشاه وأكلمها تقولي قولي لماما!!!.. وكوبياتي وحلي في المطبخ مع حاجاتكو، فين شقتي؟ فين عفشى؟ ده ممكنش اتفاككو مع ماما..

أم «أشرف»: ماما بقى الله يرحمها سبتك لوحدك، واحنا بقى مش حنستنى لما تحصل مصيبة ونلاقيكي حامل من غير ماناس تعرف إنك متجوزة.. ولا كنتي عايزة تفضلي هناك لوحدك داخلة خارجة محدش يقولك رايحة فين وجاية منين، وبعدين شقة إيه يام شقة؟! هي الشقة دي مش كانت حتعوز منك انتي كمان فرش معاه ولا شوية الكراكيب اللي خدناهم من كوبيات وبطاطين وملايات هي اللي حتفرش الشقة؟ ادينا وفرنا عليكي وعلينا وبعدين أنا ابني يفضل كده جنبى قدام عيني أنا محيلتيش غيره.. وأماني كلها شهرين تلاتة وربنا يكرمها وتتخطب وتتجوز وتروح بيت عدلها وحيبقى البيت بتاعك! هبة: أها! ده مترتب بقى من الأول كل حاجة؟ طيب أنا عايزة لحافي اللي بنتك وخداه من غير إذن!

أم أشرف: أختك وعاجبها حاجة وخذتها.. ماتتي حتنامي وتاكلي وتشربي وتاخدي مصروف من هنا، يعني خلاص بقت عيشة واحدة واللي عندك عندنا واللي عندنا عندك!

هبة: كده؟ من غير استئذان؟

أم أشرف: استئذان ده إيه ياختي؟ هي مدرسة؟ قومي يلا طلعي لحمة م التلاجة واعملي أي خضار عليها.. أنا منصفاه وحاطاه في الفريزر.. يلا زمان عمك الحاج حيصحى يطلب الأكل..

تقوم «هبة» من مكانها وهي مغصوبة على أمرها فالموضوع كله أصبح غير مرغوب فيه.. يقترب موعد امتحانات هبة ويبدأ انشغالها بالذاكرة لتغلق الباب عليها بالساعات لكي تذاكر ولكن هذا الوضع لا يعجب حماتها وأماني أخت زوجها! أماني: يا هبة.. انتي يا ست هبة!.. تغلق «هبة» الكتاب الذي تذاكر منه ثم تجيب:

هبة: نعم!

أماني: نعم الله عليكي ياختي.. مالك حابسة نفسك في الأوضة ليه؟

هبة: أنا امتحاني بكرة وقاعدة بذاكر

أماني: امتحان إيه؟ ما تقعدني بقى بلا علام بلا وجع قلب!

هبة: العلام مش وجع قلب.. عايزة إيه؟

أماني: اعمليلنا شاي أنا وامني..

هبة: نعم؟!

أماني: إيه؟ مسمعتيش؟

هبة: امممم.. طيب ماشي.. حعمل الشاي ومحدش ينادي عليا تاني لحد ما

اخلىص مذاكرة ماشي؟

أماني: إيه يا بنتي موضوع المذاكرة ده؟ مش خلاص اتجوزتي بتذاكري ليه؟؟!

هبة: إيه علاقة ده بده؟ أنا عايزة أكمل تعليمي!

أماني: آاه وأشرف موافق؟

هبة: أه موافق.. ثم تدخل «هبة» لتعد الشاي وتذهب إلى غرفتها لتستكمل

مذاكرتها.. يأتي صباح اليوم التالي تستيقظ هبة وتجهز نفسها، وتترك «أشرف» نائمًا وتذهب للامتحان ثم تنتهي منه وتذهب لـ «أميرة» في عملها فتجلس معها قليلاً من الوقت كما وعدتها من قبل، تحكي معها وما على أميرة إلا أن تصبرها وتقويها على معيشتها فالطلاق بالنسبة للمجتمع عارٌ على المرأة فمجتمعنا العربي يجبرنا كنساء إن نعيش بذل ومهانة خير من أن نعيش مطلقات فالطلاق هنا يعتبر وصمة عار على السيدات..

يستيقظ «أشرف» من نومه حوالي الساعة الثانية ظهرًا ولا يجد «هبة» فيتذكر أنها بالامتحان ويخرج من غرفته لينادي على أماني لكي تحضر له الفطور.

أشرف: يا أماني يا ماما حد يعملي لقمه وكوباية شاي

أماني: أنا مالي مراتك فين؟

أشرف: مجتتش من الامتحان

أم أشرف: وأنا بقى كنت جوزتك عشان تقرفني بفطار وشاي؟؟ وامتحانات إيه يا اخويا؟ ماخلاص بقى تعيش عيشتك وتقعّد تخدم جوزها!

يسمع أبو أشرف الحوار فيأتي من بعيد

أبو أشرف: هي مراتك مش ناوية تخلف بقى؟ بقالكوا شهرين وزيادة.. إيه؟ مفيش أخبار؟؟

أشرف: نخلف إيه؟ احنا لحقنا؟

أبو أشرف: أه تخلف.. أنا عايز حفيد يشيل اسمي.. يام أشرف تخديها وتروحووا للدكتور بتاعك وشوفي محملتش لحد دلوقتي ليه؟

أم أشرف: حاضر!

تنتهي «هبة» يومها وتعود وهي في طريقها للبيت تمر على المحل، تجد ماجدة تسألها على سير العمل في المحل وإذا كان هناك شيء ينقص المحل وعن إيرادها في المدة الماضية..

ماجدة: عايزين بضاعة، والإيراد أستاذ أشرف عدى خده أول امبارح

هبة: طيب ماقولتليش ليه؟

ماجدة: أنا مبشوفكيش وبتكسف أعدي عليكى هناك وأستاذ أشرف بيمر هنا  
كتير وأنا بقوله يبلغك

هبة: طيب ماشي بكرة حتكون عندك البضاعة وابقى سيبي الإيراد متبعتهوش  
مع أشرف عشان نجمع تمن البضاعة اللي حنجيها.. سلام.

وتذهب «هبة» إلى بيتها عند «أشرف» تدخل قائلة:

هبة: السلام عليكم

أشرف: أتأخرتي ليه؟

هبة: خلصت امتحان وعديت ع المحل أشوفه

أشرف: أاه المحل! طيب ماشي.

أبو أشرف: هو انتي حتفضلي تننططي كده كتير؟ محل وامتحانات؟ ما تقعدي  
في بيتك بقى! ولا عاجبك السرمحة؟؟

هبة: إيه يا عمي الكلام ده سرمحة إيه؟ المحل ده بتاعي وبتاع أمي وانتوا  
عارفين إن عندي محل، ودراستي مش سرمحة أنا متففة مع أشرف إني حكمل  
تعليمي.

أبو أشرف: وأنا بقى مش عايزك لا تنزلي المحل ولا تكلمي تعليمك أنا عايزك  
تقعدي في البيت عشان أنا عايزك تخلفي.. أنا عايز أحفاد.. أنا حر.

هبة: إن شاء الله.. وتتركهم وتدخل غرفتها

«أشرف» يجلس صامتًا وكأن الكلام ليس موجه لزوجته وبعد ثوانٍ يدخل إلى  
غرفته! هبة: انت خدت كام من ماجدة من إيراد المحل؟

أشرف: ماجدة؟ أه خدت تقريبًا ٥٠٠ جنيه

هبة: وهما فين؟

أشرف: مش فاكر تقريبًا صرفت منهم شوية

هبة: طيب مقولتليش ليه؟ و صرفت ليه؟ مش المفروض تيجي تدهملي

أشرف: عادي ما فلوسك هي فلوسي انتي مش مراقي؟

هبة: أه مراتك بس دي فلوس بجيب بيها بضاعة وبدفع بيها إيجار المحل والشقة و بصرف بيها على دراستي!

أشرف: انتي حتحاسبيني؟

هبة: أه ححاسبك، لما كل يوم قبل ما تنام تطلع ورقة الهباب اللي إنت بتشربه وتفضل تشرب وتبقي مش داري إنت بتعمل معايا إيه ولا بتتصرف بقذارة ازاي يبقي أحاسبك.. إنت كرهتني في السرير وإني أنام جنبك..

يصفح «أشرف» «هبة» على وجهها ويدفع بها إلى السرير ويضربها بيده على وجهها وفي أماكن متفرقة من جسدها وهو يقول:

أشرف: انتي شكلك عايزة تتربي من جديد، وعشان أريح دماغى بيت امك ده مش حتعتبيه ومفيش محل... المحل أنا اللي حباشره وابعثلك الفلوس بمزاجي وأقولك على حاجة كمان؟.. مفيش جامعة، سامعة؟ مفيش امتحانات ولا جامعة ولا فيه نزول من البيت عشان تعرفي تحاسبيني كويس!

ويخرج مغلقًا باب غرفة النوم ورائه فتجلس «هبة» على الأرض وتضع رأسها على السرير وتبكي بدون صوت، تبكي بدموع من نار تكويها على حالها ودراستها وبيتها ومحلها ومستقبلها الذي انهار بسبب تحكم إنسان مريض نفسيًا يشعر دائماً بالنقص اتجاهها، تمر الأيام ولم تذهب «هبة» إلى باقي الامتحانات ولم تمر على «أميرة» فتقلق «أميرة» عليها وتتصل بالتليفون عند «أشرف» لتجيب أم أشرف عليها وتقول: نائمة لما تصحي حبقى أخليها تكلمك!

تقف هبة تسمع كلام أم أشرف..

هبة: ليه قولتيلها إني نائمة مانا قاعدة أهو!!

أم أشرف: هي مين دي؟ تقربلك إيه عشان تكلمك؟ كنتوا جيران وخلص.. خالتي وخالتك وانفروا الخالات.. قومي يلا شوفي وراكي إيه؟ واعملي حسابك

ليليل رايحين للدكتور زي ما عمك الحاج قال عشان نشوف موضوع الخلفة ده..  
«هبة» تنظر في الأرض وتصمت.. يأتى الليل وتذهب مع حماتها إلى الدكتور  
فيؤكد الدكتور أن «هبة» لن تحمل بسهولة وأنها تحتاج لبعض العلاج لكي تتمكن  
من الحمل ينزل الخبر على أم أشرف كصاعقة ولكنه ينزل على «هبة» بالسكينة  
والهدوء فتحمد ربها بداخلها أنها لم ولن تنجب طفلاً من هذه العائلة..

بعد عودتهم للبيت..

أبو أشرف: خير؟ طميني

أم أشرف: مرات ابنك عندها عقم مؤقت يعني لازم كل عيل تجيبه تتابع مع  
الدكتور وتاخذ أدوية وترتاح وتبطل تنتطط هنا وهنا..

أبو أشرف: يعني مش حتخلف؟!

أم أشرف: لا حتخلف بس بصعوبة ومصاريف علاج وأدوية

أبو أشرف: أأاه والمحروس ابنك عرف؟

أم أشرف: إنت مالك وماله بقى؟ هو ذنبه إيه؟؟ هو كل حاجة المحروس ابنك

المحروس ابنك؟؟!!

تتركهم «هبة» وتدخل إلى غرفتها وتسمع حديتهم وشجارهم وتمر الأيام  
وتختفي «هبة» وتنقطع أخبارها عن الجميع وفي يوم كانت «أميرة» عند أمها  
وسمعت صوت باب شقة «هبة» يُفتح فخرجت بهدوء ونظرت من على سلم  
البنية لتجد «أشرف» خارج من الشقة ويغلق الباب وراءه بحرص وينظر حوله  
في قلق ثم ينزل إلى خارج المنزل.. نظرت «أميرة» على الباب متوهمة أن «هبة»  
بالداخل خاصة أنه يوجد ظل شخص ما خلف الباب من الداخل فتنزّل «أميرة»  
إلى الشقة لتطرق الباب بهدوء ولكن أحداً لم يجيب! تسمع «أميرة» أصوات  
نفس خلف الباب ولكن لا أحد يجيب!! ينتاب الشك قلب «أميرة» فتصعد إلى  
شقة أمها وتقف على السلم بحذر تراقب شقة «هبة» وبعد دقائق قليلة تجد  
«ماجدة»!!!

«ماجدة» السكرتيرة تخرج من الشقة وتغلق الباب في هدوء وتتحرك بهدوء حتى لا يراها أحد فمن الواضح أن «أشرف» و«ماجدة» على علاقة غير شرعية وشقة «هبة» هو الملاذ والمأوى لهما!

تدخل «أميرة» شقة أمها وهي تتأفف..

أم علاء: مالك يا بنتي؟؟ فيه إيه وداخلة طالعة ليه كده؟؟ فيه حاجة؟؟

أميرة: أه يا ماما.. وتقص عليها ما حدث كله!

أم علاء: إن بعض الظن إثم يمكن كانوا بيحبوا حاجة لـ «هبة» ولا حاجة!

أميرة: لا يا ماما حاجة إيه بس؟ أنا مش مرتاحة.. وبعدين غياب «هبة» كده واختفائها مش مطمئني..

أم علاء: أقولك إيه يا بنتي بس؟ ربنا يطمئننا عليها

أميرة: أقولك أنا... انتي تكلمي أم «إبراهيم» خالة «هبة» وتخليها تيجي وتخليها وتروحووا تزوروا «هبة» وتطمنوا عليها وأهو خالتها من حقها تشوفها..

أم علاء: والله فكرة! طيب خلاص بكرة أكلمها

أميرة: بكرة إيه؟ انتي تكلميها دلوقتي وتخليها تيجي..

تتحدث أم علاء مع خالة «هبة» وتتفق معها على أن تأتي في الغد، وبالفعل تأتي خالة «هبة» وتقابل أم «علاء» ويذهبان سوياً للاطمئنان على «هبة»، تستقبلهم أم «أشرف» ليجلسوا في «الأنترية».. تأتي لهم «هبة» من بعيد وهي شاحبة اللون حزينة الملامح وكأنها وردة ذبلت على غصنها تجلس معهم في حضور أم أشرف فهي لم ولن تتركهم بمفردهم تقول خالة هبة: مالك يا بنتي؟ عدمتي ووشك أصفر كده ليه؟؟

تجيب أم «أشرف» بدلاً عنها..

أم «أشرف»: ليه يام «إبراهيم» كده ماهي زي الفل أهي؟ مبنأكلهاش يعني

ولا مبنأكلهاش؟؟!

أم علاء: لا.. هي مش قصدها دانتوا بيت الكرم  
أم «إبراهيم»: الموضوع مش أكل يام «أشرف» بس هي متبدلة.. بقى هي دي  
«هبة» نواره العيلة؟؟!!

أم «أشرف»: أهى عندك اسألبيها يمكن بنشغلها في الفاعل واحنا مش واخدين  
بالنا!! عن اذنكوا أقوم اعمل الشاي..

تجلس «هبة» بجوار أم «علاء» وخالتها لتقول أم «علاء»..

أم «علاء»: انتي كويسة يا حبيبتي؟..

تقول «هبة» بحزن..

هبة: أه الحمد لله على كل حال!

خالة «هبة»: مالك طيب؟!

هبة: مفيش.. أهى عيشة والسلام

وهنا جاءت أم تشرف لتسمع آخر جملة فتقول..

أم «أشرف»: مالها العيشة يا ست «هبة»؟ مش عاجباكي في إيه؟ أكلة شاربة  
نايمة البيت كله تحت أمرك.. مع إنك زي الأرض البور لا في منك طرح ولا ملح..

أم «علاء»: إيه الكلام ده ياختي؟ تفي من بوقك..

أم «أشرف»: مش كلامي يا حبيبتي ده كلام الحكيم اللي قال إن بنتكوا معيوبة  
مش حتخلف بسهولة وابننا شاريها ومرضاش يطلقها وقال حيصرف عليها يا حبة  
عين أمه لحد ما تخلف..

ترد أم «علاء» عليها وترد خالة «هبة» ويحتد النقاش فتقف «هبة» وسطهم  
تحاول تهدئة الجو ولكن تفشل فتخرج أم «علاء» وخالة «هبة» من المنزل وهن  
غاضبات من رد فعل أم «أشرف».. تجلس «هبة» مكانها على كرسي «الأنترية» فقد  
أفسدت أم «أشرف» بكلامها فرحة «هبة» بزيارة أحد أقاربها لها.. تخرج أم «علاء»  
وخالة «هبة» ثم تتحدث أم «علاء» لخالتها قائلة..

أم «علاء»: يا لهوي ياختي شوفي الولية!  
خاله «هبة»: معلش ياختي حنعمل إيه؟ ما هو حقهم لو البت مبتخلفش  
بجد! وكويس إنه مطلقهاش لدلوقتي وصابر عليها..  
أم «علاء»: ياختي ما يطلقها ولا يغور دول بانوا على حقيقتهم..  
خاله «هبة»: أهو نصيبتها بقى.. ربنا يقويها.. إلا بقولك إيه ياختي ممعكيش  
مفتاح لشقة «هبة» ارتاح فيها شوية وأسافر الصبح!؟  
أم «علاء»: كان على عيني ياختي مش معايا.. تعالي ارتاحي عندي ولو مشالتكيش  
الأرض أشيلك فوق راسي  
خاله «هبة»: طيب نكسر الباب بقى ونبقى نغير «الكالون» واخذ نسخة من  
المفتاح الجديد واسيب معاي نسخة لـ «هبة»..  
أم «علاء»: لا ياختي نكسر إيه؟ ده اسمو كلام؟ ماكانا مع «هبة» فوق مخدتيش  
منها المفتاح ليه؟  
خاله «هبة»: لا لا إيه؟ أمال أنا حبات في الشارع؟  
أم «علاء»: والشارع ليه؟ مانا قولتلك على راسي.. تعالي شقتي أنا قاعدة  
لوحدي..  
خاله «هبة»: لا ياختي على إيه؟ السلام عليكم..  
وتذهب وتترك أم «علاء» وتعود إلى بلدها غاضبة من أم «علاء»..  
أم «علاء» تقف في حيرة من أمرها وتردد لا حول ولا قوة إلا بالله.. ترى  
ماجدة تفتح المحل فتقول لها..  
أم «علاء»: صباح الخير يا ماجدة، فتحتي متأخر يعني دي الساعة واحدة  
وشوية.. ماجدة: معلش أصلي كنت تعبانة شوية.  
أم «علاء» أأه ألف سلامة إلا قوليلي هو انتي كنتي فوق امبارح؟  
يظهر على «ماجدة» التردد والقلق..

ماجدة: إيه؟ فوق؟ فوق فين؟

أم «علاء»: في شقة الأستاذة «هبة»

ماجدة: لا وانا إيه اللي حيطليني؟

أم «علاء»: طيب أصل أنا سمعت صوت قولت يمكن بعنتك تجيبني حاجة ولا حاجة.. ماجدة: لا والله يا حاجة..

تركها أم «علاء» وتصعد وهي تؤكد لنفسها كلام «أميرة»..

تمر الأيام والوضع كما هو إلى أن يأتي يوم تقوم فيه أم «علاء» وهي لا تستطيع التنفس فتصل بـ «منال» التي تأتي على الفور ومعها «أميرة» ومعهما الدكتور.. يدخل الدكتور ويكشف على أم «علاء» ثم يقول..

الدكتور: البقاء لله يا جماعة.. الحاجة أم «علاء» ماتت بسكتة قلبية!

ينزل الخبر على «منال» و«أميرة» كالصاعقة وتصرخ «أميرة»..

أميرة: ماما ماتت..

وتحتويها «منال» في حضنها ويكيان وفاة والدتهما وتقوم «منال» بالاتصال بـ «علاء» لتبلغه.. فيرد «علاء»..

علاء: استنوني أنا نازل حالاً مش حاخذ أجازة أنا لازم أقف على دفنة امي..

ويبدأون في استخراج شهادة الوفاة والغسل وينتظرون مجيء «علاء» لكي يودع أمه لآخر لحظة.. يبدأ صوت القرآن يعلو في الشارع مما يلفت انتباه الجميع يرى «أشرف» حركة غير عادية عند بيت «هبة» يتحدث مع ماجدة في «التليفون» يسألها عما يحدث فتقول له أن أم «علاء» (تعيش إنت) يتحدث هو بدوره إلى أمه في «التليفون» ويقول لها..

أشرف: حضري نفسك أم «علاء» ماتت وتعالى عشان تروحي مع أولادها الترب.. تسمع هبة الحوار وتفهم أن أحداً ما تُوفِّي ولكن لا يخطر على بالها أن أمها الثانية هي التي تُوفِّيت تقول لحمايتها..

هبة: مين اللي مات؟؟

أم أشرف: لا حول ولا قوة إلا بالله دي أم «علاء» جارتكوا تعيشي انتي!!

ينزل الخبر على «هبة» كالصاعقة وتذكر موت أمها..

ترمي كوب الشاي من يدها وتدخل إلى غرفتها مسرعة.. تضع على نفسها عباية) سوداء وتجري حافية القدمين دامعة القلب والعين باكية النفس والروح على فراق أمها الثانية يراها «أشرف» وهي تجري مشتتة في الشارع يحاول أن يوقفها ولكن لا يستطيع، تصعد «هبة» إلى شقة أم «علاء» لتجد الجميع متسحين بالسواد و«أميرة» و«منال» تبكيان تقف أمامهما وتقول..

هبة: هي فين؟؟

تحتويها «أميرة» في حضنها وتقول..

أميرة: تعالي يا «هبة» أمك ماتت يا «هبة»..

تردد «هبة»: هي فين؟؟

تأخذها «منال» وتدخل بها إلى غرفتها لتجدها مستلقية على السرير وهي في كنفها ناصع البياض مثل قلب أم «علاء» الذي احتوى «هبة» وأمها منذ سنوات كثيرة، تقبلها «هبة» من جبينها وتحضنها وتجلس على الأرض ويتكرر مشهد موت أم «هبة» مرة أخرى على أذهان «هبة»، تمر الساعات والجميع في انتظار «علاء»...

يصل «علاء» عند الساعة ٤ عصرًا ومعه زوجته التي اتشحت بالأسود.. يدخل «علاء» يبحث في عين الجميع عن أمه ثم يدخل غرفتها ليجدها في كنفها فيقبلها ويحملها على ذراعه ويضعها بيده في خشبة الموتى وينزل الجميع ورائها لكي يدفنها يبكي الجميع بحرقة وتنهار «هبة» و«أميرة» وتحاول «منال» أن تمسك بنفسها وتشد من أزهرهم فهي أختهم الكبرى يدخل «علاء» القبر مع التربي ليطمئن على أمه في مئوها الأخير ويرجع الجميع إلى البيت ليستكملوا مراسم العزاء.. يجلس النساء في عزاء النساء في شقة أم «علاء» والرجال تقف بالأسفل

في ترتيب (صوان) العزاء وينتهي اليوم الأول.. تقف «هبة» على رجلها وتحاول أن تنزل شقتها لتطمئن عليها تدخل الشقة وتجد كل شيء في مكانه، تدخل غرفة نومها لتجد السرير غير مرتب وكأن أحداً ما كان نائماً عليه تحاول أن تتذكر.. هل هي قامت بترتيبه قبل أن تترك المنزل؟؟ أم هذا هو حاله من البداية؟؟.. تدخل الحمام لتجد وراء الباب أحد ملابسها الخاصة بغرفة نومها ملقى على الغسالة فتستغرب أكثر وأكثر ما الذي يحدث هنا؟؟ ومن أتى بهذه الملابس؟ وكيف دخلت الشقة؟ تحاول أن تربط الخيوط ببعضها فتتجول هنا وهناك لكي تحاول أن تجد شيئاً آخر يحل لها اللغز إلى أن وجدت دليل إدانة مطفاة السجائر (الكريستال) موجودة بالمطبخ وبها بواقى سجائر من نفس شكل سجائر «أشرف».. تمسك واحدة منها وتشمها تجدها نفس الرائحة فهي سجائر ملفوفة بها بواقى «حشيش» و«بانجو» فقد حفظت «هبة» رائحتها وشكلهما من كثرة ما رأتهما مع «أشرف».. تستنح «هبة» أن «أشرف» يأتي هنا ومعه إحدى النساء ولكنها لا تعلم من هي!! تترك كل شيء في مكانه وتصدر مرة أخرى إلى العزاء وبعد دقائق تأتي أم «أشرف» لتأخذ «هبة» لبيتها تقول «هبة»..

هبة: سبيني أبات النهاردة مع «أميرة» و«منال

» ترد أم «أشرف»..

أم «أشرف»: نعم يا حلوة؟ تباتي فين؟ والبيه الي شرف هو ومراته ده؟ قومي يلا قدامي بلاش كلام فارغ..

تقوم «هبة» معها وتذهب إلى بيتها وتدخل لتبدل ملابسها وتجلس في غرفتها وهي تبكي على فراق أم «علاء» يأتي «أشرف» ويقول لها

أشرف: انتي لسه قاعدة تندي؟؟ مش خلاص ماتت واندفنت الله يرحمها بقى

هبة: انت بتكلم عنها كده ليه؟

أشرف: هي مين دي؟ انتي لسه عايشة في إنها أمك وكده؟ خلاص بقى ركزي في حياتك.. قومي إبسي حاجة عدلة واعمليلنا لقمة ناكلها! وتعالى..

هبة: ألبس وناكل؟؟ انت معندكش دم؟ أنا في إيه ولا في إيه..

أشرف: فيه إيه؟ خير؟ انتي زعلانة عليها ولا على حبيب القلب اللي جه هو والمدام؟؟ هبة: حبيب القلب مين؟ أأأأأه أنا مش حرد عليك عشان أنا مش فيقالك تصبح على خير.. وتغطي نفسها بالبطانية وتغلق نور الأباجورة على «الكومودينو» فيبدل «أشرف» ملابسه ويخرج من الحجرة ليجد أمه وأخته جالسين في «الانتربيه» يشاهدان التلفزيون يجلس معهم أشرف، فتقول أم «أشرف»..

أم «أشرف»: إيه؟ الكونتيسة زعلانة لسه؟؟

أشرف: أنا مش عايز كلام كثير..

أماني: مالك مش طايق نفسك ليه؟؟

أشرف: يبيوووووه أسيب لكوا البيت وامشي؟

أم «أشرف»: خلاص ياخويا أنا داخلة أنام اقعد لوحك بقى.

«علاء» يجلس في غرفة أمه يبكي وداعها وبجواره «أميرة» و«منال» ولكن زوجته تدخل غرفة «علاء» وتنام ولا تبالي بالحالة النفسية التي تنتاب «علاء» وأختيه يمر الليل على كل من «علاء» وأختيه و«هبة» أيضًا في بيتها طويل وفي صباح اليوم التالي تقوم «هبة» وتلبس ملابس العزاء وترغب في الذهاب لبيت «علاء» لتكلمة أيام العزاء ولكن «أشرف» يمنعها من الذهاب ويقول..

أشرف: انتي رايحة فين؟

هبة: رايحة لأبلة «منال» و«أميرة»..

أشرف: ليه خير؟

هبة: هو إيه اللي خير؟ مش الأصول أفضل معاهم ٣ أيام العزا؟

أشرف: ليه؟ من باقية عيلتك وأنا معرفش؟ خلصنا روحتي امبارح وعزيتي وصوتي وعيطتي خلصنا.. غيري هدمك واقعدي مكانك..

ويتركها ويخرج من الغرفة فتخرج هي وراءه..

هبة: إنت بتروح عندي البيت عند ماما؟  
لا يجيب «أشرف» على سؤال هبة، فتكرر..

هبة: ما ترد بتروح؟؟

أشرف: لا ليه؟؟

هبة: أصل لقيت ده هناك! والسرير كان حد نايم عليه وبقية سجايك هناك..

أشرف: انتي اتجننتي باين عليكي..

ويتركها وينزل للمعرض...

علاء يجلس في الصالة وتعد كل من «منال» و«أميرة» طعام الفطور ثم  
يجلسان سوياً مع علاء وزوجته لتقول «سلوى» زوجة «علاء»..

سلوى: أنا رايحة عند ماما!

علاء: ماما إيه دلوقتي؟ خليكي مع أخواتي.. الناس لسه حتيجي النهاردة تاني  
تعزي.. سلوى: لا أنا مليش في الجو ده!! وماما حتزعل إني جيت ومرحتلهاش..

علاء: سلووووي..

أميرة: سبها براحتها يا أبيه..

علاء: إزاي يعني؟

أميرة: عادي يا أبيه متغصبش عليها سبها براحتها..

علاء: أنا مش فايق ولا رايق ليها تعمل اللي تعمله أنا زهقت..

ويقوم من على مائدة الفطور وينتهي اليوم.. واليوم التالي له ولم تعد  
«سلوى» من عند أمها.. ولم تتصل حتى بـ «علاء» وأختيه لكي تعرف أخبارهم..

يجلس «علاء» وأختاه في البيت يرتبون أمورهم بشأن الفترة المقبلة..

أميرة: حتعمل إيه يا أبيه؟

علاء: أنا بعثلهم في الشغل يلغوا العقد ويصفوا حسابي ويحولوا الفلوس في  
البنك أنا مش حفضل متغرب كده كتير واسبكوا لوحدكوا خصوصاً بعد وفاة ماما..

منال: وحتقد فبن يا أببه هنا؟ عشان نرتلك الشقة وننصفها كويس ونلم حاجة ماما الشخصية..

علاء: والله أنا لسه حروح اقعد مع «سلوى» وأشوف هي عايزة إيه ولو ان أنا مش عايز أقعد هنا.. هنا بيتنا كلنا ومدام حرجع هنا يبقى خلي الشقة زي ما هي وندمج فيها كل جمعة نقعد مع بعض..

منال: شوف يا حبيبي ظروفك واحنا موافقين على أي حاجة..

أميرة: أببه أنا معايا شكمجية الذهب بتاعة ماما وهي كانت موصياني لو جرتها حاجة مفتحهاش إلا في وجودك حقوم أجيها..

تقوم «أميرة» وتأتي بعلبة ذهب أمها وتعطيها لأخيها فيفتحها ليجد بها مبلغًا من المال وبعض المصاغ الخاص بها وخطابًا يفتح «علاء» الخطاب ليجد أمه توصيه على أخته وتؤكد عليه بأن الشقة من حقه هو وأخته وعليه دائمًا أن يسعى لأن تكون في الشقة غرفة لأخته في حاله حدوث أي مشاكل يلجأ إليها وتوصيه بأخذ بعض المال ليساعده ذلك على عمل مشروع صغير والذهب يوزع على «منال» و«أميرة» بالتساوي ماعدا سلسلة صغيرة بها ما شاء الله أوصت بأن يعطوها لـ «هبة».. يجد أيضًا عقد إيجار الشقة والمحل الخاص بـ «هبة» وتطلب منه ألا يأخذهم منها مهما حدث إلا في حالة أن «هبة» تتنازل عنهما بإرادتها وإن تعثرت في دفع الإيجار يصبر عليها ولا يأخذ أي إجراء ضدها.. يبكي «علاء» و«أميرة» و«منال» لسماع وصية أمهم ويتعهدون بأن ينفذونها.. يعطي «علاء» السلسلة الخاصة بـ «هبة» لـ «أميرة» ويقول..

علاء: ابقني إديهاها!

أميرة: حاول يا أببه..

علاء: تحاولي ليه؟ انتوا زعلانين؟؟

أميرة: لا طبعًا بس جوزها صعب أوي ومش كويس ومنعها من كل الناس ده حتى ماما قبل ما تموت مدة راحتها هي وخالتها وامه زي ما يكون كرشهم بالذوق كده..

علاء: إزاي الكلام ده؟ واحنا حنسكت؟

أميرة: وبإيدنا إيه نعمله؟ بس للأسف بقت مراته وقاعدة في بيت جوزها ومدام ملجأتش لينا أي تدخل مننا حيبقى مش في مصلحتها والأغرب من كده بقى يا أبيه جوزها!!.. شكله على علاقة بالسكرتيرة وبجيبها في شقة «هبة» من غير هي ما تعرف.. أنا شوفتهم قبل كده وهما نزلين يتسحبوا..

علاء: إزاي الكلام ده؟ هو أهبل ولا بيت أهله ده؟ أنا لو شفته تحت حكرس رجله!!

.....

مازالت «هبة» على وضعها كلما تحاول أن تطلب من أشرف إيراد المحل يرفض ويقول: «أنا اللي بتعب فيه وأنا اللي مخلي بالي منه.. تاخدي انتي الفلوس ليه؟» فتطلب منه دفع الإيجار فيقول: «حبيبي ابعته مع ماجدة» أما «سلوى» فصممت على عدم السكن في بيت أهل «علاء» وأجبرت زوجها على السكن في شقة خارج المنطقة بجوار أمها.. يقود «علاء» سيارته متجهًا إلى بيته الجديد ليجد أم «سلوى» تقف على باب السوق فيوقف السياة وينزل ليأخذ من يدها ما اشترته من السوق ويضعه في حقيبة السيارة الخلفية ثم يأخذ أم سلوى معه في طريقه ليوصلها لبيتها ويوقف «علاء» سيارته عند باب بيت أم «سلوى» وينزل من السيارة ويخرج الأشياء التي اشترتها أم «سلوى» ثم يسلم عليها ويتركها.. «سلوى» تقف في شرفة شقتها ترى «علاء» وتراقب ما يفعله! يصعد «علاء» إلى شقته فتستقبله «سلوى» بوجه غاضب!!

علاء: مالك؟؟

سلوى: كنت بتعمل إيه عند ماما؟

علاء: ولا حاجة وأنا راجع لقتها واقفة على باب السوق ومعها شنط كتير ومش لاقية حد يقفلها وقتت ووصلتها عادي يعني.. هي زي أمي..

سلوى: وتقفها ليه؟ احنا مالنا؟

علاء: انتي بتكلمي إزاي؟ دي أمك!!

سلوى: أه عارفة إنها أمي عشان كده بقولك إنت مالك.. متعملهاش تاني  
عشان متخدش على كده..

علاء: لا دانتي مجنونه رسمي ويتركها ويدخل إلى غرفته وتمر الأيام ليأتي يوم  
يقوم فيه أبو «أشرف» من النوم وينادي على «هبة» وكل من في البيت..  
ثم يقول:

أبو «أشرف»: بصي يا بنت الحلال أنا صبرت عليكى زيادة عن ست شهور أهو  
مفيش نتيجة أنا كده عملت اللي عليا!

أشرف: فيه إيه بس يا بابا؟

أبو أشرف: فيه الموضوع اللي كلمتك فيه امبارح!

أشرف: طيب مانا كنت حقولها!

هبة: «أشرف» تقولي إيه؟

أبو أشرف: انت لسه مقولتش؟ أقولك أنا.. أنا جالي من يومين الحاج «بدوي»  
صاحب المخبز اللي في آخر الشارع حيجوا الأسبوع الجاي حيقروا فاتحة ابنهم  
«عزت» على «أماني» وحنقرا فاتحة «أشرف» على بنتهم «هيام»

هبة: «أشرف» مين؟

أبو «أشرف»: «أشرف» جوزك!

هبة: وانا إيه مش فاهمة؟

أبو «أشرف»: انتي زي مانتي قاعدة معززة مكرمة بدل ما يطلقك ويسيبك  
لا عيل ولا تيل ولا حد.. وهو بقي يتجوز ويخلف ويجبلي حفيد يشيل اسمي أه  
مش ده شرع ربنا بردو يا متعلمة؟؟

تنظر «هبة» إلى «أشرف» وتنتظر منه رد فعل ولكن «أشرف» كالعادة صامت  
ولا يناقش ويبدو كأنه موافق وعنده علم بالموضوع!!

تدخل «هبة» لغرفتها وهي تبكي.. يدخل وراءها «أشرف»

«أشرف»: انتي بتعيطي ليه بس؟؟

هبة: يعيط ليه؟ ده على أساس إني مبحسش؟؟

أشرف: يا ستي لأ.. انتي عارفة أبويا حيموت ويجوز «أماني» وداخل شراكة مع أبو العريس وبنته أكبر منك ومني كمان بسنة يعني بس «أماني» تتخطب وتتجوز وأنا حفشكل الجوازة دي متقلقيش..

هبة: مقلقش دانا حياتي كلها قلق في قلق.. لو اتكلمت قلق، لو نزلت لو طلعت حياتي كلها قلق.. إوعى تفكر إني غيرانة عليك ولا بعمل كل ده من باب الغيرة لا.. أنا محبتكش ولا عمري حبيتك ولا إنت فيك حاجة تتحب.. أنا زعلانة على كرامتي اللي اتبهذلت وانداست بالرجلين منك ومن أمك اللي جيباني خدمة وأبوك اللي بيبيع ويشترى فيا عشان موضوع سهل وبسيط وهو الخلفة!!

أشرف: أأاه وانا اللي داخل وفاكر إنك غيرانة وبتحبيني.. طيب اسمعي بقى كل العيشة اللي عايشنها دي من خير أبويا وانا محلتيش مليم.. وباخد مصروفي من أبويا يعني اللي هو عايزه حيتعمل.. أنا مش حمل يكرشني..

هبة: أنا عايزة مفتاح الشقة اللي معاك ومتعديش على ماجدة تاخذ الإيراد أنا حكلمها وابقى أخليها تعدي هنا تجيب الإيراد..

أشرف: ده من إيه إن شاء الله؟ إيه الشجاعة دي؟؟

هبة تصمت ولا ترد.

.....

«علاء» في بيته الجديد يجلس على السفرة يتحدث مع زوجته «سلوى»

سلوى: إنت نويت تعمل إيه؟؟

علاء: خلاص أنا جمعت الفلوس واتفقنا أنا وشريكي في الموضوع الجديد.. إننا الأسبوع الجاي حنفتح المحل وحنستورد قطع غيار سيارات من برة والمبلغ اللي حنبدأ بيه كبير.. تحويشة العمر بقى وهو حيسافر كمان كام يوم يجيب البضاعة وييجي..

سلوى: طيب...

تمر الأيام وفي يوم تشعر «هبة» بإعياء شديد وصداق و«زغللة» وهذا الأمر يتكرر كثيرًا في الفترة الأخيرة.. تريد «هبة» أن تذهب للدكتور ولكن لا تريد أن تأخذ أحدًا معها حرصًا منها وخوفًا من أن تكون حاملًا وهي لا تريد هذا الحمل... يأتي يوم وجود ضيوف عندهم وهم أهل خطيب «أماني» أخت «أشرف» وأيضا خطيبة «أشرف» المنتظرة

وأمهما وأبوهما ترفض «هبة» أن تخرج لهم ولا تهتم بالأمر.. يجلسون جميعًا في غرفة «الصالون» الموازية لباب الشقة وغير كاشفة لباقي أجزاء البيت من الداخل.. تستغل «هبة» انشغال الجميع وتتصل بـ «أميرة» في «التليفون» لتقول..  
هبة: ألو؟ أيوه يا أبله أنا «هبة»..

أميرة: أهلاً يا «هبة» إزيك فينك؟؟

هبة: مش وقته.. أنا بكلمك من وراهم كلهم.. أنا عايزة أشوفك ضروري!

أميرة: طيب فين؟ وامتى؟

هبة: بصي النهاردة الخميس.. يوم السبت حقابلك في مستشفى الفؤاد عند عيادة الباطنة..

أميرة: مالك؟؟

هبة: لما أشوفك حقولك ع الساعة ١٠ كده ومتقوليش لحد خالص إني حقابلك..

أميرة: طيب حستناكي...

يأتي يوم الجمعة و«هبة» مازالت تحبس نفسها في غرفة نومها ولا تريد التحدث مع أحد ولا تريد أن ترى وجه أحد وهم أيضًا مشغولون بخطوبة كل من «أماني» و«أشرف» وبدأوا في تجهيز الشقة الكائنة في الدور الثاني لكي يتزوج فيها «أشرف»..

يدخل «أشرف» على «هبة» ليجدها في سريرها تشاهد «التلفزيون» ولا تبالي بمجيئه فيبدل ملابسه ثم يخرج من دولابه ورقة بها سجاثره ومخدراته التي يتعاطاها فتقول له «هبة»

هبة: أنا بكرة حنزل أزور ماما!

أشرف: تزوريها فين؟

هبة: في الترب أنا من يوم ما ماتت وأنا مروحتلهاش أنا أعصاي تعبانة ومحتاجة أزورها..

أشرف: لا مفيش خروج لوحك اصبري لما امي تفضى وتروح معاي.

هبة: حرام عليك!! حتى زيارة امي لا وأمك كمان مش حترضي تيجي ومشغولة بشقتك اللي فلوسها ظهرت دلوقتي!! يعني أنا أتجوز مع امك هنا والعروسة الجديدة تدخل على فرش جديد وشقة جديدة مش كده؟؟ طيب حاخذ ماجدة معايا..

يشرد «أشرف» لثوانٍ ويتذكر ماجدة ويقول بداخله «أه خليها تروح فرصة أقابل ماجدة» ثم ينظر لـ «هبة» ويقول:

أشرف: يوووه أنا مش فايق وعايذ اشرب السجارة مزاج.. اعملي اللي عايزاه هما ساعتين لو اتاخرتي حتعرفي شغلك! وعشان تعرفي إني بحبك روعي لوحك! هبة: ماشي!!

ينام «أشرف» كعادته لا يدري بما يحدث حوله من كثرة المخدرات التي يتعاطاها قبل النوم.. تقوم «هبة» من فراشها الساعة ٩ صباحًا وتبدل ملابسها بكل هدوء حتى لا تزعجه وتخرج من الغرفة على أطراف أناملها حتى لا يستيقظ من في البيت فالجميع نائم وهم لا يستيقظون قبل الساعة ١٢ ظهرًا ثم أنها فتحت باب الشقة بهدوء وخرجت لتذهب إلى المستشفى وتحجز كشفًا باطنيًا وتنتظر دورها وتكون «أميرة» في نفس الوقت قد وصلت فتدخل معها.. تحكي «هبة» للدكتور شكوتها...

الدكتور: انتي بتدخني أو بتتعاطي حاجة؟؟

هبة: لا؟؟

الدكتور: طيب حنعمل «السونار» ده ع المعدة ونعمل التحاليل دي وترجعني تاني في خلال ساعة..

هبة تنظر لـ «أميرة» وتقول حاضر.. وتخرج من غرفة الكشف وتقول لـ «أميرة»: أنا مش حقدر أعمل كل ده أنا مش معايا فلوس تكمل.. أنا واخدة من جيبه ١٠٠ جنيه بالعافية..

أميرة: إخص عليكي هو في فرق بينا؟ تعالي نعمل التحاليل والأشعة وبيقوا دين عليكي يا ستي وكمان نقعد مع بعض شوية تحكيالي مالك؟ ومختفيه فين اليومين دول؟

تبدأ «هبة» في تحاليلها وتنتظر النتيجة وتجلس مع «أميرة» تحكي لها ما حدث في الفترة الأخيرة.. تقول «أميرة»:

أميرة: أنا عايزة أقولك على حاجة!

هبة: قولي!

أميرة: متأمنيش لماجدة ومتحكيهاش على أي حاجة!

هبة: ليه؟! دانا كنت حجيها معايا النهاردة لو مكانش رضي ينزلني لوحدي!!

أميرة: إوعي!

هبة: ليه طيب؟

أميرة: حقولك بس اتصرف في بعقل..

هبة: قولي قلقيتيني!!

أميرة: تحكي لها ما رأته من فترة وعلى علاقة أشرف بـ «ماجدة» الغير شرعية..

هبة: أتاري الهانم كل حاجة تقولي «أشرف» «أشرف».. يبقى قميص نومي

الي لقيته عند أمي كان هو الي واخده أو هي واخده زيه من تحت يبقى

هما الي كانوا هناك!! كده فهمت... ينقطع حديثهم عندما تسمع «هبة» اسمها من ناحية معمل التحاليل تقف «هبة» و«أميرة» لياخذا التحليل وكشف السونار ثم يستأذنا للدخول مرة أخرى للدكتور تعطي «هبة» النتيجة للدكتور.. يمسه الدكتور النتيجة ويقراها ووجهه غير سعيد!!!

أميرة: خير يا دكتور؟

الدكتور: انتي تقربيلها إيه؟؟

أميرة: أختها الكبيرة!

الدكتور: قوليلي يا «هبة» انتي متجوزة صح؟؟

هبة: أه!

الدكتور: جوزك بيتعاطى حاجة؟

هبة: إيه؟؟

الدكتور: مانتي لازم تقولي عشان أنا المفروض دلوقتي أعملك محضر تعاطي!!

«هبة» و«أميرة»: تعاطي إيه؟؟!!

الدكتور: السونار بيبين إن فيه التهاب شديد في المعدة والتحليل بتقول إن انتي بتتعاطي مخدر «الحشيش» وكمان نسبة من حبوب «الترامادول» فخليكي صريحة معايا!

هبة: يا نهار أسود!!

أميرة: بصراحة أيوة يا دكتور جوزها مدمن «ترامادول» وبيشرب «حشيش» يوميًا!

الدكتور: ده كده بيقى مجرم ممكن يموتك لو الجرعة زادت.. حاولي تاخدي

بالك منه وماتاخدش من إيده حاجة!!

هبة: حاضر!!

الدكتور: وتاخدي الدوا ده بانتظام وأكلك مسلوق لمدة أسبوع وأشوفك بعد

١٠ أيام..

تطلب هبة من الدكتور تقريراً كاملاً بحالتها وتأخذه معها وترفق به التحاليل  
والسونار وتطلب من أميرة أن تحتفظ بيه معها لحين استخدامه...

.....

يقف «علاء» في شرفه منزل والدته ينتظر «أميرة» فهو على علم بمقابلتها لـ  
«هبة»، يلاحظ قدوم «أشرف» من بعيد فيحاول أن يختبئ دون أن يراه «أشرف»..  
يتوجه «أشرف» إلى المحل عند «هبة».. يراقب «علاء» كل شيء من أعلى ليرى ما  
يحدث فيجد «ماجدة» تدخل العمارة بمفردها فيذهب إلى باب شقة «هبة»  
ويقف على السلم دون أن يراه أحد فيجد «ماجدة» تدخل شقة «هبة» وتقف  
الباب فيتجه مرة أخرى إلى الشرفة ليجد «أشرف» يقف على باب المنزل وينظر  
هنا وهناك ليتأكد أن أحداً لا يراه.. ثم يصعد إلى شقة «هبة» وراء «ماجدة».. هنا  
يدخل «علاء» شقته وهو يشتعل غيظاً ويقف لثوانٍ يفكر...

ماذا يفعل؟، تظهر على «علاء» علامات التوتر وشرع يتحرك في شقته ذهاباً  
وإياباً وهو يتذكر أن أم «هبة» كانت دائماً تترك نسخة من مفتاح الشقة عند  
والدته فيدخل إلى غرفة والدته مسرعاً ويفتح دولابها ويبحث في علبة المفاتيح  
الخاصة بالعمارة بأكملها ليجد مفتاحاً بمفرده ملصق عليه ورقة مكتوب بها  
(بسمه) يتأكد أن هذا هو المفتاح فيأخذه وينزل إلى شقة «هبة» ويفتح بهدوء  
الشقة ويدخل إلى غرفة نوم «هبة» الذي يصدر منه صوتهم فيجد «ماجدة»  
و«أشرف» في وضع مخلٍ جداً!!!

علاء: يا حقيير يا واطي! إنت بتعمل إيه هنا!!

يقوم «أشرف» من مكانه مفزوعاً ويرتدي سرواله ويقول بكل جرأة!!

أشرف: إيه؟ خير؟ إنت اللي بتعمل إيه هنا؟ ودخلت هنا إزاي؟ دي شقة مراقي

اطلع برة!!

علاء: أطلع برة؟؟ يا بجاحتك يا أخي!! البيت ده كله بيتي ومراتك دي

ملهاش حاجة هنا!!

كانت شقة أمها وأنا خلاص خدتها والمحل م الصبح حفزيه وارمي اللي فيه  
في الشارع ومشوفش وش حد فيكوا هنا.. إنت فاهم؟؟ يقف «أشرف» أمام «علاء»  
ويتشاجرا بالأيدي و«ماجدة» تقف ترتدي ثيابها ويبدو على وجهها الخوف وهي  
تحاول أن تهرب ولكن لا تستطيع «علاء» يصفح «أشرف» ويمسكه من ملابسه  
ويزج به خارج الشقة ويمسك بيد «ماجدة» وينزل بها وراءه ويسحبها من يدها في  
الشارع متوجهًا لبيت أبو «أشرف» يجد أبو «أشرف» واقفًا على باب معرضه يقف  
«علاء» ويتحدث بصوت عالٍ ويحكي لأبي «أشرف» ما حدث فيقول أبو «أشرف»..  
أبو «أشرف»: وانت جاي بقى تعلمنا الأدب؟؟ ابني راجل ويعمل اللي يعمله..  
في هذه اللحظة يقف «تاكسي» أمام المعرض وتنزل منه «هبة» لتجد «ماجدة»  
و«علاء» و«أشرف» في نقاش حاد فتقول:

هبة: فيه إيه؟؟

علاء: فيه إن انتي سايبية الشقة لجوزك وهو عاملها ملهى للقائاته!!

هبة: إزاي يعني؟؟!

«أشرف» يدفع بـ «هبة» لخارج المعرض قائلاً لها: امشي اطلعي على فوق  
انتى حتقفي تحكي معاه؟؟  
علاء: متمدش إيدك عليها وأنا واقف..

«أشرف»: نعم خير؟ وانت مالك راجل ومراته اطلع برة!!

علاء: حطلع.. بس اللي حصل ده لو اكرر تاني حكر رجلك إنت فاهم؟؟

يمسك «أشرف» يد «هبة» ويدفع بها خارج المعرض..

تسحب «هبة» يدها منه بقوه وتقول: أبيه «علاء» اكسر الشقة والمحل وغير  
الكوالين وخذ حاجتك وامنع الوساخة من بيتك.

هنا يصفح «أشرف» «هبة» على وجهها قائلاً لها: وانتى مال أمك بتتصرفي  
من دماغك ليه؟؟

هبة: فعلاً هو مال أمي وأنا حرة فيه.. أنا متنازله عن شقتي ومحلي أنا حرة..  
وتنظر لـ «علاء» وتقول: خد حاجتك يا أبيه وكتر خيرك لحد كده!  
أبو «أشرف»: خلااااص فضناها.. قالتلك خد حاجتك يا سيدي اطلع برة.. يلا  
من هنا..

ينظر «علاء» لهم جميعاً ويخرج من المعرض ويذهب إلى بيته لينفذ كلام  
«هبة»...

يأخذ «أشرف» «هبة» بالقوة وهو يضربها عدة ضربات فتحاول «هبة» أن  
تتخلص من ضربه وتبعد نفسها عنه، وتسبقه إلى البيت.. يدخل وراءها «أشرف»  
وأبوه و«ماجدة»...

أشرف: أنا حوريكي انتي بتتصرفي من دماغك!!

أبو أشرف: خلاص اخرس بقى هي حرة في حاجتها يا سيدي مش أحسن من  
وساختك اللي سمعت الشارع!

أم أشرف: فيه إيه؟

أبو أشرف: ابنك عاملي فيها «دونجوان» وبيقابل الهانم (ويشير على ماجدة)  
في شقة الزفتة مراته وصاحب البيت شافهم وجابهم لعندي بفضيحة..

أم أشرف: فضيحة ليه إن شاء الله؟ هي كانت ضربته على إيده؟

أبو أشرف: انتي في بينك وبينه حاجة؟

«ماجدة» تبكي: أنا اتفضحت وابنك السبب هو واعدني بالجواز ومفهمني إن «هبة»  
مبتخلفش ونفسه يخلف ومستني لما يبقي مفيش أمل في علاجها ويطلقها وتنجوز..  
تنظر «هبة» لها وتبصق في وجهها وتتركها وتدخل غرفتها يدخل «أشرف»  
ورائها ليستكمل عراكه معها..

أم أشرف تقول لماجدة: امشي انتي دلوقتي وأنا حكلمك بعدين..

أبو أشرف: عاجبك الفضايح دي ياست هانم وتربية ابننا اللي فضحنا؟!!

أم أشرف: فضحنا ليه؟ ابني راجل يعمل اللي يعجبه وكله من مرات ابنك  
البومة اللي مبوزة في وشه ليل نهار يعمل إيه يعني؟ شاب وعنده رغبات وخلص  
اهي مشيت والمحل اتاخذ والشقة.. يلا بقى شطب له شقته خليه يتجوز..

.....

يذهب «علاء» إلى البيت، يغلق المحل ويغير مفتاحه ويغير مفتاح شقة  
«هبة» ويترك محتويات كل منهما كما هي فهو يحمي منزله من «أشرف» فقط  
وليس في نيته أن يأخذهم من «هبة» ويذهب إلى بيته ليحكي لـ «سلوى» ما  
حدث فتضحك «سلوى» على شكل «علاء»..

علاء: أنا نفسي افهم بتضحكي علي إيه؟!

سلوى: أصل متخيلة شكلك وانت متضايق وان في حد قدر يضايقك لدرجة  
إنك تضربه..

علاء: انتي فرحانة فيا؟

سلوى: هههههه أه بصراحة..

وقبل أن يستكمل «علاء» كلامه سمع صوت الهاتف الخاص به يرن ففي  
هذا الوقت كان «الموبايل» قد بدأ في الظهور وهو قد ابتاع واحداً من الخليج..  
يجيب على الهاتف ليرد من على الهاتف..

ألووو أستاذ علاء؟

علاء: أيوة مين؟

أنا محمد من البنك..

علاء: خير؟

موظف البنك: والله يا فندم المفروض إنك عامل عقد شركة مع أحمد السيد صح؟

علاء: فعلاً!

موظف البنك: للأسف مش حنقدر نوافق على القرض بضمان الشركة..

علاء: ليه؟

موظف البنك: الأستاذ «أحمد» سحب كل الرصيد الموجود في الشركة ده بيخلينا  
نوقف أي تعامل مع البنك

علاء: إزاي الكلام ده؟ الفلوس دي المفروض مش حتسحب إلا لما توافقوا على  
القرض عشان يسافر يجيب بضاعة!!

موظف البنك: والله يا فندم ده اللي حصل.. ويخلق الخط!!

يخلق «علاء» الخط ويضع التليفون في جيبه ويقول

علاء: ينهار اسود!

سلوى: خير؟ في إيه؟

علاء: «أحمد السيد» خد كل الفلوس اللي لناها للمشروع من البنك ومبيردش

ع «التليفون»!!

ويتذكر علاء «التليفون» فيمسك بـ «تليفونه» ويتصل بـ «أحمد» ولكنه يجد  
الخط مغلقاً فيتصل به على البيت ولكنه لم يجب فيسرع «علاء» في تغيير ملبسه  
وينزل مسرعاً إلى بيت «أحمد» ليسأل عليه حارس العمارة..

حارس العمارة: النهاردة الصبح حضر شنطته وجالي أنا مسافر وخلي بالك من  
الشجة! علاء: مقلكش مسافر فين؟

الحارس: لا والله يا بيه معرفش..

علاء: طيب شكراً

يسأل «علاء» على «أحمد» في كل مكان ولكنه لم يجده فرجع إلى البيت ليجد  
«سلوى» مستغرقة في النوم.. تشعر به فتقوم من نومها قائلة:

سلوى: عملت إيه؟

علاء: ولا حاجة لفيت عليه الدنيا ملقتوش والبواب عنده قالي إنه سافر بس

ميعرفش سافر فين!!

سلوى: وحتعمل إيه؟

علاء: مش عارف أنا لسه مش عارف..

سلوى: يعني كده خلاص؟ لو «أحمد» ده مظهرش يبقى أفلست وضاع اللي وراك واللي قدامك؟؟

علاء: يووووه وده وقته ويتركها ويذهب إلى غرفة النوم الأخرى يأتي الصباح على «علاء».. يقوم من السرير في الساعة ٧ صباحًا ويمسك بهاتف المنزل ويتصل بأخته «منال» قبل أن تذهب إلى عملها..

علاء: صباح الخير يا «منال»

منال: صباح الخير يا أبيه

علاء: الأستاذ أيمن جوزك صاحي؟

منال: أه طبعًا صاحي أهو ويبفطر عشان ينزل عنده محكمة..

علاء: طيب ناديه..

منال: حاضر.. في حاجة؟ طمني

علاء: ناديه بس وبعد ما اخلص كلام معاه حكيك..

أيمن: صباح الخير.. علاء باشا

علاء: أستاذ «أيمن» أنا في مصيبة وبها إنك المحامي شوفلي حل

أيمن: مصيبة إيه كفي الله الشر؟

علاء يحكي له ما حدث...

أيمن: للأسف الراجل ده لو توقعه معتمد في البنك ومعاه تفويض منك بإيداع وسحب الفلوس يبقى قانونًا إنت ملكش حاجة عنده حتى لو في عقد شراكة..

علاء: يعني كده ضاعت فلوسي؟

أيمن: أنت دورت عليه؟

علاء: قلبت عليه الدنيا وقافل تليفونه وسألت البواب قالي سافر..

أيمن: طيب سيب لي النهاردة.. عندي ظابط صاحبي كده حاول أخليه  
بمعارفه يعرفلنا سافر فين

علاء: ماشي اديني «منال» وشكرا لتعبك يا «أيمن» حسنتى ردك

منال: خير يا أبيه علاء فيقص عليها «علاء» ما حدث له..

منال: معلش يا أبيه متضايقش نفسك صحتك بالدنيا ولو عايز فلوسي ودهبي  
تبدأ بيهم من جديد ولا يهملك و«أميرة» كمان من غير ما اسألها حتقول كده..

علاء: لا ربنا يخليكي يا حبيبتى هو بس احتمال اتفق مع «سلوى» وأجى  
أقعد في شقة ماما وأبيع دي وأهو أجمع منها قرشين على تمن العربية وربنا  
يسهل..

منال: اللي انت شايفه اعمله.. ويغلق الخط مع «منال»

تقف «سلوى» بجوار الباب وتسمع ماذا يقول «علاء» وتضرب على ناحية  
وجهها الأيمن بيدها عدة ضربات بسيطة وتحرك فمها يمينا ويسارا وكانت حريصة  
أن لا يراها «علاء» يمر الوقت لـ ١٢ ظهرًا ينزل «علاء» إلى الشارع باحثًا عن  
«أحمد» مرة أخرى دون جدوى.

ينتهي اليوم وتأتي الساعة ١٠ مساء يطرق باب بيت «أشرف» وتفتح أمه لتجد  
«ماجدة»..

أم أشرف: إيه اللي جابك؟

ماجدة: أشرف فين؟

أم أشرف: خير؟ في إيه؟ «أشرف» راح مع أبوه مشوار عند خطيبته..

ماجدة: خطيبته؟؟؟؟ خطيبته مين؟

أم أشرف: نعم؟ وانتي جاية تحاسبينا؟ خطيبته اللي خطبها من أسبوعين..

ماجدة: وأنا إيه؟

تخرج «هبة» من غرفتها على الصوت لتجد «ماجدة» تجلس «هبة» في صمت

وترى «ماجدة» وهي ذليلة لأم أشرف..

ماجدة: أنا عايزاه ضروري..

أم أشرف: لو بترسمي إنه يتجوزك انسي.. هو متجوز حبيبة القلب اللي مفيش منها رجي وخاطب بنت المعلم «بدوي» بتاع المخبز الآي وحيتهجوزوا قريب..  
اتفضلي بقى اتكلي على الله من هنا قبل ما يجي يسود عيشتك..

ماجدة: لا يسود عيشة مين؟ لا مش كل الطير اللي يتاكل لحمه.. أنا قاعدة هنا ومش ماشية إلا أما البيه اللي خاطب وبيتسرح مع خطيبته يجي..

أم أشرف: لو ممشتيش حطبل لك البوليس..

ماجدة: كده؟ طيب أنا قاعدة أهو واطلبلي البوليس وريني..

يصعد «أشرف» وأبوه على صوت الشجار بعد عودتهم من الخارج..

أشرف: إيه صوتكوا جاي لآخر الشارع ليه؟ إيه ده؟ ماجدة؟ إيه اللي جابك

هنا؟

ماجدة: رجليا يا اخويا اللي جابتنني عشان أشوفك مع المحروسة..

أبو أشرف: اطلعي برة يا بت انتي احسنلك يلا.. أنا ابني خطب وهيتجوز قريب مش فاضي لأشكالك..

ماجدة: أشكالي طيب يكون في علمكوا أنا لو نزلت من هنا حطلع ع القسم عدل وحعمل في ابنك بلاغ وحجرجره في المحاكم..

أشرف: ليه؟ كنتي على زمتي وأنا معرفش؟

ماجدة: أه إنت فعلاً متعرفش.. متعرفش إني حامل منك في شهرين؟!؟

وينزل الخبر على الجميع كالصاعقة ويجلس كلّ منهم في مكانه إلا «هبة» تقف من هول الموقف!!

أبو أشرف: يادي المصيبة!! حامل؟؟ طيب حعمل إيه أنا دلوقتي؟

أشرف: يا بابا متصدقهاش دي كدابة ويمسك بيدها بقوة ويدفعها ذهاباً وإياباً..



حتقع زي مانا وقعت

وخرجت من الغرفة فلم تجد أحدًا بالمنزل لتمسك بسماعة «التليفون»..

هبة: ألو مساء الخير ممكن أكلم الأنتسة «سماح»..

سماح: أنا «سماح» مين معايا؟

هبة: أنا «هبة» زوجة «أشرف» خطيبك..

تصمت «سماح» لثواني وتقول:

سماح: خير فيه حاجة؟

هبة: أنا عارفة إنك مستغربة المكالمة لكن أنا حقولك اللي عندي عشان

ابقى رضيت ضميري وليكي حرية الاختيار

تروي «هبة» لـ «سماح» كل شيء عن «أشرف» وعائلته وعن «ماجدة» وموضوع

زواجها اليوم الساعة ٩ مساءً..

سماح: ياااه كل ده وانا نائمة على وداني والبيه ضاحك عليا هو وامه وابوه

ومفهمنا إنهم أحسن ناس في الدنيا وإنك مريضة مرض وحش يمنعك من الخلفة

نهائي وموافقة ع الجواز.. أتاريهم طمعانين فينا!! عامة أنا بشكرك على كل اللي

قولتيه وإنك نورتييني وفتحتي عنيا وانا حتصرف..

يمر الوقت وتأتي الساعة ٩ مساءً تأتي «ماجدة» وأمها ومعها حقيبة ملابسها ويأتي

المأذون ويبدأ المأذون في إجراءات كتب الكتاب.. تخرج «هبة» من غرفتها وتقول:

مش المفروض يا عم الشيخ الدين بيقول إني لازم أوافق ع الجوزة الثانية دي؟؟

الشيخ ينظر باستغراب..

المأذون: انتي مين؟

يقف أشرف وأبوه وأمهم في خوف مما تقوله «هبة»..

يقول «أشرف» بصوت عالٍ..

أشرف: هبة.. ادخلي جوة دلوقتي..

هبة: أدخل فين؟ أنا مش حدخل أنا حخرج من هنا وحخرج نهاي!!

المأذون: خير بس يا جماعة؟ براحة افهم!

هبة: أنا أفهمك البيه بيتجوز عليا وأنا مش موافقة وعايزة أطلق..

أبو أشرف: انتي باين عليكي اتجننتي. ويصفعها على وجهها وقبل أن يستكمل ضربه لـ «هبة» يسمع صوت طرقات الباب فتفتح أم «أشرف» لتجد «سماح» وأباها وأخاها..

تقول سماح: اتجننت ليه يا حج؟ عشان بتطالب بحقوقها؟!

أبو أشرف: اتفضلوا بس.. اتفضل يا حج بدوي أنا حشرحك..

الحاج بدوي: ولا تشرحلي ولا اشرك هبة كتر خيرها كلمت بنتي وفهمتها كل حاجة وصحيح ابنك ميناسبهوش إلا واحدة زي ماجدة هي اللي تنفع مع لعبكوا وأكاذيبكوا وخداعكوا واعتبر من دلوقتي الشراكة منتهية وشبكتكوا وهدياك اللي جبتها لبنتي أهى وإذا كان ع الشبكة والهديا اللي ابني جبتها لبنتك خليها لكوا اشبعوا بيها والله الغني عن الجوازة دي ماشوفش وشك عندي تاني ومفيش سلامو عليكوا.. يلا يا ولاد!.. تربت «سماح» على كتف «هبة» وتقول لها

سماح: ربنا معاكي!!

يقول «أشرف» لـ «هبة» وهو منفعل ويضربها عدة ضربات في أنحاء متفرقة

من جسدها

أشرف: يا بنت الكلب فضحتينا يا بنت الكلب.. دانا حموتك «هبة» تبعد نفسها عنه وتقول انت لسه شوفت فضيحة وتخرج من جيبتها صورة من تحاليل طبية والتقرير الطبي الخاص بها وتزج به في وجه «أشرف» وأبيه.. يقف الشيخ المأذون ويقول: المأذون: استهدوا بالله يا جماعه بس..

يمسك أشرف بالورق..

هبة: الفضيحة اللي بجد لما أقدم أصل الورق ده للنيابة وأقولهم إنك كنت عايز تموتني.. ابنك يا حج يا اللي عامل فيها حامي الحما ونفسك في حفيد..

ابنك يا طنط يالبي عاملة نفسك محدش خلف خلفتك.. بيشر بمخدرات (ترامادول) وحشيش ومش بس كده لاده كان بيحطهومي في الشاي والعصير وأنا كشفت وعملت تقرير طبي والصبح لو مطلقتش ومشيت من هنا في ناس برة حتقدم الطلب للنياابة..

أم أشرف: يا لهوي نياابة؟.. المأذون يقف في مكانه ويقول أعوذ بالله من غضب الله أعوذ بالله من دي جوازة ويتركهم ويخرج..

يقول أبو أشرف: انت مستني إيه؟؟ مستني بنت الكلب دي لما تحبسك؟؟ يلا طلقها وارميها في الشارع للكلاب..

وتقول أم «أشرف»: ارمي عليها اليمين يا بني ونزلها بهدومها اللي عليها خسارة فيها جنيه.. ادخلي يا أماني بسرعة اقلي باب الأوضة لتأخذ ذهب ولا فلوس..

يقول أشرف: انتي طالق طالق يابنت الكلب ويمسك بيدها ويفتح باب الشقة ويزج بها على السلم بدفعة قوية مما يجعل «هبة» تقع وتتدحرج على السلم..

يقول «أشرف»: امشي بره متورنيش وشك تاني وملكيش عندي ولا مليم والصبح ورقتك حتوصلك.. تحاول «هبة» أن تلملم ما تبقي فيها من عافية بعد معافرة

ومعانة هذا اليوم فالوقت اقترب على ١٢ مساء.. تخرج من باب البيت المشئوم تقف «هبة» على قدميها أمام البيت وتنظر له وتبكي بكاء بصوت ضحكات

فرحًا على حريتها التي حصلت عليها بعد عناء وتتجه إلى بيتها القديم تدخل من بابه وتصعد سلالمه سلمة سلمة ببطء وكأنها ترحب بكل سلمة وجدار وبلاطة في

هذا البيت فهي لا تستطيع تصديق أنها عادت له مرة أخرى تمر من على باب شقتها هي وأمها وتقف على الباب لتتذكر أن ليس معها مفتاح وأن «علاء» غير

مفتاح الشقة تتحسس الباب وتبكي بحرقة وتحتضن الباب في حزن وتتذكر أمها وأم «علاء» تصعد إلى شقة أم «علاء» لتجد الباب مغلقًا والشقة مظلمة والتراب

في كل مكان على السلم.. تمر من أمام شقة أم «علاء» وهي تنظر إليها وتسترجع ذكرياتها أمام عينيها في عيد ميلادها الخامس عندما صعدت إلى «علاء» وقبلته

من خده وتركت مكان القبلة روج أحمر مما أثار غضب «علاء».. تتذكر وتبكي

وتضحك في نفس الوقت تصعد إلى السطوح تقف أمام غية الحمام الخاص بها تجدها مهشمة بعض الشيء والحمام هجرها كأنه رحل مع رحيل «هبة»..

تنظر إلى غرفة ذكرياتها الصغيرة وتحاول أن تفتح الباب.. يُفتح الباب معها فتدخل وتحاول أن تضيء الأنوار ولكن الأنوار أتلقت من كثرة التراب والرطوبة وعدم الاستعمال فكل شيء في البيت حزين على رحيل أصحابه فأصبح البيت مهجورًا، تفتح الباب على مصراعيه فيتخلل الغرفة ضوء خفيف من الباب والشباك وهو ضوء أنوار لافتات الإعلانات بالشارع تجلس «هبة» على المكتب لتجد كراسة مذكراتها على المكتب كما هي و«الووكمن» الخاص بها والتسجيل الذي أهداه لها «علاء» من زمن بعيد وشرائط «هاني شاكر» التي كانت تعشقها تتحسس «هبة» كل هذه الأشياء وتحاول أن تزيل التراب من عليهم وتذهب إلى ركن الغرفة الذي يوجد به الأدوات الرياضية الخاصة بـ «علاء» وتجد «ترينج» رياضي معلق على شماعة فتأخذه في حضنها فرغم مرور الزمن والوقت ولكن ما زالت رائحة «علاء» متعلقة به.. تظل «هبة» في الغرفة تبكي وتتحسر على أيام عمرها الضائعة..

.....

يدخل «علاء» البيت عند «سلوى» في وقت متأخر.. يدخل بهدوء ظنًا منه أن «سلوى» نائمة كعادتها فهو لا يريد أن يوقظها لكي لا يدخل في جدال ونقاش بينظفي لا جدوى منه ولكن هذه المرة يسمع صوتها تتحدث في هاتف المنزل.. يقترب من مكان تواجدها بهدوء ويسمع حديثها..

سلوى: يا ماما انتي لو سمعتي قال إيه لاخته حتتخذي زي كده.. ده بيقولها إنه خلاص محلطوش إلا العربية وبيت أمه ده القديم اللي عايزني أنا أروح أقعد فيه عشان قال ايه يبيع الشقة دي وياخد فلوسها يبدأ بيها من الأول ويضيعها هي كمان.. أنا أول ما سمعته بيقول كده استنيتة لما خرج وعبيت كل ذهبي وألماطاتي وفلوسي وحاجاتي الثمينة وساعاتي وحطبتها في الشنطة اللي جبتها لك.. أه أحسن يقولي هاتيهم ولا حاجة.. تصمت «سلوى» لتستمع لحديث أمها ثم ترد:

سلوى: لا دا بيحلم إني أساعده.. وكمان لو صمم على كده إنه بيع الشقة دي مش بيع بيت أمه حرفع عليه قضية طلاق لضرر أنا مش حقد أنزل ولا اتخلي عن المستوي اللي عايشة فيه ده وأبدأ معاه من الأول نو واي ينسى.. ماشي يا ماما لو في جديد حبلغك سلام يا حبييتي..

وتغلق الخط وهنا يفتح «علاء» باب الغرفة لتجد سلوى «علاء» أمامها فجأة..

علاء: يااه كل ده حقد وكره شيلاه جواكي?!!

سلوى: لو سمحت احفظ أدبك انت عايزني أرجع معاك من الصفر؟ أقول للناس إيه؟ أقول لصحباتي وجيراني وأهلي إيه؟ دانا كنت بتباهى بيك وبعربيتك ومستواك أنا مقدرش أشوف شماتة الناس فيا..

علاء: ماشي وأنا حريحك من كل ده من غير ما تطلبي ترفعي قضية طلاق ولا حاجة انتي طالق طالق يا سلوى وساييلك الشقة والعفش ودهبك اللي أنا طفحان الدم عشان أجهولك ونزلتي جري تهريه من البيت مع إني لا فكرت ولا كان في نيتي إني أخده منك بس هي كده خلصت.. ولاد الأصول بيانوا في المواقف.. ويتركها وينزل من البيت خالي الوفاض لا يحمل حتى شنطة بها ملابس أو أشياء خاصة به وكأنه يترك أي شيء يذكره بأمامه مع «سلوى» يتجه إلى بيت أمه يصعد السلم في هدوء شديد ويمر من أمام شقة «هبة» ليقف أمامها قليلاً يتذكر يوم ولادة «هبة» وهو واقف على الباب منتظر خبر الولادة عندما كان صغيراً في السن ويتذكر أمه وهي تحمل «هبة» في (سبوعها) وتضعها في يد «علاء» يتذكر أيامه في هذا البيت ويتحسس باب شقة هبة بهدوء دون أن يحدث صوتاً.. حزياً على ما وصل إليه.. يصعد السلم ليصل إلى شقة أمه يقف أمامها ويخرج المفتاح من جيبه ولكنه لا يستطيع فتح الباب.. يقف ويسند رأسه عليه قليلاً متحسراً على عدم وجود أمه معه في مثل هذه الظروف ويستكمل طريقه متجهاً إلى سطح البيت.. يصعد ويجد غية الحمام مهجورة ومهشمة... يتجه إلى سور السطوح ويتذكر حديثه مع «هبة» وهي تقول له أنها تحبه ومستعدة أن تواجه

بحبها العالم ويتذكر أيضاً أم «هبة» وهي تحكي معه على أن يترك «هبة» ويسافر لبعيد.

«هبة» مازالت في الغرفة الصغيرة ولكن غلبها النوم وهي تجلس على كرسي المكتب وتضع رأسها عليه..

يلفت انتباهها أن هناك قدم تمشي على السطح من الخارج فتقوم مفزوعة دون شعور يضغط إصبعها على شريط الكاسيت ولكن الكاسيت لم يصدر صوتاً لثوانٍ تتجه «هبة» إلى الباب لكي ترى من بالخارج ويتجه «علاء» إلى الغرفة لكي يرى من بالداخل يسمع كل منهما كلمات الأغنية التي بدأت ويقف كل منهما أمام الآخر ينظر في عينيه ويبيكي دون حركة.. كانت كلمات الاغنية تقول:

(معقول نتقابل تاني؟

معقول مانتش نسياني؟

معقول معقول معقول؟

بعد مادابت أحلامي بعد ما شابت أيامي؟

ألفاكي هنا قدامي

ده كثير أوي كثير أوي كثير أوي يا زماي كثير أوي يا زماي...

أرجوكي أرجوكي استني عليا أرجوكي

متبوصيش كده في عنيا أنا قلبي ميستحملش قابليني شوية شوية..

لا عملت حساب الصدفة

ولا قد عذاب اللفهة شيفاكي عنيا.. لتكوني خيال وأماني)

مازال كل من «هبة» و«علاء» يقف أمام بعضهما البعض لا يستوعبان بأن القدر جمعهما مرة أخرى.. تجري «هبة» على سور السطوح وتبكي حزناً على أيامها الفاتية وفرحاً بلقاء «علاء» يذهب «علاء» إليها ويقف بجوارها ينظران إلى الأمام فقد بدأت أشعة الشمس في الظهور وبدأ ميلاد فجر جديد..

ومازلت الأغنية مستمرة...

يأخذ «علاء» «هبة» تحت ذراعه وهما واقفان مكانهما وتلف «هبة» بذراعها على خصر «علاء»... يمسح «علاء» دموع «هبة» وتضع «هبة» رأسها على كتفه.. يتردد صدى الأغنية... معقول واقفين بنسلم؟؟ مع بعض سوا بنتكلم؟ وكأننا متقابلين امبارح ولا حاسين ان احنا بقالنا سنين الشوق بنا بيتألم.. قلبي اللي فتحته عشانك من يومها قفلته عليكي ولا حدش يملى مكانك وادي قلبي خوديه بإيديكي.

ينظر كل منها على منظر النهار الجديد الذي يولد من ظلمة الليل وكأنها رسالة يبعثها لهم القدر بأنهما يستطيعان أن يبدأ حياتهما من جديد ويتزكا سواد ليل أيامهما الماضية يذهب للجحيم ويسمحا لنهار بدايتهم المؤجلة في الظهور.. تجد «هبة» الشارة التي كانت تشير بها للحمام فيما مضي فتمسكها بيدها الثانية وتشير للحمام الذي استيقظ من نومه على الأشجار بعد أن هجر غيته ويبدأ «علاء» بإصدار صوت صفارة كان يجتمع عليها الحمام في الماضي.. يسمع الحمام الصوت ويلبي النداء ويرى الحمام الشارة فيفرح لعودة أصحابه مرة أخرى ويطير مندفعًا نحو «هبة» و«علاء» وتمتلئ الغية مرة أخرى في مشهد جميل يدل على السلام والحب....

قراءتنا الأعمام.. تطبيقاً لعلم التواصل بين الكاتب والقارئ ونحوه  
النشر، والاعتماد بمعرفة رأيك دائماً ننشر أن التواصل معنا لتقييم أعمالنا  
هو الإيجابي، ثم هي صفحات مواقع التواصل الاجتماعي، من أجل تطبيق  
علم بناء جيل واعي وثقافة بلور الثقافة بالاجتماع والتنادي بتفتحة طموح  
أساسها الثقافة والعلم.

مدير النشر، أسماء فخر الدين  
شهرزاد للنشر والتوزيع

E-mail: shahrazadpub@gmail.com

facebook: Shahrazadpub

shahrazadpub2015

twitter: shahrazadpub

للشراء عبر صفحة البوكس ستور الإلكتروني،  
ساحبتنا على الفيس بوك شهرزاد بوكس ستور